


O Le Liahona




**E i Ai le Talitonuga, Alofa, ma
le Vaaiga Mamao: Peresitene
Gordon B. Hinckley, i. 22**

Mauaina o le Loto o le Tuuina Atu
o Fesili, i. 14


Mataupu Faavae ma Feagaiga: Malamalama
Muamua e uiga i le Tama ma le Alo, i. 16

Pe a E Tu Na o Oe, Filifili le Lototele, i. 28



Sa matauina le pueina e le pue ata o le Au Paia o Aso e Gata Ai o George Edward Anderson lenei taimi i le 1907. Sa iloa ai le eseeseaga o aso uma ma le mea na tupu faavauv le taua lea sa tupu i le togavaao lata ane: le Uluai Faaliga. I lenea Togavao Paia e latalata i Palamairai, Niu loka, sa tatalo ai Josefa Samita e 14 tausaga ina 'ila po o fea o lotu e ao ona auai ma sa taliiha i se asiisiga mai le Atua le Tama ma le Alo.

Ata na pueina faadoalooga a le Potutasi o le Talafaaosolopito a le Eklesia



4

O SAVALI

- 4** **Savali a le Au Peresitene Sili: Taulai Atu i le Ogaotonu**
Saunia e Peresitene Dieter F. Uchtdorf
- 7** **Savali a Faiaoga Asiasi: O Le Faamoemoega o le Aualofa**



I LE FAAVAA

faavaa i luma: Ata na pueina e George Edward Anderson; faaloaloga a le faletusi o talafaasolopito a le Eklesia.

TALA FAAALIA

- 16** **O Malamalamaga mai le Mataupu Faavae ma Feagaiga e uiga i le Tama ma le Alo**
Saunia e Norman W. Gardner
Talu ai ua faaalia mai upumoni na leitoloa i le Toefuatataiga, ua fesoasoani le Mataupu Faavae ma Feagaiga ia faalolotoina la tatou malamalamaga e uiga i le Tama ma le Alo.
- 22** **Gordon B. Hinckley: O Se Perofeta e i ai se Talitonuga o le a Lelei Mea Uma ma se Vaaiga**
Saunia e Andrew D. Olsen
I le avea ai ma Peresitene pele lona 15 o le Eklesia, sa taitai Gordon B. Hinckley ma se faataitaiga e faatumulua i le talitonuga o le a lelei mea uma, alofa, ma se vaaiga mo le lumanai.

28 Totoa i La Tatou Molimau i le Faaola

Saunia e Elder Christoffel Golden
O taimi faigata o taimi sili ia ona iloatino ai po o ai i tatou.

34 O Mea Uma E Te Maua la Maua Mai Ai Le Malamalama

Saunia e Elder Gary E. Stevenson
O le malamalamaaga moni o le a oo mai i le malamalama i le tuu-faatasiga o le suesue ma le tatalo, tautino atu e auaua atu, ma faalagolago i le Alii.

MATAGALUEGA

- 8** **Tusigāmanatu o le Konafesi ia Oketopa 2016**
- 10** **O Le Mea Tatou Te Talitonu I Ai: Tatou te Talitonu o le a Faatumuina e le Eklesia le Lalolagi**
- 12** **O Tatou Aiga, O Tatou Auaigna: Ou Te Manao e Faatasi ma Oe e Faavavau!**
Saunia e Leongina Adamés de Ubri
- 14** **Aoao Atu i le Ala a le Faaola: Fesiliglia o a Tatou Fesili mo Talanoaga**
Saunia e Ted Barnes
- 40** **O Leo o Le Au Paia o Aso e Gata Ai**
- 80** **Seia Tatou Toe Feiloai: O Le Mataupu mo se Perofeta Soifua**
Saunia e Peresitene Hugh B. Brown



44

44 Mataupu Faavae Faavaloaga o le Faamaoni

Saunia e Elder C. Scott Grow

O faaiga ma tautinoga e te faia i le taimi nei o le a fesoasoani ia te oe ia tumau faamaoni i le lumanaia.



58

**50 Autu o le Mutuale 2017: Iakopo 1:5-6**

Saunia e Stephen W. Owen
ma Bonnie L. Oscarson

53 Pepa Lautele o I Ai se Savali: Fesili atu**54 O Folafolaga e Lima o le Tatalo**

Saunia e Carlisa Cramer
O le tatalo e sili atu nai lo o se auala e fesootai ai ma lo tatou Tama o i le Lagi. O nisi nei o nai faamanuiaga e maua mai ai.

56 O Fesili e Lima e Fesili Ai Pe a Lagona Le Le Taliina o Tatalo

Saunia e Margaret Willden
Efaigata pe a lagona e lei taliina ia tatalo, ae atonu o le a fesoasoani ni nai fesili e te mafaufau ai e uiga i mea i se auala fou.

58 Pese o le Autu o le Mutuale: Ole Atu i le Atua

Saunia e Nik Day

61 O Lea Mataupu ma Lea Mataupu: Iakopo 1:5-6**62 Taimi Faaselesitila**

Saunia e Hollie Megan Laura Hunter
O taimi faapenei, e vave ai lava ona lagona le le mamao ese atu o le lagi.

63 O La Tatou Avanoa**64 O Tali mai Taitai o le Ekalesia: Auala e Faasoa atu ai le Talalelei**

Saunia e Elder M. Russell Ballard

65 Tuusao i le Mataupu

O faigata ona faamagalo atu? O tauivi ea ma se atuatuvalae?

76

**66 Siata mo le Faitauina o le Talafaasolopito o le Ekalesia: O Le Toefuataiga****69 O Tali mai se Apostolo: Mata o le a tali mai i taimi uma e le Tama Faalelagi a'u tatalo?**

Saunia e Elder Dallin H. Oaks

70 O La Tatou Itulau**71 O Le Tusi o loo i Luga o le Fatatusi**

Saunia e Elder Walter F. González
O le sailiga o se tusi lelei e faitau, sa ou maua ai le Tusi a Mamona ma suaia ai lo'u olaga.

72 Ua Agavaa Min-Jun

Saunia e Kelly Hunsaker

E faapefea ona alu Min-Jun i totonusi o le lotu ae ua palapala ma susu uma?

74 Aua Nei Galo ona Tatalo mo Erik

Saunia e Julie Cornelius-Huang
Sa faanoanoa Kari i le toe fia lotu o lona tuagane, ae na ia aoaoina se lesona taua e uiga i le tatalo.

76 Tala ia lesu: E alofa lesu ia te A'u

Saunia e Kim Webb Reid

79 Itulau e Valivali: O A'u o se Atalii o ni Matua Faalelagi

O Le Lomiga Faamaonia Faa-Samoa a le Ekalesia
a Iesu Keriso o le Au Paia o Aso e Gata Ai

Susuga a le Au Peresitene Sili: Thomas S. Monson,
Henry B. Eyring, Dieter F. Uchtdorf

O Le Korama a Apostolo e Toasefululu:

Russell M. Nelson, Dallin H. Oaks, M. Russell Ballard,
Robert D. Hales, Jeffrey R. Holland, David A. Bednar,
Quentin L. Cook, D. Todd Christofferson, Neil L. Andersen,
Ronald A. Rasband, Gary E. Stevenson, Dale G. Renlund

Faatonu: Joseph W. Sitati

Assistant Editors: Randall K. Bennett, Carol F. McConkie

Fautua: Brian K. Ashton, Jean B. Bingham, LeGrand R.
Curtis Jr., Christoffel Golden, Douglas D. Holmes, Erich W.
Kopischke, Larry R. Lawrence, Carole M. Stephens

Pule Faatonusili: Peter F. Evans

Faatonusili o le Lagolago mo Aiga ma

Faatonusili o Mekasini a le Ekalesia: Allan R. Loyborg

Pule o Mea Tau Pisini: Garff Cannon

Pule Faatonutonu: Adam C. Olson

Pule Faatonutonu Lagolago: Ryan Carr

Lagolago o Lomiga: Megan Seitz

Au Tositusi ma Faatonutonu: Bethany Bartholomew,
Brittany Beattie, David Dickson, David A. Edwards,
Matthew D. Flinton, Lori Fuller, Garrett H. Garff, LaRene Porter
Gaunt, Charlotte Larcabal, Michael R. Morris, Eric B. Murdock,
Sally Johnson Odekirk, Joshua J. Perkey, Jan Pinborough,
Richard M. Romney, Mindy Anne Selu, Marissa Widdison

Pule Faatonusili Tusiata: J. Scott Knudsen

Faatonusili Tusiata: Tadd R. Peterson

Au Mamanu: Jeanette Andrews, Fay P. Andrus, C. Kimball
Bott, Thomas Child, David Green, Colleen Hinckley, Eric P.
Johnsen, Susan Lofgren, Scott M. Mooy, Mark W. Robison,
Rachel Smith, Brad Teare, K. Nicole Walkenhorst

Faatonu o le Puletaofia ma Fatufatuga:

Collette Nebeker Aune

Pule i le Gaosiga: Jane Ann Peters

Au Gaosi: Glen Adair, Connie Bowthorpe Bridge, Julie
Burgett, Bryan W. Gygi, Ginny J. Nilson, Gayle Tate Rafferty,
Derek Richardson

Tailolomi: Joshua Dennis, Ammon Harris

Faatonusili Lolomiga: Steven T. Lewis

Faatonusili o le Tufufatuga: Troy K. Vellinga

Mo le okaina o mekasini, alu i le store.lds.org po o le
Faletusi Tutotonu i Pesega. Telefoni 64127. Totogi o le
Mekasini: \$0.55 (Samoa) ī le kopī. Totogi mo le Tausaga
Atoa \$6.60 (Samoa).

**Auina atu tūtūsiga ma faafesili i luga o le
initonetī** i le *Liahona*,
Rm. 2420, 50 E. North Temple, Salt Lake City, UT 84150-
0024, USA; po o le i-meli: liahona@ldschurch.org.

O Le *Liahona* (o lona uioga i le Tusi a Mamona o le "tapasa"
po o se "faatonuala") ī lomia i le faa-Alepania, Aminia
(Sasae), Pisilama, Palekeria, Kemupotia, Sepuania, Saina,
Kalaotia, Siekisolovakia, Tenimaka, Take, Igilisi, Esitonua,
Fit, Finelani, Farani, Siamani, Eleni, Hanikeri, Initu, Iselanai,
Indonesia, Italia, Japani, Kiripati, Korea, Latvia, Lithuania,
Malakasa, Maseda, Monokolia, Nouei, Polani, Potukale,
Romania, Rusia, Samoa, Saina (ua faafaofoineia), Slovenia,
Sipaniolo, Suetenia, Swahili, Tagaloka, Tahiti, Tai, Toga,
Iukureini, Urutu, ma Viatename. (E eseese lava gagana.)

© 2017 Puletaofia e le Intellectual Reserve, Inc. Ua taofia
aia tatau uma. Lomia i le lunaite Setete o Amerika.

Faamatatalaga o le Puletaofia: Wagana ua faailoa atu,
e mafai e tagata tātōtasi ona kopiina anomea mai le
Liahona mo lo latou faaaogaina patino, ma le saili tūpe (e
aoia ai mo valaauga o le Ekalesia). O lenei aia tatau e mafai
ona faaleaoagaina i soo se taimi. O anomea o mea fatiino e
le mafai ona kopina po afai o o loo faailoa mai se faasa i le
laina o loo i ai ma le faatufugaga. O fesili mo le Puletaofia e
tatou ona faatuatusi mai i le Intellectual Property Office, 50
E., North Temple St., FL 13, Salt Lake City, UT 84150, USA;
email: cor-intellectualproperty@ldschurch.org.

For Readers in the United States and Canada:
January 2017 Vol. 41 No. 1. O LE LIAHONA (USPS 311)
Samoan (ISSN 1045-0947) is published monthly by The
Church of Jesus Christ of Latter-day Saints, 50 East North
Temple, Salt Lake City, UT 84150. USA subscription price
is \$10.00 per year; Canada, \$12.00 plus applicable taxes.
Periodicals Postage Paid at Salt Lake City, Utah. Sixty days'
notice required for change of address. Include address label
from a recent issue; old and new address *must* be included.
Send USA and Canadian subscriptions to Salt Lake
Distribution Center at address below. Subscription help
line: 1-800-537-5971. Credit card orders (Visa, MasterCard,
American Express) may be taken by phone. (Canada Poste
Information: Publication Agreement #40017431)

POSTMASTER: Send all UAA to CFS (see DMM 507.1.5.2).

NONPOSTAL AND MILITARY FACILITIES: Send address
changes to Distribution Services, Church Magazines,
P.O. Box 26368, Salt Lake City, UT 84126-0368, USA.

Manatu mo Afiafi Faaleaiga

O lenei lomiga o loo aofia ai tusiga ma gaoioiga e mafai ona faaaoga mo afiafi
faaleaiga. O ni faataitaiga nei se lua.



"Lototele i la Tatou Molimau i le

Faaola, itulau 28: O loo talanoaina e Elder
Golden le ala o le a tatou fetaiai ai ma taimi
faigata ae taua i o tatou olaga. E mafai ona e
faatinoina i se tala le tele o tulaga lea e
fetaiai ai tagata o le aiga ma se faaiuga fai-
gata. Mo se faataitaiga, atonu e mafai ona e
faataitai le fai atu leai i se tagata o le vasega
lea na talosaga atu e kopi i lau meaaoga pe
fai atu i se uo e faaaoga le gagana mama.
Talanoa i le auala e mafai ona e saunia ai e
ala i le atinaeina o se molimau malosi e uiga
i le Faaola ao lei tulai mai ia tulaga.

"Mata e tali mai le Tama Faalelagi

i au tatalo i taimi uma? itulau 69:
Na faapefea ona e iloa ua tali mai au
tatalo? Atonu e mafai ona e faasoa atu
ni aafiaga patino lea na tali mai ai e le
Alii au tatalo, pe na tali mai i se auala na
e faamoemoeina pe lei faamoemoeina.
Mafaufau e uunaia e le tasi le isi ina ia
faamaumau i se api talaaga ni auala
faapitoa na tali mai ai e le Alii au tatalo
ma faamanuiaina ai oe.

FAAOPOOPOGA O LOO MAUA I LE INITONETI

O loo maua le *Liahona* ma isi mea e faaaoga a le Ekalesia i le tele o gagana i le
languages.lds.org. O loo maua faila na pueina i le otio o tusiga o le *Liahona* i le
gagana Peretania, Potukale, Sipaniolo i le liahona.lds.org. E mafai foi ona e asiasi i le
facebook.com/liahona.magazine e maimoa ma faasoa ai i ni savali musuia (o loo maua
i le gagana Peretania, Potukale, ma le Sipaniolo).

AUTU I LE LOMIGA LENEI

O numera e faasino i le itulau muamua o le tusiga.

Afio Mai Faalua, 10

**Agaga Paia, 42, 54, 62,
64, 74**

Aiga Atua, 16

Alofa, 4, 22, 76

Atuatuvale, 65

Aualofa, 7

Faamagaloga, 54, 65

**Faatuatua, 12, 22, 34, 44,
50, 53, 58, 61, 72, 80**

Faitalia, 44, 74

Feagaiga, 44

Fesili, 14, 56, 58

**Galuega faafaifeautalai,
10, 34, 63, 64, 71**

**Iesu Keriso, 4, 16, 28, 34,
70, 76**

**Iosefa Samita, 10, 16, 28,
34, 66, 71, 80**

**Malumalu, 12, 22, 44, 62,
63, 70**

**Mataupu Faavae ma
Feagaiga, 16, 66**

Mea e faamuamua, 43, 44

Molimau, 22, 28, 44, 64

**O Aiga e faavavau, 12,
41, 44, 63, 79**

Perofeta, 22, 80

Poloaiga, 4, 28, 76

Ponokalafi, 44

**Suesue i tusitusiga paia,
34, 43, 66, 71**

**Talafaasolopito o aiga,
41, 63**

**Talafaasolopito o le Eka-
lesia, 10, 16, 28, 34, 66**

**Tatalo, 34, 42, 50, 53, 54,
56, 58, 61, 71, 74**

**Taua o le tagata lava ia,
72**

Toofilemu, 54, 62

Toefuataiga, 16, 66

Tulaga faatamaitai, 40

Tusi a Mamona, 71

Usiusitali, 44, 61



Saunia e Peresitene
Dieter F. Uchtdorf
Fesoasoani Lua i le Au
Peresitene Sili

Taulai Atu

ILE OGATOTONU

Talu ai nei, sa ou matamata ai i se vaega o tagata o loo faataitaia le tomai o le tagata faga aū. E na o le matamata i ai, sa amata ona manino ia te au afai e te manao moni ia lelei i le aufana ma le aū, e manaomia ai le taimi ma le faataitaiga.

Ou te manatu e le mafai ona e atiae se tulaga mo le tagata faga aū lelei e ala i le faga atu i se puipui e leai se mea o i ai ona tusi lea o ni taulaiga e faataamilo i aū. E ao ona e aoaoina le tomai o le mauaina o le taulaiga ma faga tonu le taulaiga autu.

Valiina o Taulaiga

O le fagaina muamua ma le tusiina o le taulaiga pe a uma e ono foliga e faavalevalea, ae o nisi taimi e faataitaia e i tatou lava lena lava amio i isi tulaga o le olaga.

I la tatou matafaioi o tagata o le Eklesia, o loo ia i tatou le lagona i nisi taimi e tuuto atu i polokalama o le talalelei, o mataupu, e oo lava i aoaoga faavae e foliga manaia, taua, pe faafafiaina ia i tatou. E faaosoosoina i tatou e tusi ni taulaiga e faataamilo ia i latou, ma tatou talitonu ai o loo tatou mulimuli i vaega sili ona taua o le talalelei.

E faigofie ona faia lea mea.

I le talafaasolopito o le lalolagi, sa tatou mauaina ni fautuaga ma ni uunaiga aupito sili ona lelei mai i perofeta a le Atua. Tatou te maua foi le taitaiga ma le faamaninoga mai i lomiga eseese, o tusitalima, ma tusi lesona a le Eklesia. E mafai ona faigofie ona tatou filifili la tatou autu faaletalalelei e sili ona fiafia i ai, tusi faataamilo se mea e taulai i ai, ma faia se tulaga e faamasino ai le totongalemu o le talalelei.

Ua Faamanino Mai e le Faaola

E le o se faafitauli lenei e uiga ese i o tatou aso. I anaumua, sa faaalu ai e taitai faalelotu se taimi tele e faavasega

ai, faatulaga, ma finauina po o le fea o le faitau selau o poloaiga sa sili ona taua.

I se tasi o aso sa taumafai ai se vaega o tagata atamai faalelotu e faaaofia le Faaola i totonu o le finauga. Sa latou talosaga atu ia te Ia e tuuina mai ni Ona manatu i nai manatu e mafai ona malilie i ai.

“Le aoao e,” sa latou talosaga ai ia te Ia, “o le fea poloaiga o i le tulafono ua sili?”

Ua tatou iloa uma le ala na tali atu ai Iesu: “E te alofa atu i le Alii lou Atua ma lou loto atoa, ma lou agaga atoa, ma lou manatu atoa.

“O le poloaiga muamua lena ma le sili.

“E faapena foi le lona lua, E te alofa atu i le lua te tuaoi, ia pei o oe lava ia te oe.

“O na poloaiga e lua ua autu ai le tulafono uma ma le au perofeta.”¹

Faamolemole matau le fuaiupu mulimuli: “O na poloaiga e lua ua autu ai le tulafono *uma* ma le au perofeta.”

E le gata sa faaali mai e le Faaola le taulaiga, ae sa Ia faailoa mai foi le taulaiga autu.

Faga Tonu le Taulaiga

I le avea ai o ni tagata o le Eklesia, tatou te osi feagaiga e ave i o tatou lava luga le suafa o Iesu Keriso. O se vaega e malamalamala ai o lena feagaiga o le malamalamaga o le a tatou taumafai e aoao e uiga i le Atua, alofa ia te Ia, faateleina lo tatou faatuatua ia te Ia, faamamalu o Ia, savali i Ona ala, ma tutu mausali o ni Ana molimau.

O le tele o lo tatou aoao e uiga i le Atua ma lagona Lona alofa mo i tatou, o le tele o le tatou iloaina o le taulaga le iu a Iesu Keriso o se meaalofa paia a le Atua. Ma e musuia i tatou e le alofa o le Atua e faaaoga le ala o le salamo moni, lea o le a taitai atu i le vavega o le faamagalo atu.



O lenei faagasologa e mafai ai e i tatou ona maua le alofa silisili ma le agalelei mo i latou o siomia i tatou. O le a tatou aoao e vaai i tua atu o mea faalelelei. O le a tatou tetee atu i le faaososoga e tuuaia po o le faamasino atu i isi i o latou agasala, le atoatoa, mea sese, manatu faapolokiki, talitonuga faalelotu, tagata, po o lanu o pau.

O le a tatou mafaufau i tagata uma tatou te feiloai i ai o se atalii/afafine a lo tatou Tama Faalelagi—o lo tatou uso po o lo tatou tuafafine.

O le a tatou aapa atu i isi i le malamalama ma le alofa—e faapena ia i latou o e foliga mai e le faigofie ona alofa i ai. O le a tatou faanoanoa mai latou o e faanoanoa ma faamafanafana i latou o e manaomia le faamafanafanaga.²

Ma o le a tatou iloaina, e le manaomia ona tatou atugalu e uiga i le

taulaiga sao o le talalelei.

O poloaiga e sili e lua o taulaiga ia. O na poloaiga e lua ua autu ai le tulafono uma ma le au perofeta.³ A o tatou taliaina, o isi mea lelei uma o le a malamalama e tusa ai ma o latou taua talafeagai.

Afai o lo tatou taulaiga autu, mafaufauga, ma taumafaiga e taulai i le

faateleina o lo tatou alofa i le Atua Silisili Ese ma tuuina atu o tatou loto i isi, e mafai ona tatou iloa ua tatou maua le taulaiga sao ma o loo taulai atu i le taulaiga autu—o le avea ma soo moni a Iesu Keriso. ■

FAAMATALAGA

1. Mataio 22:36–40.
2. Tagai Mosaea 18:9.
3. Tagai Mataio 22:40.

AOAO ATU MAI LENEI SAVALI

Ao lei faasoaina atu lenei savali, e mafai ona e usuina le “O Le Alofa o Ale Faaola” (*Viiga*, nu. 61). Ona mafaufau lea e uunaia i latou e te asia e mafaufau i ni “taulaiga” i o latou olaga. E mafai ona e talanoaina ni auala e mautinoa ai e avea pea poloaiga sili e lua—ia “alofa atu i le Alii lou Atua” ma ia “alofa atu i le lua te tuaoi ia pei o oe lava ia te oe” (tagai Mataio 22:37, 39)—e taialaina o latou amioga. Atonu e te faasoa atu foi ni auala faapitoa lea sa e taulai ai ia Keriso i lou lava olaga ma faasoa atu le molimau o le auala na faamanuiaina ai oe.

E Mafai e se Ataata ona Faia le Eseesega

Ua faailoa mai e Peresitene Uchtdorf ni sini se lua e tatau ona tatou maua mo a tatou amioga: alofa i le Atua ma o tatou uso a tagata. Ae o nisi taimi e le faigofie lava ona alofa atu i isi. I lou olaga atoa, atonu e i ai ni taimi e faigata ai ia te oe ona fegalegaleai ma isi—atonu o se tasi sa faatiga ia te oe pe e faigata ia te oe ona fesootai pe fiafia faatasi ma se tasi. I nei taimi, taumafai ia manatua le alofa sa e lagonaina mai i uo, aiga, Tama Faalelagi, ma lesu Keriso. Ia manatua le olioli sa e lagonaina i na tulaga ma taumafai e vaai faalemafaufau pe sa maua e tagata uma le avanoa e lagona ai sea ituaiga alofa. Ia manatua o tagata uma o se afafine po o se atalii a le Atua ma e taua uma Lona alofa *ma* lou alofa.

Mafaufau i se tagata faapitoa i lou olaga e faigata ia te oe ona fiafia i ai. Faaaofia i latou i au tatalo ma ole atu i le Tama



Faalelagi ina ia tatala lou loto ia i latou. O le a vave ona e vaai atu ia i latou i le ala Na te silasila ai: o se tasi o Ana fanau e tatau i ai le alofagia.

A maea ona e tatalo, ia faia se mea manaia mo i latou! Atonu e valaaulia i latou i se gaoioiga o le Mutualo po o se tafaoga ma ni uo. Ofo atu e fesoasoani i se meaaoga. Pe tau lava o le fai atu "talofa" ma ataata atu ia i latou. E mafai e mea laiti ona faia se eseesega tele . . . i o oulua olaga!

TAMAITI

Taulaiga Autu!

U a saunoa mai Peresitene Uchtdorf, o le talalelei e pei o le faataitaiga o le mea e taulai i ai. Tatou te manaomia ona taulai atu mo mea aupito sili ona taua. O poloiga sili o le alofa i le Atua ma le alofa i isi. A tatou taulai i nei mea e lua, e mafai ona tatou mauaina le mea e taulai iai i taimi uma!

Tusi se au i mea e taulai i ai e fesoasoani ai ia i tatou e faaali atu le alofa mo le Atua ma isi. Tusi se X i mea e taulai i ai e le o ni mea lelei e fai.



O Le Faamoemoega o le Aualofa

Ia suesue ma le agaga tatalo lenei savali ma saili ia iloa mea e faasoa atu.



O le faamoemoega o le Aualofa o le “saunia lea o tamaitai mo faamanuiaga o le ola faavavau,” o le saunoaga lea a Linda K. Burton, Peresitene Aoao o le Aualofa.¹ E ala i le faatuatua, aiga, ma le toomaga lea tatou te auai ai i o tatou “vaega paia i le galuega.”²

O le Aualofa “o se galuega faaletino ma faaleagaga,” o le tala lea a Carole M. Stephens, Fesoasoani Muamua i le Au Peresitene Aoao o le Aualofa. “O mea na sa faia e tamaitai i aso o le Faaola, ma o mea na tatou te faaauau pea ona faia.”³

Ao tatou vaai i le fafine Samaria i le vaieli, o le sa tuua lana fagu ma tamoe e tau atu i isi o Iesu o se perofeta (tagai Ioane 4:6–42), po o ia Fipe, o le sa auauna atu ma le fiafia i isi i lona olaga atoa (tagai Roma

16:1–2), tatou te vaai i faataitaiga a tamaitai i aso o le Faaola o e na faia se vaega malosi e o atu ia Keriso. O Ia lava e tatalaina lo tatou auala i le ola e faavavau (tagai Ioane 3:16).

A o tatou vaavaai i o tatou uso paionia i Navu, Ilinoi, o e na faapotopoto i le fale o Sara Kimball i le 1842 e faatulaga ai lo latou lava faalapotopotoga, tatou vaai i le fuafuaga a le Atua i le faatulagaina o le Aualofa ma ia mulimuli i le perisitua. Ina ua maea ona tusia e Eliza R. Snow se pepa o faamatalaga o i ai mataupu faavae, sa iloiloina e le Perofeta o Iosefa Samita. Sa ia silafia ai sa lei atoatoa ona faatulagaina le Ekalesia seja faatulagaina tamaitai. Sa ia saunoa mai sa taliaina e le Alii lo latou taulaga ae sa i ai se isi mea e sili atu. “O le a

ou faatulagaina tamaitai e ala i le perisitua ma le mamanu o le perisitua,” o lana saunoaga lea.⁴

“O le Aualofa sa le na o se tasi vaega o tamaitai sa taumafai e faia mea lelei i le lalolagi. E ese. O se ‘mea e sili atu’ aua sa faatulagaina i lalo o le pule a le perisitua. O lona faatulagaga o se laasaga e tatau ai i le folasiaina o le galuega a le Atua i le lalolagi.”⁵

Mau ma Faamatalaga Faaopoopo
Mataupu Faavae ma Feagaiga 25:2–3, 10; 88:73; reliefsoociety.org

FAAMATALAGA

- Linda K. Burton, i le Sarah Jane Weaver, “Relief Society Celebrates Birthday and More March 17,” *Church News*, Mar. 13, 2015, news.lds.org.
- Linda K. Burton, i le Weaver, “Relief Society Celebrates Birthday.”
- Carole M. Stephens, i le Weaver, “Relief Society Celebrates Birthday.”
- Iosefa Samita, i le *O Afafine i Lo'u Malo: O Le Talafaaosolopito ma le Galuega a le Aualofa* (2011), 11–12.
- O Afafine I Lo'u Malo*, 16.



Faatuatua,
Aiga,
Toomaga



Mafaufau i le Mea Lenei

E faape-faea e le Aualofa ona fesoasoani i tamaitai e faataunuul e matafaioi

paia a le Tama Faa-lelagi mo i latou ma taitai i latou i le ola e faavavau?

TUSIGĀMANATU O LE KONAFESI O OKETOPA 2016

"O le mea ua fai atu ai A'u o le Alii ua Ou fai atu ai; . . . pe i lo'u lava leo po o i le leo o a'u auauna, ua tutusa lava" (MF&F 1:38).

A o e iloiloina le konafesi aoao ia Oketopa 2016, e mafai ona e faaaogaina itulau nei (ma Tusigāmanatu o le Konafesi i lomiga i le lumanai) e fesoasoani ia te oe e suesue ma faaaoga aoaoga talu ai nei a perofeta ma aposetolo soifua ma isi taitai o le Ekalesia.



MATAUPU FAAVAE UA FAAMAMAFAINA

O Le Salamo o le Meaalofa a le Atua ia i Tatou

O se tasi o faaupuga tatou te faalogo soo ai i nei aso e faapea o le alofa o le Atua e 'le faatuaoia.' E ui i se tasi lagona e moni ai, ae o le faamata-laga *le faatuaoia* e le o maua i tusitusiga paia. . . .


"O le a alofa pea le Atua ia i tatou, ae e le mafai ona la laveai i tatou i a tatou agasala. Manatua upu a Amoleka ia Seseroma o le a le laveaia e le Faaola Lona nuu i a latou agasala ae *mai* a latou agasala, o le mafuaaga o lena mea ona o le agasala tatou te eleelea ai ma e 'le mafai e se mea ua le mama ona mautof i le malo o le lagi' [Alema 11:37] pe nofo foi i le afioaga o le Atua. . . .

"Mai le Tusi a Mamona ua tatou aoao o le faamoemoega o puapuaga o Keriso—o le faailoaga sili o Lona alofa—e 'aumai ai loto o le alofa mutimutivale, ia ua faumalo i le faamasinotonu, ma aumai ai ala i tagata e mafai ai ona latou maua o le faatuatua e salamo ai' [Alema 34:15]. . . .

"O le salamo, o Lana meaalofa lea ia i tatou, na faatauina i se tau taugata tele."

Elder D. Todd Christofferson o le Korama a Apostolo e Toasefululua, "Tumau i Lo'u Alofa," *Liahona*, Nov. 2016, 48.

FOLAFOLAGA FAAPEROFETA



O LE FUAFUAGA O LE FAAOLATAGA

"E taua i le fuafuaga [o le faafolataga] o lo tatou Faaola, o lesu Keriso. Ana le aunoa ma Lana taulaga togiola, semanu e leiloloa tagata uma. Peitai, e le lava le tau na ona talitonu ia te la ma Lana misiona. E manaomia ona tatou galulue ma aoao, saili ma tatalo, salamo, ma faaleleia. E manaomia ona tatou iloa tulafono a le Atua ma ola ai. E manaomia ona tatou mauaina Ana sauniga faaola. E nao le faia lava o lena mea o le a tatou maua ai le fiafia moni, e faavavau.

"Ua faamanuiaina i tatou i le i ai o le upumoni. Ua ia i tatou se tiute e faasoatatu le upumoni. Ia tatou ola i le upumoni, ina ia tatou mauaina mea uma ua i ai i le Tama mo i tatou. E leai ma se mea Na te faia vagana ai o mea mo lo tatou manuia. Ua la fetalai mai, 'Faauta, o la'u galuega ma lo'u mamalu lenei—ia aumaia le tino ola pea ma le ola faavavau o le tagata' (Mose 1:39).

"Mai le taele o lo'u agaga ma i le lotomaualalo atoa, ou te molimau atu i le meaalofa sili, o le fuafuaga lea a lo tatou Tama mo i tatou. O le ala atoatoa e tasi i le filemu ma le fiafia iinei ma i le lalolagi a sau."

Peresitene Thomas S. Monson, "O Le Ala Atoatoa i le Fiafia," *Liahona*, Nov. 2016, 80–81.



Togiola e le Iu a Keriso

Ua i ai i le Faaola, le Fomai Sili, le mana e suia ai o tatou loto ma tuuina mai ia i tatou le toomaga tumau mai faanoanoaga ua mafua ona o a tatou lava agasala. . . .


“. . . E mafai e [Ia] ona faamafanafana ma faamalosia i tatou pe a tatou lagona-ina le tiga ona o amioga le tonu a isi. . . .

“. . . E mafai e [Ia] ona faamafanafana ma lagolago i tatou pe a tatou oo i le tiga o ‘mea moni o le olaga faaletino,’ e pei o faalavelave, gasegase faalemafau-fau, faama’i, tiga faifai pea, ma le oti. . . .

“O le Faaola [na fetalai mai]: . . .

“. . . Afai tou te o mai ia te au, o le a outou maua le ola faavavau. Faauta, ua faaloaloa atu ia te outou lou lima alofa mutimutivale, ma o soo se tasi e sau . . . o le a ou taliaina’ [3 Nifae 9:14].”

Carole M. Stephens, *Fesoasoani Muamua i le Au Peresitene Aoao o le Aualofa, “O Le Fomai Sili,” Liahona, Nov. 2016, 10, 11, 12.*



MANA E SUIA AI SAUNIA E MICHAEL T. MAIM

“Soo se mea e tetee ia Keriso po o Lana aoaoga faavae o le a taofia lo tatou olioli.” ”

Peresitene Russell M. Nelson, Peresitene o le Korama a Apostolo e Toasefululu, “Olioli ma le Ola ai Faaleagaga,” *Liahona*, Nov. 2016, 84.

Ina ia faitau, matamata, pe faalogologo i lauga o le konafesi aoao asiasi i le conference.[lds.org](https://www.lds.org).

Sau, Mulimuli Mai ia te la

O nisi failauga sa uunaia i tatou e atiina ae uiga Faakeriso ma manatua le Faaola a o tatou tapuai i le Sapati. Faaaoga le lomiga o Novema 2016 pe asiasi i le conference.[lds.org](https://www.lds.org) e faitau ia latou saunoaga.

- E faapefea ona ou faataitaia le alofa ma le auaunaga faaKerisiano? —Tagai Robert D. Hales, “‘Sau, Mulimuli mai ia te Au’ e ala i le Ola i le Alofa ma le Auaunaga Faakerisiano,” 22.
- E mafai faapefea ona ou avea ma se faiaoga o aiga e sili atu ona lelei? —Tagai Jeffrey R. Holland, “O Sui Vaaia i le Ekalesia,” 61.
- E faapefea ona ou atiaeina le tapuai faamaoni ma le loto i ai i le aso Sapati? — agai Dean M. Davies, “O Faamanuiaga o le Tapuai,” 93.
- E mafai faapefea ona ou avea le ‘ai ma inu i le faamanatuga ia sili atu ona anoa? —Tagai Peter F. Meurs, “E Mafai ona Fesoasoani le Faamanatuga la i Tatou ia avea ma Tagata Paia,” 85.

TATOU TE TALITONU O LE A FAATUMUINA E LE EKALESIA LE LALOLAGI

Sa na o le toaono tagata o le Ekalesia i le taimi na faatulaga ai i le 1830 i se tamai aai i Niu Ioka, ISA. Talu mai lena taimi ua faatupulaia le auai o tagata i le silia ma le 15.5 miliona tagata o le ekalesia ma uarota ma paranesi i le sili atu ma le 150 atunu. O lenei faatupulaia o le faataunuuga lea o le valoaga i le Feagaiga Tuai e faapea o le a taavale atu le Ekalesia ma faatumulua ai le lalolagi atoa (tagai Tanielu 2:31–45). O le Ekalesia—le malo o le Atua i luga o le fogaelele—ua faamatalaina “na tofia [le maal] i le mauga, a e lei tofia i lima” (Tanielu 2:45), ua faaalia mai o se galuega paia, ae le o se galuega na faia i lima.

E oo lava ina ua faatumulua e aafiaga o le Ekalesia le lalolagi, na toalaiti lava ona tagata auai. Na muai vaai Nifae i lenei mea ma tusi e uiga i o tatou aso, “Ma sa oo ina ou vaai atu i le ekalesia a le Tamai Mamoe a le Atua, ma sa toaitiiti ona aofai” ona o le amioleaga sa siomia ai (1 Nifae 14:12). Ao latalata le oo mai o le taimi o le Afio Mai Faalua o Iesu Keriso, o le a faateleina le amioleaga o le lalolagi, ma “o le a faaititia le tautaua o le avea ai ma se Au Paia o Aso e Gata Ai.”¹

Ae sa muai vaai foi Nifae “o le ekalesia a le Tamai Mamoe, o i latou ia o le au paia a le Atua, ua i ai foi i latou i luga o le lalolagi atoa” (1 Nifae 14:12). Ua i ai uarota ma paranesi i luga o le lalolagi atoa, ua faaliliuina konafesi aoao i le silia ma le 90 gagana, a e toeitiiti atoa le 75,000 o faifeautalai faamisiona o loo faasoaina atu le talalelei i misiona e 418. O loo faasalalauina atu foi le talalelei i le lalolagi atoa e ala atu i ala faasalalau faaagafesotai ma uepisaite e pei o le Mormon.org ma le LDS.org.

O nei taumafaiga e taua tele ma lautele ae e masani lava ona le tele se taulaiga atu i ai. “O le galuega a le Alii e moni lava e tele ma ofoofogia, ma e alualu i luma ma le taua ma e le iloa e le toatele o taitai faaupufai, faaleaganuu, ma faaleaoaoga. E auaua’i lava le tasi o le loto, tasi le aiga i le taimi, i se ala filemu ma le le gaoia, o ana savali paia ua faamanuiaina ai tagata i soo se mea.”²

O le maa ua leva ona valoia o loo taavale moni atu lava, ma pe a faia la tatou vaega, o le a faaauau pea ona salalau atu le talalelei ma faatumulua ai le lalolagi atoa (tagai Tanielu 2:31–45). ■

Ina ia aoao atili e uiga i le lumanaia o le Ekalesia, faitau le Mataupu Faavae ma Feagaiga 65; Gordon B. Hinckley, “O Le Maa Na Tofia i le Mauga” (konafesi aoao ia Oke. 2007); L. Whitney Clayton, “O Le A Oo Mai le Taimi” (konafesi aoao ia Oke. 2011).

FAAMATALAGA

- Russell M. Nelson, “Tutu Atu o ni Tagata Moni o le Meleniuma,” *Liahona*, Oke. 2016, 50.
- L. Whitney Clayton, “O Le A Oo Mai le Taimi,” *Liahona*, Nov. 2011, 13.




O L E LUMA- NAI O LE EKALESIA

“Ua na o sina luutaga itiiti o le Perisitua o loo outou vaai atu i ai iinei i lenei po, ae o lenei Ekalesia o le a faatumulua ai Amerika i Matu ma Sautē—o le a faatumulua ai le lalolagi.”

O le Perofeta o Iosefa Samita (1805–44), i se sauniga perisitua i le 1834, i Aooga a Peresitene o le Ekalesia: Iosefa Samita (2007), 178.

O a ni mea e mafai ona tatou
faia e fesoasoani i le talalelei
ina ia taavale atu i luma?



O le tausiga o poloaiga
ma faamalosia a tatou
molimau e aumaia ia i tatou
se faavae e fesoasoani e
faasalalau atu ai le talalelei.



O le faataunuina o o tatou
valaauga e fesoasoani e
faamalosia le Ekalesia i totonu
o eria o lo tatou lotoifale.



E mafai ona tatou fesoasoani
e faasoa atu le talalelei
i le na o le talanoa atu
i tagata e uiga i ai.

O le aoao atu o le talalelei i
o tatou aiga e faamalosia ai
i latou ina ia ola faamaoni
i se lalolagi lea e ese mea
oo loo aoaoina ai i latou.



E mafai ona tatou
faataunuina sauniga i le
malumalu mo i latou o e ua
maliliu e aunoa ma le faalogo
i le talalelei i lenei olaga.

OU TE MANAO E FAATASI MA OE E FAAVAVAU!

Saunia e Leongina Adamés de Ubrí

O le faatuatua a se afafine e ono tausaga le matua na fesoasoani ia te au e toe maua lou faatuatua.

na ua atoa le 22 o ou tausaga, sa tupu se mea e lei mafaufauina i lou olaga: sa maliu lou tina. O ia ma lou tama o ni tagata o le faatuatua maoae, ma sa laua tausia au i le talalelei. Ina ua mavae lona maliu, sa masii ese atu lou tama mai lo matou atunu i le Iunaite Setete. A o faagasolo le taimi, sa amata ona ou lagona le tuuatoatasi talu ai na o au le tama a ou matua. E lei i ai lou tina ma au i le lalolagi, ma o lou tama sa mamao le mea sa nofo ai; sa na o le tolu vайасо ou te vaai ai ia te ia i le tausaga.

Faatosi ai ma na lagona, sa amata ai ona faateleina lou saili mo le taliaina i au “uo” mai le kolisi ma mai le ofisa lea sa ou galue ai. I se taimi puupuu, sa ou amata ai ona maua le fiafia sese i mea faaletino. Sa taofia lou auai i le lotu, ma sa amata ona faasolosolo ina ou le toe malosi. Mulimuli ane, sa ou faaipoipo atu i se alii lelei o le, e ui sa ia te ia ni matapu faavae lelei tele, ae sa lei iloaina se mea e uiga i le talalelei. Sa ma maua ni fanau e toatolu: o Lea, Isaako, ma Isamaeli.

I se tasi taimi ia Oketopa, sa sau ai lou tama e asiati mai ma vaai i le pepe fou. I le taimi o lana asiasiga, sa fesili

ai Lea e ono tausaga i lona tamamatua pe aisea na te le avatua ai lava tinamataua faatosi ma ia. Ona faamalamalama lea e tama ia te ia o Tinamatua o loo i ai i se nofoaga faapitoa e latalata i le Tama Faalelagi. O le taimi lava na alu ese ai lou tama, sa malosi le fai mai o Lea ia te au, “Tina, ou te fia feiloi ia Tinamatua. Ou te iloa o loo i ai o ia i le lagi, ae ou te manao foi ia tatou i ai iina faatosi i se aso—o Tinamatua ma Tamamatua, Tama, Isaako, Isamaeli, ma oe, ma au. Ou te manao e faatosi ma oe e faavavau. Ou te manao ia i

tatou ia avea o le aiga e tasi i le lagi e pei ona tatou i ai i le lalolagi ina ia mafai na tatou taaalo faatosi ma Tinamatua!”

Ou te lei iloa le tala e fai atu. Sa ou pai atu i ona foliga aulelei, ma le mama, ma savali atu i lou potumoe. Sa ou faapau ifo i ou tulivae ma tagi ai seia uma ou loimata. Sa ou ole atu i le Tama Faalelagi mo le faamagaloga. Sa ou iloa sa ou tuua le auala lea e faataga ai i tatou e nonofo faatosi o se aiga e faavavau. Sa ou toilalo i lou tiutetauave e taitai i latou i le



NOATIA I LE LAGI

“O le Faaola i Lana misiona faaletino na fetalai i le mana e faamau ai aiga i nei upu ia Peteru, o Lana Aposetolo taitai, ina ua la fetalai, “E moni ou te fai atu ia te outou, o mea uma tou te fusifusia i le lalolagi, e fusifusia ia i le lagi: o mea uma foi tou te tala i le lalolagi, e tatalaina ia i le lagi” (Mataio 18:18).

“E na o le malo selesitila e mafai ona tatou nonofo ai i ni aiga faavavau. O iina e mafai ona tatou i ai o ni aiga i le afioaga o lo tatou Tama Faalelagi ma le Faaola.”

Peresitene Henry B. Eyring, Fesoasoani Muamua i le Au Peresitene Sili, “E Mafai Na Faavavau Aiga,” Liahona, Iuni 2015, 4.



aula sao, ma sa ou toilalo e talanoa atu i lou toalua e uiga i le talalelei.

Ina ua mafai ona ou tu i luga, sa ou faafesootaia se taitai faaleEkalesia, ma tuu au e fesoottai ma toeaina o lau uarota. O le po na sosoo ai, sa latou o mai ai ma aoao lou toalua. Mai lena po, sa suia o matou olaga e faavavau. O le taimi nei ua matou auai i aso Sa uma o se aiga. O loo ia te au se valaauga e mafai ai e au ona fesoasoani i uso e le toaaga mai. O loo matou sauni foi e auai atu i le malumalu.

O nisi taimi, e taiala i tatou e le Agaga o le Atua i na tagata e itiiti lo tatou faamoemoeina. O le taimi lea sa tupu e ala i lau tama teine e ono tausaga le matua. Ou te iloa e ala i le faamauina i le malumalu, e mafai ona ou ola faatasi ma lou aiga e faavavau. ■

*E alala le tusitala i Santiago,
Dominican Republic.*

FESILIGIA O A TATOU FESILI MO TALANOAGA

Saunia e Ted Barnes

Matagaluega o le Perisitua ma le Aiga a le Ekalesia

Mafaufau o loo e nofo faatasi ma ni uo e aai i le aoauli ma talanoa i se ata sa outou matamata faatasi i ai. Ona fai mai lea o se tasi o au uo, "O ai e mafai ona tau mai po o le a le vaega sili ona taua sa i ai i le tifaga?"

O sina nenefu i le fesili, e te mafaufau ai mo se taimi ma fautua atu masalo o le vaega mulimuli o le vaega sili lea ona taua. "Ia, lelei lena manatu," o le tala lea a lau uo. "Ae e le o le mea lena na ou mafaufau i ai. E i ai

se isi? Sei o tatou faalogo atu i se tasi e lei faasoa mai lava."

E te le talanoa atu i lenei auala i ni uo, ae mo sina mafuaaga e foliga mai e tupu soo i vasega o le Aso Sa. Nai lo le talanoaina masani ma toafimalie o upumoni o le talalelei, i le avea ai o ni faiaoga, o nisi taimi tatou te fai atu ai ni mea lea i nisi o nofoaga e foliga e ese ai ma e oo lava i talanoaga faigata. matou te faamoemoe o le a

lagona e tagata o le vasega o loo latou faatasi ma uo, ma maua le toafimalie i le fefaasoaaai o o latou manatu e faatatau i mataupu faavae o loo latou aoaoina. O ia ituaga fefaasoaaiga

e mafai ona valaaulia ai le Agaga ma faatamaoaigaina ai le aafiaga mo tagata uma.

E faapefea ona tatou mautinoa o a tatou fesili o le a taitai atu ai i se talanoaga sili atu ona anoa ma toafimalie? O loo i ai nisi o mea e fai ma aua le faia ua iloa e le toatele o faiaoga e aoga: Aua nei fai atu ni fesili i ai ni tali manino. Fai ni fesili e sili atu ma le tali e tasi. Aua nei faia ni fesili e patino tele.

Atonu o le a aoga foi, a o lei amata ona tatou fuafuaina ni fesili e fai atu i le vasega, fesili ifo ia i tatou lava le fesili lea: *O le a tonu lava le mafuaaga ua ou ou tuuina atu ai nei fesili?*

Aisea Ua E Fesili Ai?

O le naunautaiga o a tatou fesili e tele se eseesega o i ai. Mo se faatai-taiga, o tatou tuuina atu ea ni fesili i



O le fesili sili ona taua atonu o le fesili lea e fesiligia ai e faiaoga i latou lava ao lei oo i le vasega.

nisi taimi ona e i ai se mea tatou te fai atu ai ae nai lo lena o loo tatou mananao i le tagata o le vasega e tau mai? Tatou te le mananao e faia uma le talanoaga, ae o loo i ai se manatu taua tatou te fia faailoa atu, o lea tatou te tuuina atu ai se fesili i nisi taimi tatou te iloa o le a musuia ai se tali tatou te fia faalogo i ai. O lenei uiga e taitai atu ai i fesili lea o loo avea moni lava o ni faamatalaga faanana, e pei o le “E faapefea ona fesoasoani le aloese mai ponokalafi e tausia ai ia mama ou mafaufau?” “E taua le tatalo i aso uma?”

E i ai tulaga e talafegai tonu ai lava le fai atu o ni fesili ua faamoemoe e uunaia ai se tali faapitoa. E mafai ona avea ma se tulaga e faamamafa atu ai se manatu pe fesoasoani foi i le fai-aoga e faalautele ai le lesona. Peitai o fesili faapenei e le uunaia ai ni talanoaga anoa.

I le isi itu, afai tatou te tuuina atu ni fesili ona tatou te fia iloa moni lava mea o i ai i totonu o mafaufau ma loto ma olaga o ai tagata o la tatou vasega, ona tatou te popole i mea o i latou mafaufau, loto ma olaga, o le a faaalia la i fesili tatou te tuuina atu.

O fesili e valaaulaina tagata o le vasega i ni talanoaga faamaoni ma uunaia le aoaoina faaleagaga e aofia ai fesili ia pei o le “Ao e faitauina le fuaiupu lenei, o le a le mea e foliga

mai e sili ona taua ia te oe?” po o le “O a ni aafiaga ua aoaoina ai oe ina ia faalagolago i folafolaga a le Alii?” po o le toeitiiti lava o soo se fesili e amata ma le “O le a sou manatu . . . ?”

Mafaufau i faataitaiga nei:

- Na fesili atu le Agaga ia Nifae, “O le a le mea ua e manao i ai?” (1 Nifae 11:10).
- Na fesili atu le Faaola i Ona soo, “O le a sa outou upu o ai Au?” (Mataio 16:15).
- Ma sa Ia fetalai atu ia Maretia, “O Au nei o le toe tu ma le ola: . . . Talitonu mai ea i lena mea?” (Ioane 11:25, 26).

O nei fesili taitasi ua valaaulaina se tagata e faasoa mai se mea o i lona loto. Ma i tulaga taitasi, o le mea na sosoo ai o se aafiaga faaleagaga mamana.

O Fesili o se Faailoga Lea o le Alofa

Talitonu i ai pe leai, o le tuuina atu o ni fesili ia e uunaia ai talanoaga o se tulaga masani ai i le toetoe lava o tagata uma—e oo lava i tagata latou te le mafaufauina i latou lava o ni faiaoga lelei. Tatou te faia i taimi uma lava e faia ai a tatou talanoaga anoa ma uo po o aiga-pe na o le talanoa e uiga i se ata e sili ona fiafia i ai i le taimi o le malologa. Ae o le taimi lava tatou te tutu ai i luma o ni tamaiti aoga naunautai, e faafuasei lava ona

galo uma ia i tatou le mea e masani ona oo mai.

Masalo la o se vaega o le togafiti i le tuuina atu o ni fesili lelei mo talanoaga o le tatou mafaufau lea faapeea ia i tatou lava, “E faapefea ona ou fesiligia lenei mea pe ana faapefea matou te le o i ai i le potuaoga—pe ana faapefea na o lo matou saofafai i le fale ma talatalanoa e uiga i le talalelei ma se vaega o ni uo? E faapefea ona ou valaaulaina i latou e faasoa mai ni o latou malamalamaga ma lagona?” O le aoao atu e le pei o se talanoaga faasamasamanoa ma uo, ae i ai se mea e tasi e tutusa ai: e tatau ona musuia e ni mea moni e fiafia i ai ma le alofa moni.

Aua la e te popole pe afai e lei lava lou tomai i le fatuina o ni fesili ua lelei le faaupuina. E tusa lava pe pau le mea e mafai ona e faia o le alofa lea i tagata o e aoaoina, o le a taitaia oe e le Agaga, ma o le a amata ona e lelei ma faaauau pea i le iloaina o mea e fai atu ai. “E le uma le alofa,” na tautino mai e Paulo (1 Korinito 13:8), ma e moni lena mea e oo lava i se mea e faigofie e pei o se faiaoga o fai atu ni fesili i le vasega. ■

E mafai ona e aoao e uiga i ituaiga o fesili e i ai i le “Fai Fesili Musuia,” Aoao Atu i le Ala a le Faaola (2016), 31–32, o loo maua i le teaching.lds.org.



O MALAMALAMAAGA MAI LE MATAUPU
FAAAVE MA FEAGAIGA E UIGA I

le Tama ma le Alo

O lenei tusi o faaaliga, ua faaali mai upumoni sa leiloloa e uiga i le Aiga Atua ma le auala e mafai ai ona tatou toe nonofofaatasi ma le Faaola ma le Tama Faalelagi.

Saunia e Norman W. Gardner

Seminare ma Inisitituti

O le Toefuataiga o le talalelei ua tuuina mai i le lalolagi le malama sili atu e uiga i le natura o le Aiga Atua ma o Latou faamoemoega. Faatasi ai ma lenei malamalama, e faatupulaia lo tatou faatuatua ia i latou ma e faateleina lo tatou manao e tausia latou poloaiga.

Aemaise lava, e fesoasoani le Mataupu Faavae ma Feagaiga ia i tatou e aoao e uiga ia Iesu Keriso aua e na te aoaoina mai upumoni mamana e faatatau i “Lona paia, Lona mamalu, Lona atoatoa, Lona alofa, ma Lona mana togiola” (faatomuaga i le Mataupu Faavae ma Feagaiga). O lenei tusi o faaaliga o aso nei o loo aofia ai le valaaulia a le Alii e “aoao ia te au, ma faalogo mai i au upu” (MF&F 19:23). E na te mafai ona faalolotoina lo tatou malamalamaaga ia te Ia, lo tatou sootaga ia te Ia, o mea Na ia faia mo lo tatou togiolaina, ma mea Na te faamoemoe mai ia i tatou.

I le Mataupu Faavae ma Feagaiga, e mafai ona tatou faalogo i le siufofoga a Iesu Keriso.

O le Mataupu Faavae ma Feagaiga e le o se tusitusaiga paia anamua ae o loo i ai faaaliga na tuuina atu ia Iosefa Samita ma ana suli i lo tatou olaga o ona po nei. Ua faalogoina le siufofoga a Iesu Keriso o loo fetalai e fai ma sui o le Tama.¹ O le siufofoga muamua a le Alii o Iesu Keriso ua faatele ona faamauinā soo i le Mataupu Faavae ma Feagaiga i lo le Feagaiga Fou, Tusi a Mamona, ma le Penina Tautele tuufaataasi.²

MF&F 18:33–35 “Ma o Au, o Iesu Keriso, lo outou Alii ma lo outou Atua, ua tautala atu i nei mea. O nei upu ua le mai tagata . . . , ae ua mai ia te au; . . . o lou leo lea o loo tautala atu ia upu ia te outou.”



Sa maua e Iosefa Samita le tele o faaaliga mai le Faaola.



UA FAALI MA LE AUU I LE MALUMALU O KATELANI SAUNIA E DEI PARSON

Sa vaai Iosefa Samita ma Oliva Kaotui ia Iesu Keriso i le Malumalu i Katelani.

O loo i ai i le Mataupu Faavae ma Feagaiga ni tala o i latou na vaai i le Atua

O se taunuuga o le Muai Faaaliga i le 1820, sa maua ai e le tama o Iosefa Samita le malamalamāaga muamua o le i ai o le Tama ma le Alo. Ua faamaumauina e le Mataupu Faavae ma Feagaiga ni faataitaiga faaopoopo na vaaia e le Perofeta ma isi le Tama ma le Alo i ni faaaliga po o ni faailooga faaletagata lava ia. O nei tala ua avea o ni molimau o aso nei mo i tatou e faapea, o loo soifua i laua ma o loo Laua taitaia le Toefuataiga o le talalelei.

MF&F 76:19–23 Sa vaaia le Tama ma le Alo i se faaaliga ia Fepuari 1832.

MF&F 137:1–3 Sa vaaia le Tama ma le Alo i se faaaliga ia Ianuari 1836.

MF&F 110:2–4 O le leova silisili, o Iesu Keriso, sa faaali mai ia Aperila 1836.

E fesoasoani le Mataupu Faavae ma Feagaiga ia i tatou e aoao e uiga i le Atua le Tama

Sa aoao mai le Perofeta o Iosefa Samita: "A tatou malamalama i uiga o le Atua, ma le ala tatou te o mai ai ia te Ia, o le a amata ona Ia tatalaina mai le lagi ia i tatou. . . . A ua tatou saunia e o mai ia te Ia, ua Ia saunia foi e afio mai ia i tatou."³ E fesoasoani le Mataupu Faavae ma Feagaiga ia i tatou e latalata atili i le Tama Faalelagi e ala i le aoaoina e uiga i Lona natura, uiga, ma faamoemoega.

MF&F 20:12, 17-18 O le Atua le Tama e faavavau ma e le mafeliuai.

MF&F 76:20, 23 O le Tama ma le Alo o ni peresona mavaevae.

MF&F 93:3-5 O le Tama ma le Alo e tasi i laua.

MF&F 130:22 Ua i ai i le Tama ma le Alo ni tino o aano ma ivi.

MF&F 138:3-4 E alofa le Tama Faalelagi i Lana fanau, o le a sa la auina mai ai Lona Alo e laveai tagata.

FAAMATALAGA MAI UA VAAI MOSE IA IELOVA, SAUNIA E JOSEPH BRICKEY



Sa talanoa leova (Iesu Keriso) ia Mose faafesagai.

E fesoasoani le Mataupu Faavae ma Feagaiga ia i tatou e aoao e uiga ia lesu Keriso

O Iesu Keriso o le Ulumatua o fanau agaga uma a le Tama Faalelagi. I le muai olaga, sa maua e Iesu le malamalama ma le mana uma ma sa fai ma sui o le Tama i le avea ai o se Foafoa o lalolagi. E ala i Lona mana paia, o le Alii o Iesu Keriso o le puna o le malamalama ma le ola mo Ana foafoaga uma. Ua faamanino mai e le Mataupu Faavae ma Feagaiga le tele o Ana matafaioi i le fuafuaga a le Tama.

MF&F 93:21 O Iesu Keriso o le Ulumatua o fanau agaga uma a le Atua.

MF&F 38:1-3 Sa maua e Iesu Keriso le malamalama uma ma le mana a o lei foafoaina le lalolagi.

MF&F 76:24 Sa avea Iesu Keriso ma sui o le Tama i le avea ai o le Foafoa o lalolagi.

MF&F 88:6-13 O Iesu Keriso o le puna o le malamalama ma le ola mo Ana foafoaga uma.

MF&F 45:11; 136:21, 22 O Iesu Keriso o le leova silisili o le Feagaiga Tuai.

MF&F 43:34 O Iesu Keriso o le Faaola o le lalolagi.

MF&F 18:11-13; 20:21-25 Sa pagatia Iesu Keriso, sa faasatauroina, maliu, ma sa toe tu mai.

MF&F 29:10-12 Sa folafola mai Iesu Keriso e toe afio mai i le lalolagi ma le mana ma le mamalu.



A o fetogi i maa ina ia maliu ai, sa vaai Setefano i le Tama ma le Alo.



E ala i faaaliga faaonapo nei, e mafai ona tatou aoao pe faapefeca ona avea atili e pei o le Tama ma le Alo.

E fesoasoani le Mataupu Faavae ma Feagaiga ia i tatou e aoao mea ua faamoemoe i ai le Tama ma le Alo mai ia i tatou

E sili atu i lo seisi tusi o tusitusiga paia, e faamaninoina e le Mataupu Faavae ma Feagaiga po o le a le ola e faavavau: ia toe foi atu e nonofo faatasi ma le Tama ma le Alo, ma maua uma mea o loo i le Tama, ma avea e pei o i Laua. E na te tau mai foi ia i tatou le ala ua mafai ai e Iesu Keriso, e ala i Lana Togiola ona mafaia lenei mea ma mea e manaomia ona tatou faia e faataunu ai mea e manaomia ua Ia faatulagaina. E faaopoopo i ai, tatou te aoao i le Mataupu Faavae ma Feagaiga le uiga o le mulimuli i faataitaiga a Iesu Keriso, talu ai, e pei o i tatou, sa lei maua e Iesu Keriso le atoatoa i le taimi muamua ae sa maua le alofa tunoa seia oo ina maua e Ia le mana uma ma le mamalu.

MF&F 1:32; 19:16–19; 58:42–43; 95:1–2 Ua ofoina mai e le Faaola le faamagaloga ia i latou e salamo.

MF&F 20:37, 41, 72–74; tagai foi **33:11** Ua valaaulia e le Aiga Atua i latou o e talitonu ia maua le papatisoga ma le Agaga Paia.

MF&F 84:19–21 E ala i sauniga o le Perisitua Mekisateko, ua faaali mai ai le mana o le amioatua.

MF&F 93:12–14, 16–17 Sa maua e lesu Keriso le alofa tunoa mo le alofa tunoa seia oo ina la mauaina le atoatoa.

MF&F 20:30–31 E tuuina atu e le Faaola le alofa tunoa ia i latou o e alolofa ma auauna atu ia te la.

MF&F 35:2; 50:40–43 E mafai ona tatou tasi ma le Tama ma le Alo.

MF&F 93:19–20 E mafai ona tatou mauaina le mamalu ma le atoatoa a le Tama.

E tuuina mai e le Mataupu Faavae ma Feagaiga se mamanu mo le mauaina o le malamalama faaleagaga

E faaopoopo i le aoao atu ma le molimaunia o le Tama ma le Alo, ua tuuina mai e le Mataupu Faavae ma Feagaiga se mamanu e maua ai le malamalama faaleagaga e uiga i sui uma o le Aiga Atua e ala i le fesoasoani a le Agaga Paia: suesue i afioga a le Alii, ole atu i le Tama Faalelagi mo le malamalamaaga, ma faatino le faatuatua ia Iesu Keriso e ala i le usitai i Ana poloaiga.

Ua folafola mai le malamalama ma le upumoni ia i latou o e ola e tusa ai ma afioga uma a le Alii. E taua le aoao o faamatalaga e uiga i le natura o le Aiga Atua ma o Latou faamoemoega. O lenei malamalama e mafai ona taitai atu i le sailiga filiga mo le malamalamaaga faaleagaga ma le talitonuga o le upumoni. O lenei malamalama e faamautu mo i tatou o silafia patino i tatou e le Tama Faalelagi ma Iesu Keriso, e La te alolofa ia i tatou, ma La te finagalo e faamanuia i tatou i le ola e faavavau.

MF&F 6:5; 76:5-10, 114-118 E finagalo le Tama


Faalelagi ia i tatou ia ole atu mo le malamalama ma folafola mai e faasoaina mai.

MF&F 84:43-48 Ua aoao mai e le Tama i tatou pe a tatou gauai atu ma le filiga i Ana afioga.

MF&F 88:118 Saili le aoaoina e ala i le suesue ma e ala i le faatuatua.



E mafai e le suesue ma le tatalo ona tatala le malamalama faaleagaga.



Sa faailoa mai e Iosefa Samita ia uiga ma faamoemoega o le Tama ma le Alo.

Faaiuga

E fesoasoani le Mataupu Faavae ma Feagaiga ia i tatou e latalata atili i le Tama Faalelagi ma Lona Alo Pele e Toatas, o Iesu Keriso, e ala i le faaalia o o Latou uiga ma o Latou faamoemoega. Sa aoteleina e le Perofeta o Iosefa Samita le mafuaaga e mafai ai ona tatou faatuatua ma faalagolago i le Atua: “O fuafuaga a lo tatou Atua e maoae, o Lona alofa e le mafaatusalia, o Lona poto e faavavau, ma Lona mana e le gata; o le mea lea, e tatau ai i le Au Paia ona olioli ma fiafia, i le iloa ai ‘o lenei Atua, o lo tatou Atua lava’ (Salomo 48:14).”⁴ ■

FAAMATALAGA

1. Sa faamatalaina e Peresitene Iosefa Filitia Samita (1876–1972): “O faaialiga uma talu mai le pau na oo mai e ala ia Iesu Keriso, o le Ieova o le Feagaiga Tuai. I tusitusiga paia uma, lea e taua ai le Atua ma le nofoaga sa ia faaali mai ai, o Ieova lena. . . . E lei toe talanoa sao lava pe patino le Tama ma le tagata talu mai le pau, ma e lei faaali mai lava sei vagana le faailoaina mai ma molimau i le Alo” (*Doctrines of Salvation*, comp. Bruce R. McConkie, 3 vol. [1954–56], 1:27).
2. Tagai Gordon B. Holbrook, “The Voice of Jesus Christ in the Doctrine and Covenants,” *Ensign*, Sept. 2013, 40, 45 (note 2).
3. *Aoaoga a Peresitene o le Ekalesia: Iosefa Samita* (2007), 40–41.
4. *Aoaoga: Iosefa Samita*, 42.

GORDON B. HINCKLEY:
O SE PEROFETA EI
AI SE TALITONUGA
OLE A LELEI
MEA UMA MA SE
VAAIGA MAMAO

Ao e suesue i le Aoaoga a Peresitene o le Ekalesia: Gordon B. Hinckley i le au perisitua ma le Aualofa i lenei tausaga, o le a e aoao mai se perofeta e maoae lona talitonuga o le a lelei mea uma, alofa, ma se vaaiga mamao.



O Gordon B. Hinckley na soifua mai i le aso 23 Iuni, 1910, ia Bryant Stringham Hinckley ma Ada Bitmer Hinckley. Sa faaipoipo ia Marjorie Pay i le Malumalu o Sate Leki i le aso 29 Aperila, 1937, ma sa avea i laau o ni matua i se fanau e toalima. Sa avea o ia ma Peresitene lona 15 o le Ekalesia mai le aso 12 Mati, 1995, e oo i le aso 27 Ianuari, 2008.

Saunia e Andrew D. Olsen

Matagaluega o Auaunaga o le Lomiga a le Ekalesia

Sa ou totoina ni laau i tautotogo taitasi,” na faamaumauina e Peresitene Gordon B. Hinckley i lana api talaaga i le 82 o lona soifua. “Masalo na ou faia lenei mea mo le le itiiti ifo ma le 50 tausaga mulimuli. . . . E i ai se mea matagofie e uiga i se laau. E amata mai i le laitiiti ma tuputupu ae i le aluga o vaitau. E saunia le faapologa mai le la vevela o le taumafanafana. E fua mai ai ni fua suamalie. E faaauauina le faagasologa o le photosynthesis. . . . O le laau o se tasi lea o foaoaga ofoofogia a le Silisiliese.”¹

Sa faaauau pea ona totoina e Peresitene Hinckley ia laau e oo lava i le vaitau o lona 90. I le tele o itu, o lona fiafia e toto ia laau na atagia mai i lana auaunaga o se Apostolo ma se Peresitene o le Ekalesia. A ia totoina se laau, o se faaialiga lea o le a lelei mea uma, o se uiga lea sa avea foi ma se vaega o ana aoaoga ma fegalegaleaiga ma isi. Sa ia faafaaileleina laau taitasi, e pei ona ia faia i tagata taitasi. Ma sa ia vaai mamao atu lava i le lumanai, iloa atu po o le a le tulaga o le a



i ai ia laau—e pei lava ona ia vaai atu i gafatia paia o tagata taitasi ma le lumanai maoae o le galuega a le Atua.

“O Loo la I Tatou Mafuaaga Uma e Tatau ai Ona Talitonu o le a Lelei Mea Uma”

“O au o se tagata e talitonu o le a lelei mea uma!” E masani ona folafola mai e Peresitene Hinckley. “O lau talosaga ia taofi le suesue

masei ae ia faateleina le fiafia i le lasusulu.”²

O lona talitonuga o le a lelei mea uma na sili atu le loloto nai lo le i ai o se vaaiga lelei, e ui na ia atinaeina lena tulaga. O le punaoa silisili o lona talitonuga o le a lelei mea uma—o le punaoa na alai ona mamana—o lona faatuatua i le Atua ma lana molimau i le fuafuaga o le fiafia ma le faaolataga a le Atua mo lana fanau.

O se tasi o faaialiga o le talitonuga lelei o Peresitene Hinckley o lona talitonuga maumaututu faapea “o le a lelei mea uma.”³ O lena fuaiteau, na saunoa ai Elder Jeffrey R. Holland o le Korama a Aposetolo e Toasefululua, “e masalo o le faamautinoaga fai soo lava lenei a Peresitene Hinckley i aiga, uo, ma aumea. ‘Taumafai pea,’ o le a ia fai mai ai. ‘Ia talitonu. Ia fiafia. Aua le faavaivai. O le a lelei mea uma.’”⁴

Ae peitai, o lenei savali sa le na o mo isi. “Sa ou fai ifo ai ia te au lava i taeao taitasi,” sa tau atu e Peresitene Hinckley i se faapotopotoga. “Afai e te faia le mea sili, o le a manua mea uma. Tuu atu lau faalagolago i le Atua,

ma agai atu i luma ma le faatuatua ma le talitonuga mo le lumanai. O le a le tuulafoaiina lava i tatou e le Alii.”⁵

O le talitonuga a Peresitene Hinckley o le a lelei mea uma na lagolagoina o ia i ona luitau, lagona o le le atoatoa, ma avega lofituina. Ma sa ia tu atu mo lona talitonuga “o le a lelei mea uma” e oo lava pe a oo mai ni faigata ma faanoanoaga, lototiga ma le tuua toatasi.

I ona talitonuga o le a lelei mea uma, sa lei faaititia ai faafitauli a Peresitene Hinckley. Sa ia faamatala mai: “Ua ou vaai i le tele o feutagaiga lelei o lenei lalolagi. . . . Na ou i ai i vaega o loo i ai ttau ma fevaevaeaina i loto o tagata. Ua ou vaai i le mafuaaga o le mativa o loo aafia ai le tele o atunu. . . . Ua ou nofota i amioga e pala a lo tatou nei lalolagi.

“Ae peitai ou te vaai lava au i le itu lelei. E i ai sou faatuatuga tonu ma faigofie o le mea sao o le a faaeaina ma o le upu moni o le a manumalo.”⁶

I se faatalanoaga ma se failipoti o le *New York Times* i Navu, Ilinoi, ISA, sa faailoa atu ai e Peresitene Hinckley le tulaga masani o faigata ma faafitauli, ona ia faamatalaina lea o lona fiafia i talafaasolopito o le Eklesia e aoao atu ai e uiga i le talitonuga o le a lelei mea uma:

“O loo ia i tatou mafuaaga uma e tatau ai ona talitonu o le a lelei mea uma. . . . Silasila i Navu. Silasila i mea sa latou fausia iinei i le fitu tausaga ona o ese ai lea. Ae o a a latou mea na fai? Pe na latou taooto i lalo ma maliliu ai? Leai! Sa latou galulue! Sa latou masii atu i le isi afa o lenei konetineta ma faaliliuina le palapala o le toafa ma faia ia fua mai e pei o le aute. I luga o lena faavae ua tuputupu ae ai lenei eklesia i se faalapotopotoga maoae i le lalolagi atoa ua aafia mo le lelei ia olaga o tagata i le silia ma le 140 atunu. E le mafai ma e te le, atiaeina se mea mai le masalosalo ma le le talitonu. E te vaavaai atu ma le talitonu o le a lelei mea uma, galue ma le faatuatua, ona tutupu ai lea o mea.”⁷

Na aafia e le talitonuga o Peresitene Hinckley o le a lelei mea uma ona lagona fai mea malie—o se tagata e fiafia ma malie lea e atinaeina ni fegalegaleaiga ma isi. I se tasi taimi sa ia nofo ai i se peresitene o se siteki o lona aiga e nonofo

i se faleaoga tuai lea na latou faaliliuina i se fale. I lena po, sa avea le potuaoga ma potumoe a Peresitene Hinckley. I le taimi o le konafesi a le siteki i le aso na sosoo ai, sa ia fai mai ma le malie, “I le tele naua o taimi sa ou moe ai i potuaoga ae—ou te lei moe lava i se moega.”⁸

“O Lo Matou Popolega e Ao Lava ona I Ai lea i le Tagata e Toatasi”

I lana uluai saunoaga i le konafesi aoao i le avea ai ma Peresitene o le Eklesia, sa talanoa aoao mai ai Peresitene Ezra Taft Benson e uiga i le eseesega o le va o le faamaualuga ma le lotomaualalo: “Ua avea i tatou ma se faalapotopotoga toatele i le lalolagi,” na ia saunoa ai. Ona ia suia lea o le faamamafa i le mataupu faavae taua lenei: “O o tatou mafaufau ma popolega, e ao lava ona i ai lea i le tagata e toatasi. . . .

“. . . Tatou te talanoa ai i fuainumera, ae o a tatou taumafaiga uma e ao lava ona tuuto atu i le atinaega o le tagata e toatasi.”⁹

Ao avea ai ma se tasi o le Korama a Aposetolo e Toasefululu, sa femalagaai Peresitene Hinckley i nisi o eria e sili ona maotua i le lalolagi, e aofia ai

ma nofoaga o taua, e auauna atu i tagata taitoatasi. Sa leai se vaega ua mamao tele pe laitiiti tele i lana vaaiga. Sa ia faaauau pea i lenei lava ala o se Peresitene o le Eklesia, femalagaai mo le silia ma le fia miliona o maila i le silia ma le 60 atunu, o nisi taimi e feiloi ai ma se vaega toatele, o nisi foi taimi mo na o sina vaega toalaiti.

I le 1996, sa faimalaga ai Peresitene ma Sister Hinckley mo le 18 aso i atunu e valu i Asia ma le Pasefika. Na amata i Iapani ma agai atu ma le saoasaoa malosi, sa la feiloi i le faitau afe o tagata o e na faatumulua nofoaga taitasi. “O ni aafiaga faagaeetia nei mo a’u,” na faamaumauina e Peresitene Hinckley ao i ai i Korea. “Na ou vaai i ni mea e seasea ou mafaufau ou te miti i ai ina ua ou faatoa oo mai iinei i le 1960.”¹⁰ O le malaga foi lenei sa ia faapaia ai le Malumalu o Hong Kong Saina.

O le nofoaga mulimuli faatulagaina o Filipaina. Ina ua uma ona talanoa atu i tagata e 35,000 i Manila, sa



faamaumauina e Peresitene Hinckley, "Sa ou tu ma talotalo atu ia i latou ma se faalogona malosi i lo'u loto. Sa ma o ese mai ma loimata i o maua mata." O le taeao o lena aso sa ia toe asia ai le nofoaga lea, i le 1961, sa ia tuuina atu ai le tatalo o le faapaiaga e amatalia ai le galuega faamisiona i Filipaina. "Sa na o le toatasi lava se tagata Filipino muamua o le ekalesia na mafai ona ma mauaina," sa ia toe manatua-ina. "Mai lena tagata e toatasi ua faatupulaia le Ekalesia i le silia ma le 300,000 tagata o le ekalesia."¹¹


Ina ua amata le faigamalaga a le au Hinckley e toe foi mai i le aiga, sa la iloaina e utu le vaalele i le motu o Saipani. Sa fesili Peresitene Hinckley pe i ai ni faifeautalai i Saipani ma sa tau atu i ai e i ai si vaega toalaiti. E ui sa la i ai i le faiuga o se faigamalaga le lavava, sa ia fia feiloai ma nai na faifeautalai: "Sa ou fesili pe ono mafai ona faailoa atu ia i latou o le a matou tulauelolee i Saipani pe tusa o le 7 i le afiafi ma o le a taumafai e o atu i fafo i le malaevaalele e feiloai ma i latou."

I nai itula mulimuli ane, i Saipani, e toa 10 faifeautalai ma e pe tusa ma le 60 tagata o le Ekalesia sa i ai iina e faafeiloai le au Hinckley. "Sa latou opomauina i maua," na faamaumau ai e Peresitene Hinckley. "Sa faafetai tele i latou e vaai ia i maua, ma sa ma faafetai foi e vaai ia i latou. Sa na o sina taimi puupuu lava sa mafai ona matou faaaluina ma i latou aua sa na o sina taimi puupuu lava e utu ai le vaalele. Sa ma faamanuia atu ia i latou ma toe foi i le vaalele."¹²

O se isi faataitaiga masani o le popole o Peresitene Hinckley mo se tagata na tupu i le Olimipeka o le Taumalulu i le 2002, lea na faia i le Aai o Sate Leki, Iuta. E toetoe lava o aso uma sa ia feiloai ai ma peresitene, amepasa, ma isi taitai aloaia. I se tasi aso, e lei leva lava ona fono ma le peresitene o Siamani, sa ia feiloai ai ma se tamaitai talavou e 13 tausaga i lona aso fanau. "Sa maua [o ia] i le ma'i o le vaivai o le toto, o se ma'i tuga tele," sa ia tusia ai. "Sa manaia le ma feiloaiga. . . . Sa ou tau atu ia te ia o le a matou manatuaina o ia ia matou tatalo."¹³

Sa i ai ia Peresitene Hinckley se alofa faapitoa mo tamaiti ma le autalavou a le Ekalesia, ma sa faapea foi o latou lagona mo ia. Ina ua uma ona latou faalogo ia te ia o lauga i Pasila, sa faailoa mai e se tasi o tamaitai talavou: "Sa malosi lo'u lagonaina o le Agaga o le Atua. Ina ua faaiu e Peresitene Hinckley lana saunoaga, sa ia saunoa mai ia i matou, 'E mafai ona tou tuua iinei, o i le fame, ma faagalo mea uma na ou fai atu ai iinei i le aso, ae aua lava nei galo ou te alofa ia te outou.' O le a le galo ia te au na upu."¹⁴

Sa avea le faletua o Peresitene Hinckley, o Marjorie, o se paaga ma se faatosinaga mo lona popolega mo tagata tai-toatasi. Sa ia faamaumauina: "E foliga mai o tagata uma lava na te [Marjorie] silafaina e alolofa ia te ia aua e faamaoni lona naunau atu i tagata. E popole o ia mo o latou faafitauli



Mai le agavale i le taumau-tau i luga: O Peresitene Hinckley o loo feiloai atu i tagata o le ekalesia; faatasi ai ma lona faletua, o Marjorie, i Hong Kong, i Saina; o loo mafaufau i le konafesi aoao.

ma o latou manaoga. O se faamanuiaga mo a'u le i ai o se soa faapea."¹⁵

Ina ua matutua le la fanau e toalima, e masani lava ona faimalaga faatasi le au Hinckley, ma e aapa atu Sister Hinckley ma le alofa i le salafa o le lalolagi. A ia feiloai i ni faifeautalai, e masani ona ia faateia o latou matua i se valaau atu i le telefonu pe a ia toe foi atu i le fame. O ia foi o se tagata talenia i le faafesootaiga ma ni tagata maimoa se toatele. "E silafia lelei e [Marge] upu e fai atu e faafafia ai ma fesoasoani i tagata," na faamaumau ai e Peresitene Hinckley ina ua maea se konafesi faarisone. "O le toatele o i matou e talai atu ao ia e na o le talanoa atu ia i latou."¹⁶

I le falelauasiga o Peresitene Hinckley, sa aoteleina ai e se tasi o ona fesoasoani, o Peresitene Henry B. Eyring, nisi mea na ia faia. Ona ia matauina lea o nei mea uma na ia faia e tasi lava se mea e tutusa ai:

"O taimi uma lava sa [faia ai] ina ia faamanuia ai tagata taitoatasi i se avanoa. Ma o taimi uma sa mafaufau ai ia i latou e tau le maua ni avanoa, o tagata masani o loo tauivi e taulima faigata o le olaga i aso taitasi ma le luitau o le ola ai i le talalelei a Iesu Keriso. E silia i le faatasi ona ia popoina



Mai le agavale i le taumatau i luga: O Peresitene Hinckley i le Malumalu o Massachusetts Boston; fegalegaleaiga ma tala fou o ala o faasalalauga; faatasi ai ma tagata o le eklesia i Ghana.

lou fatafata i lona tamailima pe a ou tuuina atu se fautuaga ma faapea mai, 'Hal, na e manatua le tagata o loo tauivi?'"¹⁷

Vaaiga Mamao mo le Lumana'i

O le talitonuga a Peresitene Hinckley o le a lelei mea uma ma lana taulai atu i tagata taitoatasi e fesootai lea ma lana vaaiga mamao faaperofeta mo le lumana'i. O le aupito sili ona ttau, o lena vaaiga mamao e aofia ai malumalu. O sauniga o le malumalu, na faamamafa mai e Peresitene Hinckley, o "faamanuiaga aupito maualuga e ofoina atu e le Eklesia."¹⁸

Ina ua avea o ia ma Peresitene o le Eklesia i le 1995, e 47 malumalu na faaaogaina i le lalolagi atoa. I lalo o lana taitaiga, ua sili atu ma le faaluaina e le Eklesia lenei fuainumera i le na o le silia ma le lima tausaga. O lana vaaiga mamao e faatatau i malumalu sa lototoa ma matua tele lava, ae o le faamoemoega atoa lava o le faamanuia auauai lea o tagata taitoatasi.

O le uunaiga mo lenei vaitau fou o le fausiaina o malumalu na oo mai i le 1997 ina ua malaga atu Peresitene Hinckley i Colonia Juárez, Mekisiko, e faamanatu le 100 tausaga o le aoga a le Eklesia. Mulimuli ane, i le taimi o se tietiega umi ma le pefua, sa ia mafaufau ai. "Sa amata ona filemu," na manatuaina e lana failautusi, o Don H. Staheli. "Ona amata lea, e pei ona ou iloaina, ona o mai faaaliga. Sa ia mafaufau e uiga i malumalu laiti i le taimi ua tuanai, ae e le o le auala lea na ia mafaufau ai i le taimi lea."¹⁹

Sa faamatalaina mulimuli ane e Peresitene Hinckley le faagasologa: "Sa amata ona ou fesili ifo ia te au lava ia po o le a le mea e mafai ona faia mo nei tagata ina ia i ai se malumalu. . . . A o ou mafaufau i lenei mea, sa oo mai se manatu i lo'u mafaufau faapea . . . e mafai ona tatou fausia vaega taua uma o se malumalu i se fale laitiiti lava. . . . Sa ou tusia se ata o le fuafuaga. . . . Sa matua manino lava le oo mai o le ata i lo'u mafaufau. Ou te talitonu ma lo'u loto atoa sa avea ma se musumusuga, o se faaaliga mai le Alii. Sa ou toe foi mai ma talanoa ma ou fesoasoani e uiga i ai, ma sa la faamaoniaina. Ona ou folasiaina atu lea i le Toasefululua, ma sa latou faamaoniaina."²⁰

Fa masina mulimuli ane i le konafesi aoao, sa faia ai e Peresitene Hinckley se faasilasilaga faasolopito o le a amata ona fausia e le Eklesia ni malumalu laiti i eria lea e le lava ai tagata o le eklesia e faaaogaina ni malumalu tetele atu. "Ua tatou naunau . . . e avatu malumalu i tagata ina ia latou maua ai avanoa uma mo faamanuiaga taua e maua mai i le tapuia i le malumalu," sa ia saunoa ai.²¹

I le konafesi aoao na sosoo ai, sa faia ai e Peresitene Hinckley se isi faasilasilaga faasolopito, sa ia saunoa ai i le agai i luma o fuafuaga ina ia i ai ni malumalu e 100 e faaaogaina i le faaiuga o le tausaga e 2000. "Ua tatou agai atu i se saoasaoa tatou te lei vaaia lava muamua," sa ia saunoa ai.²² Ina ua ia lipotia mai le faagasologa o le fausiaina o malumalu ia Aperila 1999, sa ia faaaogaina se fuitau masani: "O se galuega tele nua lenei, ma o loo i ai le tele o faafitali, ae e tusa lava po o le a le faigata, o le a lelei mea uma ma ou te mautinoa o le a tatou ausia la tatou sini."²³

Ia Oketopa 2000, sa malaga ai Peresitene Hinckley i Boston, Masatusa, ISA, e faapaia le malumalu lona 100 a le Eklesia—o se tasi o le 21, sa ia faapaaina i lena tausaga i konetineta e fa. Na oo atu i le faaiuga o lona soifuaga, ua 124 malumalu ua maea ma le isi 13 ua faasilisa atu pe o loo fausiaina.

O le vaiga mamao a Peresitene Hinckley mo le lumai na uunaia o ia ina ia saili se musumusuga e uiga i nisi auala e faamanuia ai fanau a le Atua. Sa ia tiga i mafatiaga ma le le tagolima sa ia vaia, o lea na ia faatonuina ai le faalauaiteleina atu o le galuega alofa a le Ekalesia, aemaise lava ia i latou e le ni tagata o le Ekalesia. Sa ia faavaeina foi le Tupe Faaagaaga mo Aoga e fesoasoani i tagata o le Ekalesia i atunu e le tagolima. E mafai ona latou faia ni nonogatupe mai lenei tupe e totogi ai aoga latou te manaomia ina ia maua ai ni galuega lelei, lea e mafai ona fesoasoani ia i latou e taofia ai sootaga o le mativa ma ia ola tutoatasi. E oo atu i le 2016, ua silia ma le 80,000 tagata ua mauaina le avanoa po o aoaoga po o aoaoga faalematata ona o nonogatupue mai lenei tupe.

O le tele o isi faataitaiga o le vaiga mamao faaleperofeta a Peresitene Hinckley , e pei o le “O Le Aiga: O Se Folafolaga i le Lalolagi” ma le fausiaina o le Nofoaga Autu mo Konafesi, o loo aofia i le *Aoaoga a Peresitene o le Ekalesia: Gordon B. Hinckley*.

“O La’u Molimau”

I nai aso ao lei oo i lona aso fanau lona 91, sa tusia ai e Peresitene Hinckley: “E le manaomia ona ou toe toto, ae o



FAAMATALAGA

1. Apitalaaga a Gordon B. Hinckley, 22 Mati, 1993.
2. Gordon B. Hinckley, *Standing for Something: Ten Neglected Virtues That Will Heal Our Hearts and Homes* (2000), 101.
3. *Aoaoga a Peresitene o le Ekalesia: Gordon B. Hinckley* (2016), 74.
4. Jeffrey R. Holland, “President Gordon B. Hinckley: Stalwart and Brave He Stands,” *Ensign*, June 1995, 4.
5. *Aoaoga: Gordon B. Hinckley*, 358.
6. I le Conference Report, Oke. 1969, 113.
7. *Aoaoga a Gordon B. Hinckley* (1997), 412.
8. Apitalaaga, Nov. 4, 1973.
9. *Aoaoga: Gordon B. Hinckley*, 314–15.
10. Apitalaaga, 22 Me, 1996.
11. Apitalaaga, 30 Me, 1996.
12. Apitalaaga, 1 Iuni, 1996.
13. Apitalaaga, 22 Fep., 2002.
14. I le “Na Saunoa Atu le Perofeta i le Autalavou,” *I Saafiafiga Mo: Peresitene Gordon B. Hinckley, 1910–2008* (o se faaopoopoga i le *Liahona*, Aperila 2008), 15.
15. Apitalaaga, 23 Nov., 1974.
16. Apitalaaga, 14 Me, 1995.
17. Henry B. Eyring, i le *Aoaoga: Gordon B. Hinckley*, 213.
18. I le *Aoaoga: Gordon B. Hinckley*, 330.
19. Don H. Staheli oral history transcript (2012), 85, Church History Library.
20. Apitalaaga, 6 Mati, 1999 O lenei faamatalaga o se aotelega lea o ana saunoaga i le uluai sauniga o le faapaiaga o le Malumalu o Colonia Juárez Mekisiko. Sa mafaufa Peresitene Hinckley i le mataupu o malumalu laiti mo le silia ma le 20 tausaga (tagai *Aoaoga: Gordon B. Hinckley*, 33, 325–27).
21. Gordon B. Hinckley, “O Ni Nai Mafauauga E Uiga I Malumalu, Faatumauina o Tagata Liliu Mai, Ma Le Galuega Faafeautalai,” *Liahona*, Ian. 1998, 61–65.
22. *Aoaoga: Gordon B. Hinckley*, 327.
23. Gordon B. Hinckley, “E Agai Pea i Luma le Ekalesia,” *Liahona*, Iulai 1999, 4.
24. Apitalaaga, 18 Iuni, 2001.
25. *Aoaoga: Gordon B. Hinckley*, 339–40.

le a ou faia pea. O lo’u natura lena.”²⁴ Po o le a lava lona matua, po o se faifeautalai talavou po o se perofeta e 97 tausaga le matua, o lona lava natura o le totoina o fatu o le talalelei i loto o tagata i le salafa o le lalolagi. Sa ia auauna atu mo le 20 tausaga o se tasi o le Korama a Apostetolo e

Toasefululua. Ona ia auauna atu lea mo le 14 tausaga o se fesoasoani i le Au Peresitene Sili. Ina ua avea o ia ma Peresitene o le Ekalesia i le 84 o ona tausaga, sa ia taitaia i le toeitiiti atoa ai o le 13 tausaga o le tuputupu ae malosi.

O le vaega taua o le soifuaga galue o Peresitene Hinckley o lana molimau lea ia Iesu Keriso ma i Lana talalelei toefuataiina lea na ala mai i le Perofeta o Iosefa Samita. I se saunoaga o le konafesi aoao na faaautuina “O La’u Molimau,” sa ia faailoa mai ai ia molimau nei, na saunoa ai nisi vaega ma loimata:

“I mea uma o loo ou lagona ai le lotofaafetai i lenei taeao, e tasi o loo tumatilatila lava lona silisili naua. O se molimau ola lena ia Iesu Keriso. . . .

“*O Ia o lo’u Faaola ma lo’u Togiola*. E ala i le tuuina mai o Lona soifua i le tiga ma le puapuaga lemafaamatalaina, na Ia aapa mai ai i lalo ma sii ae au, ma i tatou uma taitoatasi, ma atalii ma afafine uma o le Atua mai le loloto le mafuatiaina o le pogisa e faavavau pe a mavae le oti. . . .

“*O Ia o lo’u Atua ma lo’u Tupu*. Mai le vavau e oo atu i le faavavau, o le a nofotupu o Ia ma pule o le Tupu o Tupu ma le Alii o Alii. I Lana pule o le a leai se iuga. I Lona mamalu o le a leai se pouliuli. . . .

“I le agaga faafetai, ma le alofa e le faaititia, ou te molimau atu ai i nei mea i Lona suafa Paia.”²⁵ ■





Saunia e Elder
Christoffel
Golden
O Le Fitugafulu

Totoa

I LA TATOU MOLIMAU I LE FAAOLA

*O le a valaauiina i tatou taitoatasi e galulue i taimi
faigata ae taua. O nei taimi o le a iloa ai po o ai i tatou
ma le mea ua avea ai i tatou.*

Tle avea ai ma se alii talavou i le tele o tausaga ua mavae, sa lisiina a'u i le militeli a Aferifka i Saute. Sa tofia a'u i se vaega o fitafita o ni alii lelei ae e le lelei a latou gagana ma amioga lea e faaalia i nisi taimi e alii o loo auauna atu i le militeli.

O le siomiaina e ia ituaiga o aafiaga, sa ou iloa ai sa le faigofie i taimi uma le ola ai i tulaga faatonuina o le talalelei. Ae mai lava i le amataga o la'u auaunaga i le militeli, sa ou fiafia e tu atu mo o'u talitonuga. Sa ou faamanino atu lava o le a ou le auai lava i ni amioga ou te iloa e le sa'o. Ou te fiafia e tau atu o alii o i la'u vaega—o nisi sa tau le fiafia i le amataga—ae ua iu lava ina faaaloalo i o'u tulaga faatonuina.

I se tasi taimi, i se toalauapiga faaleaoaoga a le militeli, sa tutu ai se vaega o i matou e siomia le afi o le tolauapiga i se po matagofie, pogisa, leai ni ao, a ua faatumulia i fetu. Sa inu ai ni pia a nisi o a'u uo i la'u vaega ao inu la'u vaiinu. Sa manaia le talanoaga, e aunoa ma ni upu le talafeagai.

I le taimi o la matou evaga, sa o mai nisi alii mai le isi iunite i le matou vaega fiafia. Sa liliu mai se tasi o nei alii ia te a'u ma, i le iloaina o le vaiinu sa i lo'u lima, sa ula mai ia te a'u mo le le auai atu i alii ia sa inupia. Ae ou te lei tali atu, sa faateia a'u e se tasi o a'u uo i le ote atu i lea alii.

“E sili pe a e aluese atu loa, alii,” o lana tala lea. “Matou te le mananao e tautala faapena se tasi ia Chris! O le mea moni, ua na o ia lava le tagata i totonu o i tatou o loo ola i se tulaga o se Kerisiano moni.”

Ina ua uma ona fai atu la'u uo, sa aluese atu ma le maasiasi lena alii. I lena taimi, e ui sa ou lagona si tau matamuli i le manatu sa faafusei ona faaalia, sa ou lagona lemu le faafetai i lo'u filifili e mulimuli i le apoapoaiga a Paulo ina ia “fai oe ma faaaoao i e ua faatuatua” (1 Timoteo 4:12).

O loo e feagai foi ma filifiliga, aemaise lava i lenei taimi o lou olaga, ao ogatusa ma taliaina e lou agaga ia avanoa maoae ia o loo faatalitali mai ia te oe. O le fesili la, o le a le mea e te manao e tusi e uiga ia te oe i le 5, 10, po o le 20 tausaga—pe oo foi i le iuga o lou olaga?

O Le A Le Uiga o le la Totoa?

I se tasi o faaaliga sili ona matagofie na tusia i tusitusiga paia, na faamatala ai e le Perofeta o Iosefa Samita le tulaga o i latou o e o le a mautofi i le malo selesitila pe a uma ona toetutu ma faamasinoina. Na faaalia mai foi e lenei lava vaega i le Mataupu Faavae ma Feagaiga (vaega 76) tulaga ma nofoaga a i latou e le agavaa mo le malo selesitila ae o ni sui mo malo teresitila ma le telesitila.

O le talanoa e uiga ia i latou o e o le a mautofi i le malo teresitila, ua aoao mai ai i tatou e le faaaliga o i latou ia “o tagata mamalu o le lalolagi, o e na faatauasoina i le faitogafiti o tagata . . . [ma] o e e maua [le mamalu a le Atua], ae le o lona atoatoa” (MF&F 76:75–76). Ona tatou aoaoina lea o lenei mataupu faavae matagofie: “O i latou ia o e sa *lei totoa i le molimau ia Iesu*; o le mea lea, latou te le maua le pale iluga o le malo o lo tatou Atua” (MF&F 76:79; faaopoopo le faamamafa).

Mafaufau i lena faamatalaga mo sina taimi. Faamata o le a tatou teena le mamalu o le malo selesitila, ma ona faamanuiaga maoae ma faavavau uma, ona tatou te lei totoa i le molimau ia Iesu iinei i le lalolagi i lo tatou tulaga faataitai, puupuu ma faaletino?

O le a le uiga o le ia totoa i le molimau ia Iesu? Na folafola mai e se Aposetolo a le Alii i nei ona po:

“O le lototele ma le le fefe; o le faaaogaina o lou malosi atoa, malosiaga, ma le agavaa i le taua ma le lalolagi; e tau ai le taua lelei o le faatuatua. . . . O le maatulimanu sili o le lototoa i le faamoemoe o le amiontonu, o le usiusitai i le tulafono atoa o le talalelei atoa.

“Ina ia totoa i le molimau ia Iesu o le ‘o mai ia keriso, ma faaatoatoaina ia te ia’, ma faafiti outou lava ‘mai mea uma e le faaleatua’, ma alolofa i le Atua ma o

outou manatu atoa, mafaufau, ma ma le malosi atoa.’ (Moronae 10:32.)

“Ia ina ia totoa i le molimau ia Iesu, o le talitonu lea ia Keriso ma lana talalelei i se talitonuga le maluelue. O le iloa lea o le moni ma le paia o le galuega a le Alii i le lalolagi. . . .

“Ina ia totoa i le molimau ia Iesu o le ‘fetaomi atu [lea] i luma ma le tumau ia Keriso, ma se susulu atoatoa o le faamoemoe, ma le alofa i le Atua ma tagata uma.’ O le ‘tumau e oo i le iuga.’ (2 Nifae 31:20.) O le ola ai i la tatou tapu-aiga, ia faatino mea tatou te talai atu, ia tausi poloaiga. O le faaalia lea o le ‘amio atua’ i olaga o tagata; o le tauasiati atu i e ‘matua oti ma fafine ua oti a latou tane i o latou tiga’ ma le leoleo o i tatou lava ina nei ‘pisia mai o ia i le lalolagi.’ (Iakopo 1:27.)

“Ina ia totoa i le molimau ia Iesu, o le pulea lea o ou tuinanau ma ou manaoga, ma tutu maualuga atu i mea faaletino ma le amioleaga. O le manumalo lea i le lalolagi e pei ona faia e Ia o loo avea ma o tatou faataitaiga ma o Ia Lava ua sili ona totoa o fanau uma a lo tatou Tama. O le mama atoatoa lea, totogi a tatou sefuluai ma taulaga, faamamalu le aso Sapati, tatalo ma se faamoemoe atoa o le loto, ositaulaga mea uma ua tatou maua pe afai e manaomia mai.

“Ina ia totoa i le molimau ia Iesu o le ogatasi lea ma le Alii i mea uma. O le filifili lea e pei ona ia filifili. O le mafaufau i mea na te mafaufauina, talitonu i mea na te talitonuina, tautala i upu o le a ia faia i lea lava tulaga e tasi. O le i ai lea o le finagalo o Keriso ma ia tasi i latou ma ia faapei ona tasi o ia ma lona Tama.”¹

E tatau ona ou faaopoopoina i le taimi nei se mea sa aoaoina e lo tatou Faaola, le Alii o Iesu Keriso, i le taimi o Lana galuega faaletino i le lalolagi.

“Aua tou te manatunatu ua ou sau e avatu le filemu i le lalolagi: ou te lei sau e avatu le filemu, a o le pelu.

“Aua ua ou sau e faamasesei le tagata ma lona tama, o le tama teine foi e faamasesei ma lona tina, o le ava foi e faamasesei ma le tina o lana tane.

“E fai foi le tagata ma fili o lona aiga.



"O le e tele lona alofa i lona tama po o lona tina ae itiiti ia te au, e le aoga lea ia te au: o le ua tele lona alofa i lona atalii po o lona afafine ae itiiti ia te au, e le aoga foi lea ia te au.

"O se e le ave lona satauro, ma mulimuli mai ia te au, e le aoga lea mo au.

"O lē maua lona ola, e maumau ai ia te ia: a o lē faamau-mau i lona ola ona o au, e maua e ia" (Mataio 10:34–39).

O lo tatou faamoemoega i le olaga nei e le sili atu pe itiiti ifo nai lo le saunia ina ia toe nonofo faatasi i le silafaga a lo tatou Tama Faalelagi alofa o ni suli tutusa ma Iesu Keriso. Ua avanoa mo tagata uma lenei tulaga faamamaluina i aiga e faavavau faatasi ai ma a tatou ava po o tane ma a tatou fanau ma aiga lautele e ui lava o le a maua e nisi nei faamanuiaga pe a mavae le olaga faaletino.

O ia ituaiga faamanuiaga e manaomia ai lo tatou aveina o a tatou satauro ma tumau ma le totoa seia oo i le iuga i le molimau atu ma le auaua atu i lo tatou Alii ma le Faaola.

Saunia e Faatino

O le auala e tatau ia i tatou taitoatasi ona mulimilitai i ai ua faatumulia i avanoa e le mafaitauina faapea ma le anoanoai o luitau faigata. Ua manaomia lo tatou faia o ni faaiuga se tele i aso taitasi—o nisi e laiti ma foliga e le taua, o isi e loloto ma tumau o latou aafiaga.

O se mea moni e faigata le taliaina faapea o le a valaauina i tatou taitoatasi e faatino i taimi e faigata ma ua mama-nuina ai i tatou. O nei taimi o le a fuafuaina ai le ituaiga tagata e i ai i tatou ma le tagata ua tatou avea ai. E masani ona oo mai pe afai e le talafeagai ma lē tautaua le ola amiontonu ma le lototoa. O le a e iloaina pe a e tusia lou talaaga faapea o taimi sili ona taua o le a fetaiai ma oe o le taimi lea e te tu ai na o oe.

Sei ou faamatala atu se tala i se tasi na tu na o ia i le lotolotoi o fetauaiga tetele. O se taimi ia Novema 1838, lea na noatia ai i filifili ma faafalepuipui ai le Perofeta o Iosefa



Samita ma isi, e aofia ai Elder Pale P. Palate (1807–57) i Richmond, Misuri, ISA.

Sa faamaumauina e Elder Palate mea nei na tutupu i le taimi na faafalepuipui ai i latou:

“I se tasi po umi, sa matou taoto e pei o matou momoe seja oo ina tea le tuneva o le po, ma sa matua tiga o matou taliga ma loto a o matou faalogologo atu mo le tele o itula i tauemuga mataga, o upu masoa, o upu faifai matuia, ma gagana mataga a o matou leoleo, o Colonel Price sa avea ma o latou taitai, ao latou toe faamatalaina i le tasi ma le isi a latou galuega o le ave faamalosi o fanua, fasioti tagata, faomea, ma isi mea faapena, lea sa latou faia i le au *Mamona*’ ao i ai i Sisifo Mamao [Misuri] ma nofoaga lata ane. Sa latou faia foi ni faamatalaga faamaualuluga e ala i le faamalosia o ava, tama teine ma teine muli, ma le tafaina o faiai o alii, tamaitai ma tamaiti.

“Sa ou faalogo pea seia oo ina ou matua inoino, faateia, ma lē fiafia, ma na matua faatumulua i lagona o le ita ua faamaoniaina lea sa ou le manofo ai i lou fia tu atu i luga

e aoai ia leoleo; ae sa leai lava se tala a Iosefa, po o se isi lava, e ui sa ou taoto i ona talaane ma iloa o loo ala o ia. Sa faafusei ona tu o ia i luga, ma tautala atu i se leo o le faititili, po o le pei o le tagi o se leona, ma faapea atu, i le manino na mafai ona ou manatuaina ai, ia upu nei:

“FILEMU, outou o tiapolo o le lua o seoli. I le suafa o Iesu Keriso ou te aoai ai outou, ma faatonu outou ia fifilemu; O le a ou le ola lava i se isi minute e faalogo atu i gagana faapena. Tuu nei lava na ituaiga tala, a leai, e otu outou po o au i le TAIMI NEI LAVA!

“Sa ia le toe tautala atu. Sa ia tu maualuga i le mamalu matautia. Sa saisaitia i filifili, ae sa aunoa ma se auupega; toafilemu, toalelei ma faaaloalogia e pei o se agelu, sa tilotilo o ia i lalo i leoleo gatete, o a latou auupega sa i lalo pe na pauu i lalo o le fola; na pipii faatasi o latou tulivae, ma o e, na faapupuu i se tulimanu, po o le faapupuu foi i ona vae, ma augani mai mo lana faamagaloga, ma tumau ai i le fifilemu seia oo ina sui mai leoleo.”²



TU ATU MO MEA E TE TALITONU AI

"Tau ina ia tatou lototetele pea ma saunia e tutu mo mea ua tatou talitonu i ai, ma afai e tatau ona tatou tutu na o i tatou i le faagasologa, tau ina ia tatou faia ma le lototele, ua faamalosia e lo tatou iloa, e moni lava e le o tuua na o i tatou pe a tatou tutu faatasi ma lo tatou Tama o i le Lagi."

Peresitene Thomas S. Monson, "la Lototetele e Tu Na o Oe," *Liahona*, Nov. 2011, 67.

O le lototoa na faaalia e le Perofeta o Iosefa Samita e le faapolopoloina mo perofeta po o tagata matutua o le Ekalesia. O se mea na tupu i le soifuaga o Peresitene Iosefa F. Samita (1838–1918) na faaalia ai lenei mea. I le tau-tolu o le 1857, ina ua 19 tausaga o Iosefa F. sa tuua lana misiona i Hawaii, ISA, sa ia auai atu i se malaga a taavale toso i Kalefonia, ISA. Sa o se taimi sili lea ona lamatia mo le Au Paia. Sa agai atu le Autau a Johnston i Iuta, ma sa i ai i le toatele ni lagona le fiafia agai i le Ekalesia.

I se tasi afiafi, sa tietie atu nisi o tagata leaga i totonu o le toalaupiga o taavale toso, ma lafo atu ni upu masoa ma taufaamatau e uiga i mea o le a latou faia i soo se Mamona latou te mauaina. O le toatele o i latou sa i ai i le tolauapiga sa lalafi i totonu o pupuvao, ae sa mafaufau Iosefa F. Samita ia te ia lava: "Pe ou te sola ese ea mai nei tagata? Aisea o le a ou fefe ai ia i latou?

Faatasi ai ma lena manatu, sa ia savali sao atu loa i se tasi o tagata taufaamatau, o loo uu le fana i lona lima, lea na fai mai, "O oe o se 'Mamona'?"

Sa tali atu Iosefa F. Samita, "Ioe, alii, e o'oo'o i soo se vaipanoa o lo'u tagata, e faamaoni a'ia'i atoatoa."

O lea, na toso atu ai lona lima e le tagata taufaamatau ma faapea mai, "Ia o oe _____ o le tagata aupito sili ona lelei ua ou feiloi i ai! Malo, alii talavou, ua ou fiafia e feiloi i se tagata e puipui i ona talitonuga maumaututu."³

Ua e gauai atu nei i nisi o taimi sili ona taua o lou olaga! Ua e fatuina nei ma o le a fatuina pea, i lea taimi ma lea taimi i lea aso ma lea aso, lou lava talaaga. O le a i ai taimi o le a manaomia ai ona e faatino, ao isi mea e tutupu o le a le manaomia ai ona e faatino. O le a tele naua avanoa, o le a manaomia le faia o ni faaiuga, ma o le a fetaiai ma luitau!

I le fuafuaga o le fiafia a lo tatou Tama Faalelagi, ia manatuina pea e le o tuua lava na o oe. O le toatele i lenei olaga ma le sili atu i le lalolagi o agaga, e oo lava i lenei aso, o loo aioi atu e uiga ia outou tagi ma le Alii. Ua tele naua le malosi ua tuuina atu ia te outou e ala i sauniga ua outou mauaina ma feagaiga ua outou tausia. O le mea e sili i na mea uma, o loo i ai pea e le aunoa lo outou Tama Faalelagi ma Lona Alo—lo tatou Faaola o Iesu Keriso, lo tatou Fautua—e fesoasoani atu ia te outou i le aluga o le olaga. I se aaooga loloto ma le faagaeetia i le taimi o le galuega faaletino a le Faaola, sa Ia tuuina mai ai se valaaulia i tagata soifua uma faapea foi ma i tatou taitoatas.

"Ia outou o mai ia te au, outou uma o e tigaina ma mafatia i avega, o au foi e malolo ai outou.

"Ia outou amoina la'u amo, ma ia outou faaa'oa'o ia te au, aua o au lē agamalu ma le loto maulalo, ona maua lea e outou o le malologa mo outou agaga.

"Aua e avegofie la'u amo, o la'u avega foi e mama ia" (Mataio 11:28–30).

Ou te faaopoopo atu la'u molimau faamoni i le soifua moni o lo tatou Tama Faalelagi e Faavavau ma Lona Alo, o le Alii o Iesu Keriso. Ou te molimau atu foi o Le Ekalesia a Iesu Keriso o le Au Paia o Aso e Gata Ai o le Ekalesia toefuataina lea a le Alii ma le malo o le Atua i luga o le lalolagi.

Ou te faamoemoe—ma faapea ma i latou o e faasoaina atu lenei molimau—o le a tumau pea ona totoa i lenei mafuaaga maoae. ■

Mai se lauga, "Being Valiant," na tuuina atu i le Kolisi Faa-pisinisi a le AAG i le aso 17 Juni, 2014. Mo le saunoaga atoa i le gagana Paretania, alu i le ldsc.edu.

FAAMATALAGA

1. Bruce R. McConkie, "Be Valiant in the Fight of Faith," *Ensign*, Nov. 1974, 35.
2. *Autobiography of Parley Parker Pratt*, ed. Parley P. Pratt Jr. (1938), 210–11.
3. Tagai Aoaoga a Peresitene o le Ekalesia: Iosefa F. Samita (1998), 104–5.



Saunia e
Elder Gary E.
Stevenson

O Le Korama
a Aposetolo e
Toasefululua

Ô MEA UMA E TE MAUA, IA MAUA MAI AI LE **Malamalama**

*O le malamala-
maaga moni o
le a oo mai ia te
oe a o e iloaina
le faalagolago i
le suesue ma le
tatalo, a o e faa-
tumauina se tau-
tinoga e auauna
atu a o aoaoina
ma mauaina
mai, ma a o e
faatuatuaina
ma faalagolago
atu i le Alii o Iesu
Keriso.*

O le tele o lou olaga faatamaititi aoga o le iunivesite sa aofia ai le faletusi. O taimi uma lava ou te ulufale atu ai, e faafeiloai au e se faailoga e fatauina faapea, “O mea uma e te maua ia maua mai ai le atamai” (Faataoto 4:7).

Tatou te iloa uma o le faia soo e manatua ai le faamatalaga. O lea o loo ia te au le mau lenei mai le tusi a Faataoto o loo mau i lou mafaufau, i le fatau i ai i taimi taitasi ou te ulufale ai i le faletusi i taimi o le fa tausaga o au suesuega faaiunivesite ao lei faauu.

Ou te tuuina atu lea apoapoaiga e tasi ia te outou taitoatasi: “Ma o mea uma e te maua, ia maua mai ai le malamalama.” Ou te valaaulia foi outou e mafaufau i le uiga o lenei mau ma pe faapefea ona mafai ona e manuia ai. Sa ou faia lea mea. Sa ou vaai i ai mai ni vaaiga eseese i lou mafaufau i lea taimi ma lea taimi, ma o lou faauigaina o lona faauigaga ua matua suia lava. Atonu e mafai ona e manuia mai i au matauga.

O Se Loto Matala

A o avea au ma se faifeatalai talavou i Iapani o loo tauivi e aoao se gagana

faigata, sa ou faalogo i ni upu i le amataga ma le tele o taimi. O faafeiloaiga e pei o le *ohayo gozaimasu* (taeao manuia) po o le *konnichiwa* (aoauli manuia) o ni vaega se lua o nei upu. O le isi o le *wakarimasen*, o lona uiga, “Ou te le malamalama.” O lenei upu, faatasai ai ma le faatalofa atu, sa foliga o se tali e fiafia i ai mai tagata Iapani e faasino atu i faifeatalai talavou a o latou taumafai e amata se talanoaga.

I le taimi muamua, a o ou mafaufau i le uiga o le “ma o mea uma e te maua, ia maua mai ai le malamalama,” Sa tele ina ou mafaufau i le *malamalama* e faatatau i lenei ituaiga o malamalamaaga: o mea atonu ou te faalogo i ai ma malamalama i ai i lou mafaufau. Sa ou mafaufau i le faaupuga faaIapani *wakarimasen*. Mata o ou malamalama pe e le o malamalama?

A o ou suesueina ma matauina le faaaogaina o le upu *malamalama* i tusitusiga paia ma mai i upu a perofeta soifua, peitai, ua ou iloaina se faauigaga e loloto atu. Mafaufau i upu nei mai ia Elder Robert D. Hales o le Korama a Aposetolo e Toasefululua ina ua avea o ia ma Epikopo Pulefaamalumalu a le Ekalesia:

Planet Nine?

silver
47
Ag

107.868

gold
79

Au

196.967

Platinum





FAATUATUA I LE ALII MA I ANA FOLAFOLAGA

Ina ia avea ma se faataitaiga o le faatuatua o lona uiga tatou te faalagolago i le Alii ma Lana afioga. O lona uiga tatou te umia ma faafailleina talitonuga ia o le a tatalaina o tatou mafaufauga ma a tatou amioga. O lo tatou faatuatua i le Alii o lesu Keriso ma i lo tatou Tama Faalelagi o le a faatosinaina mea uma tatou te faia. I le lotolotoi o fenumiaiga o lo tatou olaga, o feteneaiga o le amiosao, ma le vavao o le olaga o aso uma, o se faatuatua tumau e avea ma se taula i o tatou olaga.”

Peresitene Thomas S. Monson, “Avea ma se Faataitaiga ma se Malamalama,” *Liahona*, Nov. 2015, 87.

Tatou te faaopoopo i le atamai le malamalama, aafiaga, poto, ma le fesoasoani mai le Agaga Paia e ala i le tatalo. Na o le pau lena o le taimi tatou te ausia ai se malamalamaaga i o tatou loto.



“Muamua, tatou te amata i le poto lea na tatou fananau mai ma i tatou. Tatou te faaopoopo i lo tatou poto le mautinoa a o tatou saili mo ni tali, suesue, ma aoao i tatou lava. Tatou te faaopoopo i lo tatou mautinoa le poto masani, lea e tatau ona taitaiina i tatou i le faautagamamao. E le gata i le faautagamamao, tatou te faaopoopo i ai le fesoasoani a le Agaga Paia e ala i a tatou tatalo ma le faatuatua, e ole atu mo le taitaiga faaleagaga ma le malosi. Pau lena o le mea e mafai ai ona tatou maua se *malamalama* i o tatou loto—lea e faagaeetia i tatou e ‘fai le mea sao; ona mulimuli mai ai lea o le iuga.’ (*Viiga*, 1985, nu. 148.) O lagona o le loto *malamalama* tatou te maua ai le agaga mautinoa, e le gata i le iloa lelei, a o le faia o le mea sao e tusa po o a tulaga. O le *malamalama* i o tatou loto e sau mai le o faatasi o le suesue ma le tatalo.”¹

Ia toe mafaufau: “O mea uma e te maua, ia maua mai ai le malamalama.” O le malamalama i lenei talaaga e mulimuli i le atamai, malamalama, aafiaga, poto, ma uunaiga mai le Agaga Paia—o ia mea uma e taitaia i tatou i le iloaina ma faia o le mea sao.

O le toatele o outou ua latalata pe ua ulu atu i se taimi taua o faaiuga i lou olaga. E tele

ina e tutoatasi i tausaga taitasi e tea atu, ma o loo loloto lou agai atu i le vaega “ma o mea uma e te maua” i lou olaga. O le a le mea o le a e mauaina? Atonu o le a e mauaina se tane po o se ava, o lou lava aiga, se galuega, o ni nai mea na e tau atu.

Ina ia puleaina mea e taua tele tatou te “mauaina,” e tatau foi ona tatou mauaina le “malamalama,” e pei ona aoao mai e tutsisiga paia. O lenei malamalama e oo mai e ala i le faalagolago atu i le suesue ma le tatalo. I se isi faaupuga, e tatau ona tatou faatuatua ma faalagolago i le Alii o Iesu Keriso. Sa faamatala e Alema lenei mea ina ua ia faatusaina le upu i se fatu. E pei ona ia taua, “Ua amata ona faamalamalama ai lou *malamalamaaga*, ioe, ua amata ona sua-malie ia te au” (Alema 32:28; faaopoopo le faamamafa).

E masani ona sii mai e Peresitene Thomas S. Monson se mau mai le Faataoto lea e fesoasoani ia i tatou ia malamalama atili i ai: “Ia e faatuatua ia Ieova ma lou loto atoa; a e aua le faalagolago i lou lava atamai” (Faataoto 3:5).²

A tatou faatuatua ma faalagolago i le Alii, o le a oo mai se fuataga sili o le malamalama mai ia te Ia i o tatou loto.

"O Le Aao o le Alii o Loo i Luga o I Tatou"

Sei ou tuuina atu se faataitaiga o se tamaitai mamana sa tauaveina se matafaioi taua i le Toefuataiga, o le sa faatuatua i le Alii, ma sa le faalagolago i lona lava atamai.

E lei leva talu ona faatulagaina le Ekalesia i Palamaira, Niu Ioka, sa nonofo le tina o Iosefa Samita, o Lusi Maki Samita i Waterloo, i Niu Ioka, faatasi ai ma se vaega toatele o Au Paia a o muamua atu lana tane, o Iosefa le Matua manisi o o la fanau tama, e aofia ai Iosefa le Itiiti ia te ia mo Katalani, Ohaio. O lana tiutetauave o le avatu lea o lenei vaega i Ohaio pe a ia mauaina se tala mai i lana tama tama, le Perofeta.

Sa oo mai le tala i le amataga o le tautotogo 1831. O Lusi, faatasi ai ma le fesoasoani a nisi o le usoga perisitua, sa amata ona fesiitai atu le vaega i Buffalo, Niu Ioka, ma le faamoemoe e malaga atu i Ohaio i le vaa i le Vai o Erie. Sa ia fai mai: "Ina ua manatu le usoga perisitua i lena tautotogo ua avanoa le vai, sa matou amata ona sauni e masii atu i Katalani. Sa matou totogia se vaa . . . ; ma le . . . matou aofaiga e valu sefulu agaga."

Ma, a o latou agai atu i le Alavai o Erie ma agai atu i Buffalo, sa ia fai mai: "Sa ou valaauna faatasi le usoga perisitua ma tamaitai, ma faamanatu ia i latou o loo matou malaga i le poloaga a le Alii, e pei o le Tama o Liae, ina ua ia tuua Ierusalem; ma, afai matou te faatuatua, matou te maua mafuaaga e tasi e faamoemoe i faamanuiaga a le Atua. Ona ou talosagaina lea o i latou ina ia faamaoni, *ma ia sii atu pea o latou loto i le Atua i le tatalo*, ina ia matou manuia."

Pe tusa o le afa o le malaga i Buffalo mai Waterloo, sa amata ona faigata le ala i le vai. O tulaga mo Au Paia e 80 sa le toafimalie, ma sa toetoe lava ina vave ona amata le muimuiga. Sa tatau ia Lusi, ma le faalagolago atu i le Alii ona tuufaatas i lo latou faatuatua. Sa ia tau atu ia i latou: "Leai, leai, . . . uso e, tou te le matelaina lava, po o soo se tasi o na mea; tau lava ia onosai ma tuu le muimui. E leai sou masalosalo ae o loo i ai le aao a le Alii i o tatou luga."


Ina ua latou taunu i Buffalo i le aso lona lima i le tuua ai o Waterloo, sa liu aisa le uafu e agai atu i le Vai o Erie. Sa latou malaga i se vaa ma Kapeteni Blake, o se alii e masani ia Lusi Samita ma lona aiga.

Ina ua mavae ni nai aso, e ui o tulaga i luga o le vaa sa le toafimalie mo i latou uma e nonofo ai a o faatalitali le taimi e tuua ai, sa lipoti mai e Lusi, "Sa talosagaina e Kapeteni Blake le au pasese ina ia nonofo i luga o le vaa, e pei ona ia manao ai, mai lena taimi, ina ia sauni e amata [le faigamalaga] i se taimi o le lapataiga; i le taimi e tasi sa ia auina atu se alii e fuaina le loloto o le aisa, sa ia foi mai, ma lipoti mai sa faaputuina i le maualuga o le luasefulu futu [6 ml], ma o lona manatu o le a matou nonofo ai i le uafu i le umi o le lua vaiaso."

Sa lofituina lenei tala i le vaega. Sa itiiti sapalai ma sa fai-gata ia tulaga. Sa faaopoopo le faamaumauina e Lusi Maki Samita o lana apoapoaiga i le Au Paia: "E te tautino atu e tuu atu lou faatuatua i le Atua, ma e mafai faapefea ona e lagona ia muimui ma tomumu e pei ona e faia! E sili atu le tou faigata i lo le fanau a Israaelu; aua o ou uso nei o loo naunau pea mo a latou nofoa faalue, ma o le usoga perisitua o e sa ou faamoemoe e tumau ma malolosi, ua tautino mai latou te talitonu moni o le a latou matelaina i le oti ae latou te lei oo i le iuga o lo latou faigamalaga. Ma aisea e tupu ai lea mea? Pe ua leai ni a outou meaai? . . . O fea lou faatuatua? O fea lou talitonuga i le Atua? E te le mafai ea ona iloa o mea uma sa faia e ia, ma e na te pule aoao i galuega a ona lava aao? Ma ana faapea e sii ae uma e le Au Paia o latou loto i le tatalo i le Atua, ina ia mafai ona tatalaina le ala i o matou luma, semanu e faigofie mo ia ona nuti le aisa, ina ia i ai se taimi matou te malaga atu ail!"

Ia, faamolemole matau ii le faatuatua maoae o Tina Samita—le auala na ia filifili ai e faatuatua i le Alii ma le ala sa ia talosaga ai le Au Paia faatasi ma ia ia le faalagolago lava i lo latou lava atamai:

"'O lenei, uso e ma tuagane, afai o le a siiiae e outou uma o outou manaoga i le lagi, ina ia mafai ona nuti le aisa, ma faasaolotoina i tatou, e moni lava e pei ona soifua o le Alii, o le a faia lava.' Sa faalogoina i lena taimi se pao, e pei o le faititili ua pa. Sa alaga le kapeteni, 'O tagata uma i lona tulaga.' Sa vavae le aisa, ma tuua ai na o se ala mo le vaa, ma sa vaapiapi tele ma ao pasia e le vaa, o pakete o le uilivae sa saeia ma le leotele, lea sa faatasi ai i le poloaga a le kapeteni, le tali atu a le auvaa, le pao o le aisa, ma le fetagisi ma le le mautonu o le au maimoa, sa tuuina



I le maea ai o le uunaia o ona tuagane ma uso ia tuu le muimui ma sisii ae o latou manaoga i le lagi, sa fai mai Lusi Maki Samita, “Sa vavae le aisa, ma tuua ai na o se ala mo le vaa.” O le taimi lava na pasi atu ai le vaa a le Au Paia, sa toe tuufaatasia le aisa.

atu se vaaiga matautia moni lava. E lei leva ona matou pasia le alavai ae toe tuufaatasia le asia, ma na tuua ai le usoga Collesville i Buffalo, ma le mafai ai ona mulimuli mai ia i matou.

“A o matou tuua le uafu, sa alaga se tasi o tagata maimoa, ‘O le vaega le la a le “Mamona”! Sa magoto le vaa le la i le vai i le loloto atu e iva inisi nai lo le taimi muamua, ma, matau mai, o le a ia magoto—e leai seis mea e moni atu.’ E moni ai, o le latou mautinoa tele sa latou o sao ai i le ofisa o le [talafou] ma lolomiina sa matou magoto, ina ia matou taunu mai i Fairport matou te faitau i pepa i le talafou o o matou lava maliu.”³

“Aua Le Faalagolago i Lou Lava Atamai”

“Ma i mea e te maua ia maua mai ai le malamalama,” po o le, faapea atu i se isi auala, “Ia e faatuatua ia Ieova ma lou loto atoa; a e aua le faalagolago i lou lava atamai” (Faataoto 3:5).

Ua ou matauina patino le faanoanoa ma le faatamaiaga faaletagata lava ia i luga o i latou e taulai atu i le “mauaina” ae le o le “malamalama” a le Alii. E foliga mai o i latou o e faalagolago i o latou lava atamai pe faalagolago i lima o le tagata e sili atu ona atiae se taulaiga lautele nai lo le faamasino tonu po o le fiafia i mea e maua mai faale-tino, o le tulaga, o le pule, ma le matafaioi. Ae o le tausia-inia o le “mauaina” e ogatusa ma le taitaiga faaletusitusiga paia o le “malamalama” o le a pulea ai lou manao faale-tino. O le a faataga ai le talaaga talafeagai mo au gaoioiga o se sui manuia o le sosaiete ma o le malo a le Alii.

A o avea au o se tamaitiiti aoga e tumu i le faamoemoe, ou te manatua le faalogo ai i se faufautua faaaloalogia ma faamanuiaina o loo fautua mai, tatou te pulea ma le talafeagai sini e ala i le mulimuli i se faatulagaga o le “aoao, maua mai, auauna atu.” Sa aoao mai e Peresitene Gordon B. Hinckley (1910–2008) se mamanu e taitai atu i le faatuatua o le Alii ma le faalagolago atu ia te Ia nai lo i tatou lava. Sa ia faapea mai: “O i tatou taitoatasi e i ai ni tiutetauve taua se fa. Muamua, e i ai la tatou tiutetauve i o tatou aiga. Lona lua, e i ai la tatou tiutetauve taua i a tatou pule o galuega. Lona tolu, e i ai la tatou tiutetauve i le galuega a le Alii. Lona fa, e i ai la tatou tiutetauve ia i tatou lava.”

E tatau ona tatou faapalenina. Sa fautua mai Peresitene Hinckley, tatou te faataunuuina nei tiutetauve taua e fa e ala i tatalo faaleaiga, afiafi faaleaiga, suesueina o tusitusiga paia faaleaiga, faamaoni ma tuuto i a tatou pule [o galuega], faataunuuina o a tatou tiutetauve o le Ekalesia, suesueina o tusitusiga paia faaletagata lava ia, malologa, mea faafafia, ma le faamalosi tino.⁴

Sa fai mai le filisofia Amerika ma le tusi solo o Ralph Waldo Emerson, “O le taimi lenei, pei o isi taimi uma, o se taimi lelei tele, pe a tatou iloa le mea e faia ai.”⁵

O le mea e lelei ai, e le tau vaai le Au Paia o Aso e Gata Ai i tua atu ina ia iloa le mea e fai. Ma lou malamalama i se Tama Faalelagi alofa ma le ata sili o le fiafia, ua e maua le taiala mautu i le loloto o le vai. Ia, tuu foi au foe i le loloto ma alo malos i ia ogatusa.

I se lauga o le konafesi aoao, sa sii mai e Peresitene Monson mai le Faataoto, e pei ona ia faia muamua: “Ia e faatuatua ia Ieova ma lou loto atoa; a e aua le faalagolago i lou lava atamai. Ia e manatua o ia i ou ala uma, ona faantuina ai lea e ia lava ou ala.” Ona ia saunoa mai lea, “O le tala lena o lou olaga.”⁶ Oka se olaga maoae e faataitai i ai.

O loo ia te au ni faamoemoega mo outou taitoatasi, e faapena foi le Tama ma le Alo. Ou te faaiu atu i le mea sa ou amata ai—ma le apoapoiga o loo maua i le Faataoto: “Ma o mea uma e te maua e maua mai ai le malamalama.”

Ia maua mai le malamalama moni. O le a oo atu ia te oe lenei mea a o e iloaina le faalagolago atu i le suesue ma le tatalo, a o e faatumauina se tautinoga e auauna atu a o aoaoina ma mauaina, ma a o e le faalagolago ia te oe lava ae faatuatua ma faalagolago i le Alii. ■

Mai le saunoaga o se faigalotu, “Aua Le Faalagolago i Lou Lava Atamai,” sa tuuina atu i le Iunivesite a Polika Iaga i le aso 14 o Ianuari, 2015. Mo le saunoaga atoa i le gagana Peretania, alu i le speeches.byu.edu.

FAAMATALAGA

1. Robert D. Hales, “Making Righteous Choices at the Crossroads of Life,” *Ensign*, Nov. 1988, 10; faaopoopo le faamamafa.
2. Tagai, mo se faataitaiga, Thomas S. Monson, “Se Upu i le Faaieu,” *Liahona*, Me 2010, 112.
3. Lucy Mack Smith, *History of Joseph Smith by His Mother, Lucy Mack Smith* (1979), tagai 195–99, 202–205; faaopoopo le faamamafa.
4. Tagai Gordon B. Hinckley, “Olioli i le Avanoa e Galue ma Auauna Atu Ai,” *Fonotaga Faaleaoaga a Taitai i le Lalolagi Atoa*, 21 Iuni, 2003, 22, 23.
5. Ralph Waldo Emerson, i le “The American Scholar,” se lauga na tuuina atu i le aso 31 o Aok, 1837, i le Iunivesite o Cambridge.
6. Thomas S. Monson, “Se Upu i le Faaieu,” 112; sii mai Faataoto 3:5–6.

FAAALOALO I TAMAITAI—E TUSA PO O LE A LE MATUA

Sa valaaaina atu e aoao le Perisitua Arona i lau paranesi, ma o se tasi o aso Sa o le autu o le faaaloalo i tamaitai. I le aluga o le lesona sa matou talanoaina o le faaaloalo e ao ona faaalia i tamaitai uma, mai le pepe meamea i le tamaitai matua, e pei ona taua i le tusi lesona a le Perisitua Arona.

O Kaperielu (ua suiga le igoa), o se tasi o alii talavou i le vasega, sa fai mai e faapea ia te ia o se fafine o se tamaitai ua lava le matua e avea ma ona tina ma o soo se tamaitai e laitiiti atu e ao ona faaaloalo ia te ia aua o ia o se alii. E leai se tasi o le vasega sa ioeina faatasi ma ia, lea sa faigata ai ia te ia ona talitonu ai.

Sa faaaaua ona matou talanoaina auala e faaali atu ai le faaaloalo i tamaitai, ma sa ou tau atu ia i latou, o se tasi o mea ou te faia o le tuu atu lea o lou nofoa i luga o le veni femalagaai o tagata lautele pe a sau i luga se tamaitai, e tusa pe o le a tu ai mo le 30–40 minute a o lei taunu atu i lou

taunuuga. Sa ou tau atu ia i latou, e ao i alii ona tutu ma tuu atu i tamaitai ia nofoa. Sa lei toafimalie lava Kaperielu i le lesona.

I aso e lua na sosoo ai, sa ou alu ai i se veni ma sa nofo i lalo i le pito i luma. Sa tumu uma nofoa ina ua o mai i luga se tamaloa ma lona afafine laitiiti ma savavali atu i le pito i tua. E lei leva, sa ulufale mai se tamaitai faamatuatua i le veni, ma sa ou tu i luga ma tuuina atu lou nofoa ia te ia.

Sa popo mai e se tamaloa lou tauau, ma faasino atu i le pito i tua o le veni, ma fai mai sa i ai se alii talavou sa manao ia ou taulai atu ia te ia. Sa ou savali i tua e vaai po o ai lenei alii talavou. Sa ataata tagata uma sa latalata ane aua sa faatoa tuuina atu e le alii talavou lana nofoa i le tamaloa ma lona afafine e fa tausaga sa o mai i luga o le veni i se taimi muamua atu. O Kaperielu, le alii talavou i lau vasega perisitua, o le sa lagona le le toafimalie i le autu o le faaaloalo i tamaitai.

Sa ia fai mai ia te au, "Sa ou vaai atu pe mata e te tu i luga mo le fafine sa sau i totonu o le veni. Sa ou lagona le aafia ai ina ua ou vaaia sa e faia, ma sa ou manatua ai la tatou lesona i le aso Sa ma tu ai i luga mo le teineitiiti laitiiti ma lona tama."


Oka sou fafia i le vaai atu i a tatou alii talavou o loo ola ai i mea sa aoaoina ai i latou i le Ekalesia. Sa manatu o ia o le faaaloalo sa faapolopoloina mo na o tamaitai matutua atu, ae ina ua maea la matou lesona o le aso Sa, sa ia filifili e faaali atu le faaaloalo i le teineitiiti e fa tausaga le matua.

Sa ou fafia foi sa ou filifili e ola ai i mea sa ou aoaoina, e fesoasoani ia te ia e faaali atu le faaaloalo mo tamaitai o vaitausaga uma. Sa ou manatu pe o le a faapefea ona lagona pe ana ou le tu i luga mo le tamaitai i totonu o le veni. Sa oo mai se mau i lou mafaufau: "Afai ua outou iloa ia mea, amuia outou pe a outou faia" (Ioane 13:17). ■

Owie Osaretin Friday, Edo, Nigeria

Sa ulufale mai se tamaitai faamatuatua i le veni, ma sa ou tu i luga ma tuuina atu lou nofoa ia te ia.





O AI UA SAUNIA I LE TAIMI NEI?

Se tasi o aso Sa na sosoo ai ma le sauniga mulimuli o le konafesi aoao, sa ou lagona se musumusuga faapitoa e saini e alu i totonu o lau faitotoa o le FamilySearch ma faia ni talafaasolopito o aiga. Sa ou musu e galue i lau talafaasolopito o aiga aua ou te lei manuia lava i isi o au taumafaiga muamua. Ua uma ona faia e lou aiga le tele o galuega o le talafaasolopito o aiga, ma sa ou maua se manatu i lou mafaufau sa leai se mea o totoe e fai.

Sa ou saofai ma manava loloto e faailoa ai lou le mautonu a o ou tilotilo atu i le iuga sa ou taumafai e galue i ai mo le tele o tausaga, ma le faamoemoe o le aso mulimuli lea o le a ou maua ai ni faamatalaga. Sa amata lau suesuega masani e ala i faamau-mauga o faamatalaga, faaipoipoga, ma

aso fanau, ma i le maea ai o le itula sa ou le mauaina se mea. Ma ona musuia lea o au e le Agaga i le faaiuga atoa o le vaiaso i sauniga o le konafesi, sa musuia au e tatalo ma saili le tagata sa saunia mo o latou galuega ina ia faia i le taimi nei.

Ina ua uma lau tatalo, sa ou toe foi i lou lava igoa ma alu i luma e ala i le laina. Sa manino lou lagonaina o le taialaina o au e le Agaga mai le laina e tasi i le isi laina seja oo ina ou iu i le itu o le aiga a lou tamamatua. I le isi itula, sa faatumulia le potu i le Agaga, ma sa ou alu ese mai ma igoa e lima e ave i le malumalu. A o ou faamaeaina le talosagaina o igoa mo le malumalu, sa ou autilo ifo i lalo i nisi o faamaumauga sa ou mauaina ni faamatalaga. Sa faatumulia ou mata i loimata ma sa ou lagona

se fiafia faalolotoina—sa oo mai le faamatalaga mai le au faavasega igoa o e sa volenitia o latou taimi e ta i totonu faamaumauga mo ou tuaa. I le faafetai ai, sa ou faavasegaina igoa mo isi tagata mo le isi itula.

Sa tupu lou molimau ma sa ou faafetai mo na mafuaaga e lua. O le mafuaaga muamua, i le taimi o le konafesi aoao, sa taitai au e le Agaga e faia galuega o talafaasolopito o aiga ma ia iloa igoa e sailia. Lona lua, o tagata o le Ekalesia i le lalolagi atoa o e sa faavasegaina igoa ina ia mafai ai e tagata e pei o au ona maua vave ma manino ia tuaa ma vave ona fai a latou galuega o le malumalu. Sa avea o se molimau mamana ma manino ia te au le salalau atu o le galuega a le Atua i luga o le lalolagi atoa. ■

Leisa Wimpee, Nevada, ISA

S a manino lou lagonaina o le taialaina o au e le Agaga mai le laina e tasi i le isi laina seja oo ina ou i le itu o le aiga a lou tamamatua.

O LE TATALO A SE TAITAI SIKAUTI

Sa avea au o se Taitai Sikauti e taitai alii talavou e toa 20 ma taitai e toalua i se malaga o le gaoioiga i Iuta i saute, ISA.

Ina ua taunu la matou taavale i le auala e avatu ai matou i le saite e tolau-api ai, sa ou tu ma iloiloina le toafa i luma atu o au. Sa tele taimi sa ou faia ai lenei malaga, ae mo ni mafuaaga, sa le mafai ona ou iloa se mea sa ou iloaina. Sa ou vaai ma le faaeteete i le eria, ma tilotilo mo se mea e masani ai.

Po o le a le tele o auala ou te agai i ai, sa taitai atu uma i ni auala e muta.

Sa faasolo ina pogisa. Sa iu, na ou tu ma fai atu i tagata uma e nonofo i

totonu o le taavale. Sa ou tago atu i se moli uila ma fai atu ia i latou o le a ou savali e sueina le auala ma faailo mai ia i latou le taimi ou te maua ai le auala.

O le mea tonu sa ou faia o le tootuli lea i lalo ma augani atu i le Tama Faalelagi e fesoasoani mai ia i matou i lenei tulaga faigata. Sa sasaa atu lou loto ia te Ia, ma faamatala i ai au sauniuniga, o lou alofa mo tama sikauti, o lou faafetai i tama o tama sikauti na o mai ma matou, ma lou faatuatua moni e Na te tali vave mai i lau tatalo. Na uma la'u tatalo, ma sa ou tu i luga. Sa ou faamoemoe e tu i

luga, ki lau moli uila i le pogisa, ma vaai atu i le sulu i luga o le auala sao.


Ae sa leai se mea na tupu.

Sa ou tilotilo atu ma le le leoa i le mamao e mafai ona ou oo atu i ai lau sulu.

Ae sa leai lava se auala sao.

Sa le mafai ona ou talitonu i ai. Sa ou *iloaina* o le taimi lava ou te tu ai i luga, o le a ou vaaia le auala. Sa ou *iloaina* e le tuua au e le Alii, aemaise i le toatele ai o tagata o loo faalagolago mai ia te au.

Sa tatau nei ona toe foi atu ma talanoa i ni tama le fafia se toalua ma o la veni o loo tutumu i alii talavou



Ole mea tonu sa ou faia
o le tootuli lea i lalo ma augani atu
i le Tama Faalelagi e fesoasoani mai ia i
matou i lenei tulaga faigata.

ulavavale, ma tiotio, o loo tau fai mai uma, "O tatou i ai ea iina?"

Sa ou faatoese atu ma faamautinoa atu ia i latou sa 20 taimi sa ou faia ai lenei malaga i lou olaga ma sa ou iloaina o loo i ai lava iina le auala. Sa le mafai ona ou vaai i ai.

Na iu lava, sa matou filifili e tietie atu i le aai ma totogi ni potu se lua i le faletalimalo. O le a matou toe foi atu ma se malosi faafouina i le taeao o le aso Toonai.

Talu ai sa le mafai ona matou fausia ni afi e kuka ai meaai o le afiafi i luga o afi o tolauapiga sa matou aumaia, sa matou o atu i le fale pizza o le lotofale sa matou vaai ai i le tausiusiuga o le aai.

Sa manaia le pizza ma sa fiafia tama, ae sa ou lagona lava le tausalaina o le totogiina o le fale mautotogi ma pili o le meaai o le afiafi.

A o matou aai, sa ou mafaufau pe aisea sa le tali mai ai e le Tama Faalelagi lau tatalo, ae faafuasei lava ona ou faalogoina se pao leotele.

Sa ou tu i luga, tatala le faitotoa o le fale pizza, ma vaaia ai le maligi o timuga tetele ou te lei vaaia muamua. Sa emo uila i sisifo i matu—sa agai tonu lava i le mea sa ou tatalo ai mo se tali e lei atoa se itula na muamua atu. I lena taimi, sa oo mai ai le Agaga ia te au, ma ou iloa ai *sa* tali mai e le Alii lau tatalo!

O le taeao na sosoo ai, sa lanu moana le lagi, ma sa matou toe agai atu i auala palapala, sa ou aveina sao atu le taavale i le auala sa ou sailia i le po na muamua atu. Ua ou iloa nei le auala e tali mai ai i nisi taimi ia tatalo i le leai, ae e tali mai *lava*. ■

Tony Rogerson, luta, ISA

Moe Toe Amata Tape Aluese ma le

Polokalama



U a ou toe mauaina mai le tele o le taimi—taimi lea ua ou faaaluina i le taimi nei e tausia ai ma taaalo ai ma la'u fanau, faitau, ma suesue ai.

FETUUNAIGA O MEA OU TE FAAMUAMUAINA

Elei leva ona uma ona ou amataina le poloka [blog] a lo matou aiga, ae ou iloaina le faaaluina o ou taimi avanoa uma i le faafouina ma mafaufau pe faapefea ona ou faamanaiaina ma fatufatuna. Sa ou faaaluina le tele o taimi e faitau ai i poloka a isi foi tagata.

I totolu o ni nai vaiaso, sa avea le poloka ma se mea ua ou faamuamua ina lo a'u suesuega i tusitusiga paia ma isi faitauga. Sa le mafai ona ou mafaufau ao suesue, sa ou le toe manao e faitau, ma sa ou lagona le leai o se Agaga i lo'u olaga. Sa tau le lava lo'u onosai i la'u fanau, ma o le taimi sa tatau ona ou faaaluina ma i latou, sa ou faaaluina lea i le komepiuta.

E le faapea ona sa le talafeagai le poloka; aua o le mea moni lava, o se auala lelei lea e fesootai ai ma aiga ma uo. Ae talu ai sa ou lagona le aveese mai o mea sa ou taulai i ai mai mea lea o le a aumaia ia te a'u se faavae faaleagaga malosi, sa ou iloaina ua tatau ona i ai se mea e sui.

Sa amata i lou tauina ia te au lava ia e le tatau ona ou alu i le poloka i aso

uma ma e le tatau foi ona ou siakiina poloka a isi tagata i aso taitasi. Sa ou filifili e mafai lava ona ou faaaluina se taimi avanoa i luga o le komepiuta ae pe a uma ona faitau a'u tusitusiga paia ma isi faitauga. E oo atu i le taimi ua uma ai ona ou faia mea e sili ona taua, ua le lava se taimi ou te alu ai i le poloka, ae e le afaina. Ua ou toe mauaina mai le tele o le taimi—taimi lea ua ou faaaluina i le taimi nei e tausia ai ma taaalo ma la'u fanau, faitau, ma suesue ai.

Ina ua mavae ni nai aso o le toe fetuunaia o mea e faamuamua, sa ou iloa lou toe lagonaina atili o le Agaga i lou olaga.

Ua ou iloa a ou faamuamua ina aso taitasi mea o le a faamanuiaina ai a'u faaleagaga, o le a ou lagonaina atili le Agaga i aso taitasi. Ua ou iloa o le faaavanoaina o le taimi mo suesuega i tusitusiga paia, faitau o mekasini a le Ekalesia ma isi tusi lelei, ma o le mafaufau i mea e taua faavavau o le a fesoasoani ia te a'u ina ia avea ma se ava lelei, se tina lelei, ma se tagata lelei o le Ekalesia a le Alii. ■

Jinny Davis, Texas, ISA



Saunia e Elder
C. Scott Grow
O Le Fitugafulu

MATAUPU FAAVAE FAAVALOAGA OLE FAAMAONI

Ua silia ma le 20 tausaga ua mavae, na faa-maeaina ai lau auauanga o se peresitene o le misiona i Amerika i Saute. Sa ma vaaia ma lou toalua o, Rhonda, ni taimi matagofie o le olioli faapea foi ma mafatiaga faavauvau i olaga o a maua faifeautalai i le 20 tausaga mai lena taimi.

O le toatele lava o a maua faifeautalai ua faa-mauina ma le fiafia i le malumalu, tausia ni fanau amiontu ma auina atu i latou i ni misiona, ma auaua atu ma le faamaoni i ausilali a le Ekalesia ma valaauga o le perisitua. Ae peitai, o nisi, ua le o toe toaaga mai, o nisi na faaipoipo ma ua toe tetea, ma o nisi ua tape igoa mai le Ekalesia.

O le a le mea na faia le eseesege i olaga o a maua faafeautalai na i ai? O le a se mea e ono ese se faiga e nisi o i latou e aloese mai ai i faanoanaga faaletagata lava ia? Ae a oe? O fea o le a e i ai i le 20 tausaga? O a ni faaiuga ma tautinoga e tatau ona e faia i le taimi nei ma le lumanai o le a fesoasoani e te tumau faamaoni ai?

Ou te fautua atu ni mataupu faavae e 10 lea o le a fesoasoani ia te oe.

1 FAAAUAU PEA ONA FAFAGAINA LAU MOLIMAU

O aafiaga ua faatumulia e le Agaga lea e tupu i se misiona e faatulagaina ai se faavae o le faatuata lea e mafai ona faamanuiaina ai oe i lou olaga atoa. O lena faavae o le faatuata ua na o le faata-mala po o le agasala e mafai ona faavaivai ai.

Talu ai nei sa ou faatalanoaina ai se faifeautalai ua toe foi mai ua le o toe toaga ma sa tautino mai ua leai sona faatuata. Sa ou fesili atu ia te ia pe o

**O a ni faaiuga
ma tautinoga e tatau
ona e faia i le taimi
nei ma le lumanai o
le a fesoasoani e te
tumau faamaoni ai?**

ia tatalo ma faitauina le Tusi a Mamona e pei ona sa ia faia ao faifeautalai. Sa ia fai mai na te le o faia ona ua leai sona faatuata ia Iosefa Samita.

Sa musuia a'u e fai atu le fesili lenei: "O e matamata i ata ponokalafi?" Sa ia tali mai ioe. Sa ou fai atu ia te ia e leitioa ua leiloa ai lana molimau.

Sa ou tau atu i ai o se molimau o le Agaga Paia lea o loo molimau mai i o tatou agaga e uiga i le moni o le talalelei ma le Ekalesia toefuataiina. A tatou le tatalo ma suesue i tusitusiga paia, o le a faavaivaia le faatosinaga a le Agaga i o tatou olaga, ma faavaivai ai lo tatou tetee atu i faaososoga. A tatou agasala ma ua le mama, ua tatou le mauaina atoa le mafutaga a le Agaga Paia. A aunoa ma le molimau faifaipea a le Agaga, o le a faigofie ona amata ona tatou faapea ifo e leai sa tatou molimau ma masalo e lei i ai lava.

E tatau ona faaaauau pea ona fafagaina la tatou molimau. O lena fafagaina e sau mai le tatalo a le tagata lava ia, suesue i tusitusiga paia i aso uma—aemaise lava le Tusi a Mamona—ma auaua atu i le Ekalesia i lo tatou olaga atoa.



2 MULIMULI I LE FAUTUAGA A PEROFETA MA APOSETOLO SOIFUA

O le a ou toe faamanatuina atu ni fautuaga faavaloga lea e mafai ona fesoasoani ia te oe ina ia maua se faaipoipoga fafia, se aiga faamaoni, ma se olaga faamanuiaina. Ou te faatatau atu i le “O Le Aiga: O Se Folafolaga i le Lalolagi.” O le a ou faasoaina atu nisi o vaega taua o lena folafolaga, lea na lolomia ma faasalalauina atu e le Au Peresitene Sili ma le Korama a Apostolo e Toasefulula i le 1995. Tatou te lagolagoina nei Uso o ni perofeta, tagata vaai, ma tali faaaliga. O i latou o fofoga taumomoli mo le Atua i Lana fanau i le lalolagi.

I le aso na toefuataina ai le Eklesia, sa fetalai atu le Atua e faatatau i Lana perofeta, faapea atu “O lana upu ia outou talia, e pei lava ua mai i lou lava gutu, i le onosai ma le faatuatua atoa.” Ona folafola mai lea e le Alii o faamanuiaga faaletino ma faamanuiaga e faavavau pe a tatou mulimuli i le fautuaga a perofeta: “Aua o le faia o nei mea o le a le manumalo ai faitotoa o seoli ia te outou; ioe, a e tafieseina e le Alii le Atua le malosi o le pogisa mai o outou luma, ma luluina le lagi mo lo outou lelei, atoa ma le mamalu o lona suafa (MF&F 21:5–6).

O se faamanuiaga matagofie lea i nei taimi faigata.



3 IA FAAMAUINA I LE MALUMALU MA TAUSI AU FEAGAIGA

Ua folafola mai e perofeta, tagatavaai, ma talifaaaliga “o le faaipoipoga i le va o se alii ma se tamaitai ua faauuina e le Atua ma o le aiga e totonugalemu i le fuafuaga a le Foafoa mo le taunuuga e faavavau o Ana fanau. Sa latou faaopoopo mai: “O le fuafuaga paia o le fafia, ua mafai ai ona faaauau fegalegaleaiga faaleaiga i tala atu o le tuugamau. Ua mafai i sauniga paia ma feagaiga ua maua i malumalu paia ona toe foi atu ai tagata taitoatas i le afioaga o le Atua ma toe faatasia ai aiga e faavavau.”¹

O le filifiliga sili ona taua e te faia i le olaga “o le faaipoipoga lea i le tagata sao, i le nofoaga sao, e ala i le pule sao”² ona tausia lea o au feagaiga o le malumalu. E leai se faaega e aunoa ma se faamauga faalemalumalu.

Ina ia agavaa mo le faaeaga, e tatau ona ulu atu ia ulugalii i le “feagaiga fou ma faavavau, ma e [tatau ona] faamauina i luga o i laua e le Agaga Paia o folafolaga, e ala mai ia te ia o le ua faauuina”—o le perofeta [soifual]. Afai tatou te tausia a tatou feagaiga o le malumalu, o le a tatou “mautofi i nofoalii, malo, itumalo, ma mana, ma puleaga, o mea maualuluga uma ma loloto . . . ma mamalu i mea uma, . . . o le mamalu lea o le atoatoaga ma le faaauauina o fanau e faavavau ma faavavau lava” (MF&F 132:19; tagai foi i le fuaiupu e 7).

O loo aofia i se faamauga o le malumalu se folafolaga o faamanuiaga faavavau i le isi olaga ma e faateleina ai le avanoa o se faaipoipoga fafia i lenei olaga. I le avea ai ma se atalii po o se afafine faapaiaaina a le Atua, ua e osi feaigaiga e sau i le lalolagi i lenei vaitaimi e fausia le malo o le Atua. O lena fausiga o le malo e aofia lau lava faaipoipoga i le malumalu.



4 FAIPAAGA MA LE ATUA I LE AUMAIA O ANA FANAU AGAGA I LE LALOLAGI

Ua tau mai e le folafolaga: “O le uluai poloaiga na tuuina e le Atua ia Atamu ma Eva, e faatatau i lo la agavaa mo le tulaga faamātua, o se tane ma se ava. Matou te ta’utino atu o le poloaiga a le Atua i Lana fanau ia fanafanau ma uluuluola i le lalolagi, ua faamalosia ma faatumauina.”

O aiga i nei vaitaimi ua toalaiti atu nai lo le le augatupulaga ua mavae atu—e oo lava i aiga a le AAG. E mafai lava pea ona tatou sailia ni mafuaaga e fetuunaia ai le tolopoina po o le faaititia o le aofai o tamaiti ua tatou maua. Mo se faataitaiga, “E tatau ona tatou faauu muamua” po o le “E tatau ona tatou maua se galuega sili atu ina ia tele atili ai a tatou tupe” po o le “Aisea o le a aveesea ai le manaia o le faaipoipoga i le i ai o ni tamaiti?”

Ua faamanuiaina oe i se molimau o le talalelei toefuataiina a Iesu Keriso. Ua e maua faamanuiaga o le faavavau e ofa atu i lau fanau. Aua e te faamamafaina le manatu faapea e tatau ona e saunia mea uma faaletino. O le mealofoa silisili e te ofaina atu i lau fanau o le mauaina lea o mea uma faaleagaga i le malo o le Atua.

A lua fefautuawai ma le agaga tatalo ma lou toa-lua e uiga i le mauaina o se fanau, ia manatua o oe o le talavou tautupu. Faamolemole aua le faagalolina le Atua mai au faiga filifiliga. Faasoa atu lena aia tatau e fanau ai ma le toatele o atalii ma afafine agaga ao sauni le Atua e auina atu i lou aiga. Aua o le mea moni lava, o nei fanau o Ana fanau ia ao lei avea ma au fanau.

O le i ai o le faatuatua i le Atua ma Ana afioga faavaloga, agai i luma e aunoa ma se alofaga po o le le mautonu ma fatu sou lava aiga e faavavau.

5 AUA NEI AAFIA I PONOKALAFI PO O NISI AMIOGA LE MAMA

Ua faaaauau pea le folafolaga, “Ua i ai i fanau le aia e fananau mai ai i totonu o noataga o le faaipoipoga a ni matua, ma ia tausi ae e se tama ma se tina o e e faamamalu-inia tautoga faaleulugalii ma le faamaoni a’ia’i atoa.”

O le faamaoni a’ia’i o lona uiga o le faamaoni faaletino faapea foi ma le faalelagona i lou toalua. O fegalegaleaiga faaponokalafi ma luga o le initonetia i ni faataitaiga ia o le le faamaoni a’ia’i faalelagona. Afai ae gauai atu se tane po o se ava i ponokalafi, ua ia solia se talitonuga paia o le natura sili ona taua. Ua lagona e le toalua o loo nofomama le faalataina. O le a faaleagaina le taitonuga ma le faatuatua i le faaipoipoga. O le taunuuga o ponokalafi o le mulilua lea.

Ou te faasoa atu ni lagona mai se tama o le na faamauinai le malumalu ae na maumau lona aiga ona o ponokalafi ma se fegalegaleaiga i luga o le initonetia ma se tamaitai. Ma le faanoanoa sa ia tusi ai: “Ou te lei usitaia upu na tuuina mai ia te a’u i lo’u faamanuiaga faapeteriaka, lea na tau mai ai e leai se mana ia Satani i lo’u olaga sei vagana ai ua ou tuuina atu ia te ia. Sa ou tuuina atu ia te ia, ma sa ia aveina lemu ma le mautinoa ma faaaogaina lena mana e faatamaia ai lo’u olaga ma lo’u toalua ma la’u fanau. Sa ou alofa ia i latou ma lo’u loto atoa ma o loo ou alofa pea ia i latou ma e le mavae lou alofa i ai, ae sa le lava lena alofa e faatoi-lalo ai le mana sa ou tuuina atu ma le malie i ai ia Satani e faatamaia ai lo’u olaga. Ua saunia [mo i tatou] e aoaoga a le Ekalesia se auala e toe foi atu ai o se aiga ua faamauinai mo le olaga nei ma le faavavau atoa i lo tatou Tama Faalelagi, pe ana ou faalogo lava ma usitaia, ae i le iuga lava ou te lei usitai.”

E maeu lea mea matautia.





6 AOAO ATU MA OLA I LE TALALELEI I LOU AIGA

Ua aoao mai e le folafolaga ia i tatou mea e tatau ona tatou faia ina ia fafia ai i o tatou aiga. “E maua le fafia i le olaga faaleaiga pe a faavae i aoaoga a le Alii o Iesu Keriso. O faaipoipoga ma aiga manuia, e faavae ma tumau i mataupu faavae o le faatuatua, tatalo, salamo, faamagaloga, faaaloalo, alofa, agalelei, galuega, ma gaoioiga faafafia tuufaatasi.”

Ao avea i maua ma lo’u toalua o se ulugalii faaipoipo talavou, sa ma taumafai pea lava pea e faavaeina se mausa mautu o le faitauina faatasi o tusitusiga paia i aso uma o se aiga. Ina ua pe tusa ma le fitu tausaga o le ma ulumatua, na iu lava ina mafai ona avea ma se ma mausa o aso taitasi. O le faitauina o le mea muamua lava i le taeao, sa matou faaaauauina ma le faamaoni mai lena taimi e agai atu i luma. Na mautu loa le mausa ma isi tamaiti, sa naunau le fanau laiti ifo ia auai ao amata ona latou tuputupu ae. O le tele o taimi e tatau ona matou faitau ao lei ta le 6 i le taeao ona o le seminare i le vaveao.

Ua i ai i ulugalii ua faaipoipo talavou se tulaga o le amataina o a latou lava uiga masani amiontonu faaleaiga—o le faia o suesuega o tusitusiga paia faaleaiga i aso taitasi, faia o tatalo faaleaiga, ma le saunia o a latou fanau mo misiona ma faaipoipoga faalemalumalu.

7 FAMAMALU I MATAFAIOI O LE TAMA MA LE TINA I LE TAUSIGA O FANAU

Ua faasoa mai foi e le folafolaga nisi o fautuaga taua e uiga i le tausiga o fanau: “O le uluai matafaioi a tina o le faafaileina lea o a latou fanau. O nei matafaioi paia, e ao i tamā ma tina ona fesoasoani le tasi i le isi o se *paaga tutusa*.”

Atonu o nisi taimi e lagona ai e se tasi o matua le faapea o ia e sili atu le agavaa i le tausiga ma le aoaiina o le fanau. Ua aoao mai pea lava pea perofeta o lenei tisipenisione faapea o tane ma ava ua avea ma se paaga i le faaipoipoga, o faaiuga uma e faatatau i le aiga e tatau ona la faia faatasi ma le lotogatasi.

O paaga tutusa e tatau ona avea ma paaga tutusa. Fefautuau faatasi ma tatalo faatasi. Ia taialaina e le Agaga ina ia iloa le auala sili ona aoga e tausia faatasi ai la oulua fanau. O o latou taunuuga e faavavau o le a aafia e a oulua faaiuga.

8 FAAAOGA LOU FAITALIA TATAU E FILIFILI AI E MULIMULI I LE FAAOLA.

O le faaiuga po o fea o le a e i ai i le 20 tausaga po o le 20 seneturi e fitoitonu lava ia te oe. Ua e saoloto e filifili; ae peitai, o taunuuga e faavavau e sau mai au filifiliga. Ona o le Togiola a le Faaola, “ua togolaina [le tagata] mai le pa’ū [ma] ua latou saoloto ai e faavavau i le iloa o le lelei mai le leaga; e *fai mo i latou lava* ae lē faamalosia, vagana ai i le faasalaga a le tulafono i le aso tele ma le mulimuli, e tusa ma poloaiga ua tuuina mai e le Atua.

“O le mea lea, ua saoloto tagata . . . e filifili le saolotoga ma le ola e faavavau, e ala i le Puluvaga sili o tagata uma, pe filifili le faatagataotauaina ma le oti, e tusa ma le faata-gataotauaina ma le mana o le tiapolo; ona ua saili o ia ia pagatia tagata uma e pei o ia lava” (2 Nifae 2:26–27; faaopoopo le faamamafa).

E ita Satani ia te oe ona o le tagata o e i ai ma e manao e sui ia te oe. Na te manao e faatiga ia te oe, e pei o ia. O Iesu Keriso e alofa ia te oe. Na Ia totogiina le tau mo au agasala. Na Ia foai mai Lona soifua mo oe. Ua Ia valaauliaaina oe e mulimuli atu ia te Ia ma ia salamo, pe a tatau ai. A o e filifili e mulimuli i le Faaola, o le a e maua le “olioli i lenei soifuaga ma le soifuaga e faavavau i le lalolagi a sau.”³

9 ATIINAE AE LE FAATUATUA E TUMAU AI E OO I LE IUGA

E oo mai le faatuatua pe a fai ua e liua atu i le Alii. Sa aaoao mai le perofeta o Nifae: “O le mea lea, e tatau ai ona outou fetaomi atu i luma ma le tumau ia Keriso, ma se susulu atoatoa o le faamoemoe, ma le alofa i le Atua ma tagata uma. O le mea lea, afaia o le a outou fetaomi atu i luma, ma taumamafa fiafia i le afioga a Keriso, ma tumau e oo i le iuga, faauta, ua faapea ona fetalai mai le Tama: o le a outou maua le ola e faavavau” (2 Nifae 31:20).

Sa saunoa talu ai nei Peresitene Thomas S. Monson i le konafesi aaoao, “E i ai le faamoemoe i le lumanai, pei foi o o outou faatuatua.”⁴ E aofia ai i lena mea le faatuatua ia tumau ai ma faatoilalo ia faigata uma, e aofia ai ma solitulafono, faalata, ma faanoanoaga. O lou faatuatua ina ia tumau o le a iloa ai lou taunuuga, e oo lava i lou taunuuga e faavavau.



10 GAUAI ATU LOU LOTO I LE FINAGALO O LE ATUA

Ou te tatalo ua uunaia e le Atua lou agaga ma se manaoga ina ia faia le mea sili ma ia faaauau ai lava ma ia mulimuli i le fautuaga a o tatou perofeta soifua. Ou te faamoemoe ua e lagona se manaoga ina ia faamalosia lau tautinoga ia avea ma tagata ua uma ona muai faauuina e le Atua ia avea ai oe.

“Uso e [ma tuafafine], tatou te lē o atu pea ea i lenei savali sili? O atu i luma ae lē o le solomuli. Lototetele, . . . o atu pea, o atu pea i le manumalo! . . . O lea, ia tatou osi atu, o se ekalesia ma se nuu, ma se Au Paia o Aso e Gata Ai, se taulaga i le Alii i le amiontonu” (MF&F 128:22, 24).

O le a lena taulaga e mafai ona e tuuina atu toatas i le Atua? O le meaalofa lea e tasi Na te le manaomia mai ia te oe. O le ositaulagaina lea o lou loto ina ia gauai atu i Lona finagalo. O le tuuina atu lea o lou faitalia i luga o le fata fiaitalaga mo le taulaga a le tagata lava ia.

O se tasi o *Lectures on Faith*, na saunia e le Usoga anamua i lenei tisipenisione, e faapea: “O se lotu e le manaomia le ositaulagaina o mea uma, e le taitai ona lava le malosi e maua ai le faatuatua e tatau ai mo le ola ma le faaolataga.”⁵

O lou fiaitalia o le mea lea e tasi o oe lava e anaina ma e mafai ona e tuuina atu o se taulaga i le Atua. O le ofo fua atu o lou loto mo Lona finagalo, o le a e avea ai faapei o Ia.

Ou te faaiu ma la’u molimau e uiga i le Faaola. I le tulaga o loo e faatino ai le faatuatua ia Iesu Keriso, gauai atu lou loto i le finagalo o le Atua, mulimuli i fautuaga a Ana perofeta, ma usiusitai i musumusuga a le Agaga, o le a e faamaoni, fiafia, ma faamanuiaina. ■

Mai se saunoaga i le faigalotu, “Where Will You Be in 20 Years? [O Fea o le a E I Ai i le 20 Tausaga?]” na tuuina atu i le Iunivesite o Polika Iaga-Idaho i le aso 15 Me, 2012. Mo le tusiga atoa i le gagana Peretania, alu i le web.bryui.edu/devotionalsandspeeches.

FAAMATALAGA

1. “O Le Aiga: O Se Folafolaga i le Lalolagi,” *Liahona*, Nov. 2010, 129; faaopoopo le faamamafa.
2. Bruce R. McConkie, “Agency or Inspiration?” *New Era* Nov. 1975, 38.
3. Gordon B. Hinckley, *Caesar, Circus, or Christ?* Brigham Young University Speeches of the Year (Oct. 26, 1965), 8; tagai foi ia Russell M. Nelson, “Malosi Faaleagaga,” *Liahona*, Jan. 1998, 19.
4. Thomas S. Monson, “Ia Outou Lototetele,” *Liahona*, Me 2009, 89.
5. *Lectures on Faith* (1985), 69.

ÔLE ATU

Iakopo 1:5-6



"A e afai ua leai se poto i
so outou, ina ole atu ia i
le Atua, o le foai tele mai
i tagata uma ma le le toe
tautaua; ona foaiina mai ai
lea ia te ia.

"A ia ole atu ma le faatua-
tua, aua lava nei masalo-
salo. Aua o le masalosalo e
tusa ia ma le peau o le sami
ua sousou i le matagi ma
felafolafraiina."



Aisea na filifilia ai lenei autu, ma o le a le uiga ia te oe? Ua faasoa mai e Brother Stephen W. Owen, Peresitene Aoao o Alii Talavou, ma Sister Bonnie L. Oscarson, Peresitene Aoao o Tamaitai Talavou o la manatu.

AISEA UA FILIFILIA AI LE MAU LENEI?

Sister Oscarson: Ua silafia e le Alii le savali e te manaomia, ma e matagofie le auala e taliina ai e le autu nisi o faafitauli e aliae i le aluga o le tausaga ma le ala e fetaui ai ma mea o loo tutupu i o outou olaga.

Ina ua matou talanoaina le Iakopo 1:5–6 o se filifiliga mo le autu o lenei tausaga, sa faatumulia le potu i le Agaga. Ma sa matou ioeina uma o le a avea o se mau lelei mo o tatou talavou aua o loo i ai ni nai fesootaiga. E i ai lona fesootaiga i le talafaasolopito a le Ekalesia—o le mau sa faiatua e Iosefa Samita lea na musuia ai o ia e alu i le Vao Paia ma tatalo ai. Ma o le fesootaiga maoae lona lua, o loo i ai le molimau o le misiona paia a Iosefa Samita, o se mea tatou te manaomia i se taimi o loo faaauau ai pea ona fesiligia lona tulaga ma le talafaasolopito a le Ekalesia e le lalolagi. O se savali foi o le auala tatou te maua ai faaaliga faaletagata lava ia i o tatou olaga, lea e manaomia ona iloa e tagata uma

Brother Owen: O loo tele mea o loo tutupu i o outou olaga i le taimi nei, ma o loo ia te outou ni fesili se tele. Faatasi ai ma ala o faasalalauga

faaleagafesootai ma masini e saili ai o loo tatou mauaina, o loo i ai le tele o punaoa lea e mafai ona e liliu atu i ai ina ia maua ni tali mo au fesili o le faatuatua. O lenei mau taua o loo faaali mai ai le faagasologa o le faaaliga a Iosefa Samita, o se faataitaiga lea e mafai ona tatou mulimuli i ai.

E MAFAI FAAPEFEA E LE AUTALAVOU ONA FAAPATINO MA FAAAOGA LE IAKOPO 1:5-6?

Sister Oscarson: O lenei mau o loo i ai se savali taua. O loo faapea mai, “Ole atu ma le faatuatua, aua lava nei masalosalo” (Iakopo 1:6). O lenei mea e faanoanoa ai. E manaomia ona e ole atu i le faatuatua, ae le o le masalosalo.

Brother Owen: Ma o le ole atu i le faatuatua o lona uiga o le ole atu ma le loto faamaoni. Ina ua maua e Iosefa Samita le tali o le ekalesia e auai, na te lei tau lava ina faapea atu, “Ia, e lelei le iloaina o lena mea, ae . . .” Sa ia agai i luma i le faatuatua.

Sister Oscarson: Ia manatua o se tatalo amiontonu e le o le ole atu mo mea tatou te mananao ai ae ia saili le mea e finagalo i ai le Atua mo i tatou.

O LE A LE FAUTUAGA E TE TUUINA ATU I LE AUTALAVOU E UIGA I LE FAAAOGAINA O LE TATALO I O LATOU OLAGA?

Sister Oscarson: Ia faia o se mausa. E le mafai ona e faagaloina.

E le mafai ona e manatu mama i ai. O le uso o Iareto ua tuuina mai se faataitaiga o lena mea (tagai Eteru 2:14).

Brother Owen: O le faagaloina o le tatalo i lea taimi i lea taimi o se mea e tasi, ae o le popolega sili o le liliu ese mai le Alii ma le manao ai e tatalo. O le taimi e te lagona ai e le tatau ona e tatalo, o le taimi lena e te manaomia ai ona tatalo. Ma afai o loo e faia au tatalo ma faiatua tusitusiga paia, o le a e ogatusa ma le Agaga. Ma afai e te le o faia, o le a e faamaoina oe lava.

Sister Oscarson: E mafai ona tatou talanoa sao ma le Atua. Na te le tuuina mai ni tapulaa. O se mea alofa le iloaina e mafai ona tatou faia lena mea ma o loo i ai o Ia iina i taimi uma.

NA FAAPEFEA ONA E AOAO E TATALO I SE AUALA ANOA?

Sister Oscarson: E le mafai ona ou mafaufau i se aafiaga se tasi; o se taunuuga o le olaga atoa. O le tatalo ua avea ma se tasi o vaega sili ona anoa o lou aso aua ou te faia se tau-mafaiga ina ia tumau ai. Ua avea au ma se tagata lelei atu i le faalogo ma le mauaina o tali. Tatou te aoao ma sili atu ona tatou lelei i le tele o lo tatou auai i le faagasologa. Tau lava o le tumau ai i aso uma lava, ia mautinoa ou te le misia lena avanoa e talanoa ai i lou Tama Faalelagi. O le faatele ona tatou tatalo, o le a sili atu ona tatou lelei e faalogo atu i na tali.

Brother Owen: I lou talavou pe a ou matuai manaomia le iloaina o se mea, ou te manatua le Muai Faaaliga ma mafaufau, "Sa faia e Iosefa Samita. Ou te le manaomia se faailoga tele, ae ou te manao-mia se tali." Ma i le faatuatua ou te mulimuli ai i lena mamanu. Ou te manatua le tootuli ai i lalo ma ifo lou ulu ma faia leotele se tatalo. O le faauau pea ona mulimuli ai i lena mamanu sa faamanuiaina ai lou olaga i le tele o taimi ina ia maua faaaliga faaletagata lava ia.

O LE A SE MEA SE TASI E
SILI ONA TAU A E MAFAI E
LE AUTALAVOU ONA AOAO
MAI LENEI MAU?

Brother Owen: Na o lou manao lava e toe faamamafa le mamanu o le tatalo sa faavaeina e Iosefa Samita. I le na o le 14 tausaga, sa le mautonu ai o ia, o lea sa ia faitau ai ana tusitusiga paia. O le Muai Faaaliga sa le o se taimi puupuu lea sa tau lava o le tootuli ai o Iosefa i lalo. Sa i ai le tele o galuega a o lei tupu lena mea. Sa toe mafaufau ma toe mafaufau o ia i lana fesili. Ina ua ia maua le Iakopo 1:5–6, sa ia faapea mai, "E leai lava se mau o tusitusiga paia na oo mai i le loto o se tagata ma le mana tele nai lo o lenei mau i lou loto" (Iosefa Samita—Talafaasolopito 1:12). Sa ulu mai ma se mana tele i lona loto, ma sa ia galue ai loa. Sa ia tatalo ma le loto faamaoni ma agai i luma i le faatuatua. Ma o le mea lena matou te faamoemoe o le a mafai ona outou lagonaina i lenei mau i le taimi atoa o le 2017. ■



PUNAOA I LE INITONETI

Pe o e fuafuaina se gaoioiga po o se konafesi pe tau lava o le mafaufau e uiga i le autu ia te oe lava, o le a e mauaina ata, musika, ma isi punaoa faaopoopo mo le autu o le Mutualie o lenei tausaga i le lds.org/go/11752.

ÔLE ATU

Iakopo 1:5-6



"A e afai ua leai se poto i so outou, ina ole atu ia i le Atua, o le foai tele
mai i tagata uma ma le le toe tautaua; ona foaiina mai ai lea ia te ia.

"A ia ole atu ma le faatuatua, aua lava nei masalosalo. Aua o le masalosalo
e tusa ia ma le peau o le sami ua sousou i le matagi ma felafolafoaiina."

Iakopo 1:5-6

O FOLAFOLAGA E 50 LE TATALO

Saunia e Carlisa Cramer

Na saunia e le Tama Faalelagi le tatalo o se auala e fesootai sao atu ai ia te ia ina ia tuuina atu le faafetai, ole atu mo faamanuiaga, ma tuputupu ae ai faaleagaga. O nisi taimi pau lava le mea e manaomia o le punou o le ulu, piilima, ma ni nai upu faigofie ma faamaoni. Seki a, a ea? O folafolaga po o faamanuiaga eseese nei e lima e mafai ona tatou maua pe a tatou tatalo.

T

MALOSI E FAATOILALO AI

I le avea ai ma ni tagata soifua, e mafai ona tatou lagona le vaivai i le tele o auala—faaletino, faalelagona, faaleagaga, ma faalemafaufau. E mafai ona tatou tauivi i le taumafai ai e tamoe i se tuuga pe pasi se suega pe tetee atu i se faaososoga pe oo lava i le lagonaina o le Agaga. Ae e mafai ona aumai ia i tatou e le tatalo le malosi tatou te manaomia e faatoilalo ai soo se mea e tuuina mai e le olaga ia i tatou.

E pei ona fai mai Nifae, "E le aumai e le Atua ni poloaiga i le fanauga a tagata, sei iloga Na te saunia le ala mo i latou ia mafai ai e latou ona fai le mea ua la poloaiina ai i latou" (1 Nifae 3:7). E mafai ona aumai e le Alii ia i tatou le malosi e ausia ai soo se mea lelei o tatou taumafai e fai pe afai o Lona finagalo lea.

Tatalo mo le malosi e faatoilalo ai se faaososoga. Tatalo mo le malosi e taulai atu ai ma suesue ma le lelei mo se suega. Tatalo mo le malosi e tamoe ai ae le vaivai. Tatalo mo le malosi, ma o le a la faamalosia oe.



2

FAAMAGALOGA

E ui e manaia le manatu a le o lea, tatou te le atoatoa. Tatou te sese, ma ua na o se vaega lena o le olaga. Peitai ua saunia e le Alii se auala e faalelei ai: o le mana o le Togiola a lesu Keriso. Ma o se tasi o auala e maua ai Lona mana o le tatalo.

A tatou ole atu mo le faamagaloga e ala atu i le tatalo, e mafai ona faamagaloina i tatou mai i a tatou agasala e ala i le Togiola a le Faaola. E ui o agasala tetele atu e ono manaomia ai le fesoasoani a se epikopo po o le peresitene o le paranesi, o le tatalo faamaoni ma patino o le a avea pea ma se tasi o laasaga muamua i le faamagaloga—pe o tatou ole atu i le Tama Faalelagi e faamagalo i tatou pe fesoasoani mai ia i tatou e faamagalo atu se isi tagata. O le a la fesoasoani mai foi ia i tatou ia iloa le ala e faamagalo ai i tatou lava.



3

POTO MA LE TAITAIGA

Atonu o le faaaliga a le tagata lava ia o se tasi lea o uluai faamanuiaga folafolaina o le tatalo na e mafaufau i ai, aemaise lava i le i ai lava pea i lou mafaufau o le autu fou o le Mutualie. Sa lei i ai se poto ia losefa Samita e uiga i le ekalesia e auai ai, o lea sa ia tootuli ai i ona tulivae i le Togavao Paia, tuu atu lana fesili, ma mauaina se tali—i se auala maoae tele.

Peitai o faaaliga e le mo na o perofeta, ma e le faapea e tatau ona avea ma se aafiaga taura tele. Afai e i ai nisi o i tatou ua leai se poto e uiga i soo se mea, e *mafai* ma e *tatau* ona tatou ole atu i le Atua. O le a la tali mai, e ui e le tali mai i nisi taimi i le ala tatou te faamoemoe i ai. O le a tali mai le Alii ia tatou fesili ma fesoasoani e taialaina o tatou olaga, ae e tatau ona tatou ole atu muamua!



4

MANAO E FAI LE FINAGALO O LE ALII

Atonu e faigata atu ona vaai atu i lenei mea o se faamanuiaga—aua, o le mea moni lava, o nisi taimi tatou te mananao ai i ni mea mo i tatou lea e le finagalo i ai le Alii mo i tatou. Ae ao tatou tatalo ina ia liua moni ma ia i ai le manao e faia le finagalo o le Alii, o le a tatou iloaina se mea ofoofogia: o mea tatou te mananao i ai o le a amata ona foliga atili i mea o loo la finagalo i ai.

Ae o lenei liuga o le loto o le a le tupu faafusei. Na saunoa Elder David A. Bednar o le Korama a Apostetolo e Toasefululu: "Mo le toatele o i tatou, o le liuaina o se faagasologa e faifai pea, ae le o se mea e tupu i se taimi e tasi e mafua mai i se aafiaga mamana pe ofoofogia foi. O lea upu ma lea upu, e faasolo-solo malie toetoe lava ina le matauina, o o tatou faa-moemoega, o o tatou mafaufauga, o a tatou upu, ma a tatou mea e fai e ogatusa ma le finagalo o le Atua," *Liahona*, Nov. 2012, 107–8).



5

FILEMU

O se tasi o faamanuiaga ua folafola mai ia i tatou pe a tatou tatalo o le filemu ma le toafimalie e ala i le Agaga Paia. Aua, ua ta'ua o la o le Faamafanafana. Ia faamautinoa o le a oo mai le filemu e oo lava i taimi faigata. Manatua le folafolaga a le Alii i le loane 14:27: "Ou te tuuina atu ia te outou le manuia, o lou manuia ou te avatu ai ia te outou: ou te le avatu ia te outou faapei ona avatu e le lalolagi. Aua le atuatuvale o outou loto, aua foi tou te matatau." O le a iu lava ina oo mai le filemu pe a tatou ole atu.



O le tatalo o se auala sao e fesootai atu ai ma lo tatou Tama alofa. Faaaoga ma tuu atu ia te Ia e faamanuiia mai ai oe. Ae pe a uma ona maua nei faamanuiaga mai se tatalo faamaoni, ia manatua e faailoa atu lou agaga faafetai i—ua e matea—se tatalo. ■

E alala le tusitala i Iuta, ISA.

5

O Fesili e Lima E FESILI AI

Pe a Lagona Le Le Taliūna o Tatalo

Saunia e Margaret Willden

Na i ai se taimi na e faia ai se tatalo ma faatalitali mo se tali na foliga mai e lei oo mai lava? E le na o oe—ae ia e iloa e faafogoga moni mai lava le Tama Faalelagi i au tatalo. E taua le manatua e le oo mai ni tali i le *taimi* po o le *aulala* e te manao ai ma e silafia lava e lo tatou Tama o i le Lagi le mea sili ona lelei.

O nisi nei o fesili e mafai ona e fesili ifo ia te oe lava pe a o e tauivi ia maua ni tali o se tatalo:

1

Ua ou sauni e faatino se tali?

O le tatalo ma le faatuatua o lona uiga o le saunia e faatino le tali e te maua—pe o le tali lea sa e faa-moemoe i ai pe leai. Na maua e le Perofeta o Iosefa Samita le faatonuga lenei: “Ia saunia lou loto e talia ma usiusitai i faatonuga o le a Ou tuu atu ia te oe; i latou uma o e e faaali atu ia te i latou lenei ma usiusitai i lea lava” (MF&F 132:3).

“Sa latou tuu atu i latou lava i le tatalo tele, ma le ana-pogi; o lea na i ai ai ia i latou le agaga o valoaga, ma le agaga o faaaliga, ma a latou aoao atu, sa latou aoao atu ma le mana ma le pule mai le Atua” (Alema 17:3).

2

Na ou faia mea uma i le malosi o ia te au?

Faapea la e te lei suesue mo lau suega o le faasaienisi ona sa tou tafafao ma au uo. Mata o le a fesoasoani mai le Tama Faalelagi ia te oe e faapasi lau suega pe afai e na o lou ole atu mo Lana fesoasoani?

E tatau ona faia la tatou vaega ia maua ai faamanuiaina. O le suesueina la mo se suega, e mafai ona e tatalo atu mo le malosi ina ia lelei au taumafaiga e tusa ai ma au sauniuniga.

Mafaufau i le faataitaiga a atalii o Mosaea, o e na faamanuiaina i la latou galuega faafaifeautalai ina ua latou tuuina atu i ai se taumafaiga faaopoopo: “Sa latou tuu atu i latou lava i le tatalo tele, ma le ana-pogi; o lea na i ai ai ia i latou le agaga o valoaga, ma le agaga o faaaliga, ma a latou aoao atu, sa latou aoao atu ma le mana ma le pule mai le Atua” (Alema 17:3).

3

ou le amanaiaina ea le tali?

E faafofoga pea lava le Tama Faalelagi ia te oe, ma atonu ua uma ona ia tali mai i lau tatalo! E pei ona tau mai i le Mataupu Faavae ma Feagaiga 6:14, “O le tele o taimi na e ole mai ai na e maua ai faatonuga mai lo'u Agaga.” E mafai ona e tatalo mo mata faale-agaga ina ia iloa le tali, aua o nisi taimi e tali mai ai tatalo i ni auala le mailoa pe lei fuafuaina—e pei o le ala mai i galuega a isi.

Ma le isi mea, aua nei galo ona faaaluina se taimi e faalogo ai. Na faamatala mai e Elder Richard G. Scott (1928–2015) o le Korama a Apostolo e Toa-sefululua faapea: “O tali [a le Tama Faalelagi] o le a seasea lava oo mai ao e i ai i ou tulivae ma tatalo. . . . Ae, o le a ia uunaia oe i taimi filemu pe a mafai e le Agaga ona pa'i lelei atu i lou mafaufau ma lou loto” (“Faaagaina o le Meaalofa Faalelagi o le Tatalo,” *Liahona*, Me 2007, 9).

4

amiontonu ea ou manaoga?

Afai na e ole atu mo se mea e le aoga mo oe, e foliga mai e lei taliaina lau talosaga. Na aoao mai le Faaola “e tatau ai ona [tatou] tatalo atu pea i le Tama i le igoa o [Iesu Kerisoi]” (3 Nifae 18:19), lea e fautua mai ai ia tatou tatalo atu mo mea e sao ina ia tuuina mai. Fesili ifo ia te oe lava, “O a ni lagona o le Faaola e uiga i ou manaoga?” Afai o tamau ou moomooga i le manatu faapitoa po o nisi lava tulaga o le amioletonu, tatalo ina ia i ai se suiga o le loto ma ia iloa po o le a le mea o finagalo le Faaola e te ole atu ai.

5

O se taimi sao lea?

E tatau ona sao mea tatou te ole atu ai, ae e tatau foi ona sao le taimi. E i ai se fuafuaga maoae a le Tama Faalelagi ua faapolopolo mo i tatou, ae o nisi taimi ua i ai se eseesege laititi i tatou taimi faatulagaina mai ia te Ia. “O A'u upu e mautinoa ma e le iuvale. . . . Peitai o le a oo mai mea uma i lo latou taimi” (MF&F 64:31–32). Atonu e ono faauigaina faapea o le faatalitali laititi mo lena manua ina ia pe po o le toe maua o se manu tausi na leiloa, ma o nisi taimi e aofia i le taimi a le Alii le isi olaga—ae ia e mautinoa o le a ia faafogaga ma fesoasoani atu ia te oe i le aluga o le ala.

Atonu e faigata le onosai, aemaise lava pe a faigata ona iloa le tali o lau tatalo. Ae ao e suesue, e mafai ona e maua le lototele i le iloaina o le a e mauaina pea tali e te manaomia pe a e saili ma le faamoemoega moni: “E saili mai outou ia te au, tou te maua foi, pe a outou saili mai ia te au ma outou loto atoa” (Ieremia 29:13). ■

E alala le tusitala i Niu Ioka, ISA.

OLE ATU I LE ATUA

To'a ♩ = 156–170

Upu ma le Fati na tusia e
Nik Day

The musical score consists of four staves of music in 4/4 time, key signature of one flat (F#), and a tempo of To'a ♩ = 156–170. The score includes lyrics in English and Samoan. The lyrics are as follows:

1. Ua ta'u atu _____
2. E faa - solo - solo

le te - le o mea _____
na tu - pu a - e _____

Ma ua e su'e
E matu - a'i ma -

14

i la - lō ma lu - gā _____
ni - no la - va. _____

Lē i - loa se mea _____
Si - na tai - mi, _____

19

e tali - to - nu ai
se faa - moe - moe. _____

Ae ta - si le a - la e i - loa ai. _____
E te le toe fe - nu - mi - a'i la - va. _____

The score features a treble clef, bass clef, and a bass clef with a double bar line. Chords indicated include E♭, A♭, Cm, E♭, B♭, A♭, E♭, B♭, A♭, and Cm. The lyrics are placed below the corresponding musical measures.

24 §

A e ôle a - tu Na te ta - li mai. A'e too - tuli Na te pa - i mai.

24 A♭ E♭ B♭

28 A e moe - ii - ni ma ta-ta - lo, Na te musu-mu-su i lou lo-to. A e ti -

E♭ E♭/G A♭ E♭ B♭ E♭ E♭/G

33 - ga, Na te faa-ma - lo - lo. A e faa-mau - la - lo, Na te a - fio mai.

A♭ E♭ B♭ Cm

I le Coda
(Taimi long tolu)

A le - ai sou po - to, ô - le a - tu i le A - tua.

37 A♭ E♭ B♭ E♭

41 I mea e ma-sa - ni na fe - fe ai, fe - nu-mi - a - i i fi - tā, O lou faa -

A♭ E♭ G



46

tua - tua e te ma - lu ai Mai ave ma - lo - lo - si o à - fa,

46 Cm B♭/D E♭ A♭

51 Toe foi i le Coda
(i le fua pa'o 25 §)

Ua e tu mau-sa-li nei, ma tau-la i le u - pu - mo - ni. Ma a e ole,

51 E♭/G F m7 E♭/G A♭ B♭

57 CODA i le A - tua.

57 B♭ A♭ E♭ B♭

62

62 E♭ E♭/G A♭ E♭ B♭ E♭

Iakopo 1:5-6

Na aoao mai i tatou e lakopo i le ala e tatalo atu ai i le Atua ina ia mafai ona tatou maua se tali.



OLE ATU I LE FAATUATUA

“O le tulaga manaomia e ole atu ai ma le faatuatua [o fautua mai aii] e le gata ina taua le faailoa atu ae ia faia, o le matafaioi valalua e ole atu ma ia faatino, o le tulaga manaomia o le talanoa atu ma ia faia.”

Elder David A. Bednar o le Korama a Aposetolo e Toasefululu, “Ole Atu ma le Faatuatua,” *Liahona*, Me 2008, 94.

LEAI SE POTO

I nisi tulaga po o le isi, tatou te le maua uma lava le ituaiga poto lea ua na o le Atua e mafai ona tuuina mai ia i tatou. “E le iloa e se tasi mea a le Atua, ua na o le Agaga o le Atua” (1 Korinito 2:11). O le a mea lena e tatau ai ona tatou ole atu ia te Ia.

TELE

Liberally—O le upu eleni e faaliliu mai ai le upu lenei o lona uiga o le “faigofie,” atonu e faataau i le mafaufau tasi i le faamoemoega a le Atua ina ia tuuina mai ia i tatou ma le faamaoni ma le limafoai.

LE TOE TAUTUA

O le a tali mai le Atua ia te oe mana te le *toe tautaua lava* (fatio, otegia, pe tuuaia) oe mo le ole atu ia te Ia ma le faamaulalo mo se tali i se fesili taua.

A e afai ua leai 5 se poto i so outou, ina ole atu ia i le Atua, o lē foai tele mai i tagata uma ma le le toe ta'utaua; ona foaiina mai ai lea ia te ia. A ia ole 6 atu ma le faatuatua, aua lava ne'i masalosalo; auti e lē masalosalo e tusa ia ma le peau o le sami ua sousou i le matagi ma felafolafoaina.

FOAI I TAGATA UMA

“E le teena e ia se tasi e sau ia te ia, . . . ma ua tutusa tagata uma i le Atua.”

2 Nifae 26:33



AUA LAVA NEI MASALOSALO

“A oo mai taimi o le le mautinoa, ia avea au feagaiga ma mea e sili ona taua ma ia tonu foi ma

atoatoa lou usiusitai. Ona mafai lea ona e ole atu i le faatuatua, aua lava nei masalosalo, e tusa ai ma mea e te manaomia, ona tali mai lea o le Atua.”

Elder D. Todd Christofferson o le Korama a Aposetolo e Toasefululu, “O Le Mana o Feagaiga,” *Liahona*, Me 2009, 22.

OLE ATU I LE ATUA

“E auina atu talalo i lo tatou Tama Faalelagi i le suafa o Iesu Keriso. . . .

“O le faamoemoega o le tatalo, e le ina ia suia ai le finagalo o le Atua, ae ia faamautu ai mo i tatou lava ma isi ia faamanuiaga ua naunau le Atua e to mai, ae e tatau ona tatou ole atu ina ia mauaina.”

Taiala i Tusitusiga Paia, “Tatalo,” *scriptures.lds.org*.

Faamatatalaga a le faatonu: O lenei itulau e le o se faamalamalamaga atoa o fuaitau o le Atamai i Aoaoga Faavae na filifilia ae ua na o se amataga mo au lava suesuega.



Taimi FAASELESITILA

O nisi taimi e lagona ai e le o mamao tele le lagi.

Saunia e Hollie Megan Laura Hunter

se tasi aso, sa aoao i matou e ou taitai o Tamaitai Talavou e uiga i taimi taua pe a e lagonaina le Agaga ma lagona le latalata i le Atua. Sa latou faagoaina i latou o "taimi faaselesitila," o se fuaitau faigofie sa faigofie ona manatua. Mo au, sa ou iloa lelei lava le uiga o se "taimi faaselesitila"; sa ou lagonaina muamua, e pei e te lagona sina vaega po o le tofo pe faapei le olaga i le malo selesitila. Ma sa ou mauaina le tele o nei taimi!

Ina ua uma ona faalauiloa mai e o matou taitai le manatu, sa matou o i fafo. Sa susulu le la i laau. Sa moeini o matou mata. Sa ou lagona le la i ou foliga ao agi mai se savili mafanafana. Sa pepese manu felelei ma sa Rue laau i le savili a o matou fiafia i foafoaga a le Atua. Sa o se taimi faaselesitila.

O le isi taimi sa ou maua ai se taimi faaselesitila ina ua maea ona papatisoina lau uo mamae. Ina ua ma toe savavali e toe foi atu i le falesa mo le taimi na totoe o le sauniga, sa ia tago i lou lima ma talanoa e uiga i le maoae o le avea o i maua o ni uo ma o le a avea pea o ni uo—e oo lava i le faavavau. O le a le galo lava ia te au lena tala. Sa ou olioli ma fiafia ma lagona le faafetai!

I se tausaga mulimuli ane, sa mafai ona ma toe lagona uma faatasi lena olioli a o ma tutu i luma ma matamata i lona tina a o ulu atu i vai o le papatisoga. Sa i ai moni lava le matagofie i mea uma.

Atonu o le nofoaga sili e maua ai nei aafiaga o totonu o le maota o le Alii. O le taimi muamua sa ou ulufale ai i le malumalu, sa faamanuiaina au e auai atu ma ou matua ma lou uso. Sa papatisoina au mo lou tinamatua o tinamatua, ma sa ou lagona sa ia fiafia.

O taimi faaselesitila e mafai ona tupu i soo se mea i soo se taimi—ao faalogo i musika po le taimi o afiafi faaleaiga po o le aoga. Ou te manatua se tasi o afiafi faaleaiga lea sa le mafai ai ona taofia le talie o tagata uma! O se tasi lena o ou taimi sili ona fiafia ai.

O nei taimi faaselesitila ua faamalosia ai lau molimau ma fesoasoani ai ia te au ia atili maua se agaga loto faafetai. Sa latou aoaoina au i ni lesona maoae. Aemaise lava, sa latou faafiafaina au ma fiafia e uiga i le talalelei! Ou te iloa afai ou te faaaauau pea ona filifili e ola i le talalelei, o le matagofie uma, fiafia, filemu, ma le alofa ou te lagona i taimi faaselesitila o se mea e mafai ona ou lagona pea—i se fuataga maoae—i le malo selesitila. ■

E alala le tusitala i Lanarkshire i Matu, Sikotilani.

O LA TATOU AVANOA

AUTALAVOU



TALIAINA O LE #LUI O LE MALUMALU

Sa ou papatiso i le 2012 ma auai i se paranesi i le Itu o Ipoméia Pasila. Talu mai le 2014, sa ou matua gauai lava i le talafaasolopito o aiga. Sa amataina i le valaaulia mai ia Elder Neil L. Andersen o le Korama a Aposetolo e Toasefululua i RootsTech e faia papatisoga mo ou lava igoa faaleaiga. Sa lagona le matua tuuto i le faia o talafaasolopito o aiga, ma le iloaina afai ou te "tuitui atu," ona "toina ai lea" (tagai Mataio 7:7).

I le taimi nei ua ou maua le tele o augatupulaga, ata, pepa o faamatalaga, ma, e sili ai ona taua, o le tele o tala faaleaiga, lea e manaia. O le mauaina o lenei faamatalaga, sa ou tusia ai se tusi faatasi ma ata ma aso mai i lau talafaasolopito faaleaiga. O lenei galuega faatino na fesoasoani ia te au e faafesootai tagata o lou aiga e le auai i le Ekalesia ma tuuina mai ia te au le avanoa e faasoai lau molimau i le mafai e aiga ona faavavau.

O lenei galuega sa fesoasoani ia te au e tu ai i nofoaga paia, tumau le malosi i le Ekalesia, ma tali le valaauga e auauna atu i le Alii i se misiona.

O loo ia te au se molimau e faapea o le galuega o le faaolataga e faia e lenei Ekalesia i itu uma e lua o le veli, e moni ma sa musuia e lo tatou Tama Faalelagi. Ao lei alu i lau misiona, sa ou maua le avanoa e faia ai papatisoga mo ou tuaa, ma o le taimi nei i le avea ai o se faifeautalai ua ou maua le avanoa e papatiso ai tagata o e o soifua ma finagalo e sua o latou olaga e faavavau. ■

Elder Claudio Klaus Jr., Misiona Arizona Mesa



Saunia e Elder
M. Russell Ballard

O Le Korama
a Aposetolo e
Toasefululua



AUALA E FAASOA ATU AI LE TALALELEI

Ele tatau ona tatou faatoese atu mo o tatou talitonuga pe fetuutuunai mea ua tatou iloa e moni. Ae e mafai ona tatou faasoa atu i le agaga o le malama alofa—**lototoa ma le mautinoa**, ma le taulai tasi atu i le mamalu o le Atua—e aunoa ma le faamamafa atu i o tatou tagata faalogologo pe lagona ua tatou toilalo i lo tatou tiute pe afai ua latou le taliaina i se taimi vave mea ua tatou talitonu i ai.

Afai tatou te mauaina le mafutaga a le Agaga Paia, ona mafai lea ona tatou faia ni mea faigofie e fesoasoani e faamalamalama atili atu ai le talalelei i olaga o tagata ua le o toe toaaga mai a le Ekalesia faapea foi ma i latou e le auai i la tatou tapuaiga. E le manaomia nisi polokalama fou e faia ai lenei mea. Tatou te le manaomia se tusitaulima po o se valaauga po o se fonotaga faaleaoaoga. Na pau le mea e manaomia o le aoao o tagata lelei o le Ekalesia ina ia **faalagolago i le mana o le Agaga Paia** ma, faatasi ai ma lenei mana, aapa atu ma pai atu i olaga o fanau a lo tatou Tama. E leai se auaunaga sili ona maoae e mafai ona tatou tuuina atu nai lo le faasoa atu o a tatou **molimau patino** ma i latou o e leai se malamalamaaga e uiga i le talalelei toefuataiina a Iesu Keriso.

O lea la, uso e ma tuafine, ua tatou saunia e faia se mea? E mafai e i tatou taitasi ona filifili i le aso e **faateleina la tatou lava sauniuniga faale-agaga** e ala i le sailia o le taitaiga a le Agaga Paia ona, faatasi ai lea ma Lona mana o le avea ma a tatou soa, faamanuia atili fanau a lo tatou Tama ma se malamalamaaga ma le atamai e moni le Ekalesia?

Ou te molimau atu o loo soifua le Faaola ma o le a Ia faamanuiaina i tatou taitoatas pe afai o le a tatou faia mea uma e mafai ona tatou faia e uunai ai i luma lenei galuega maoae o Lana Ekalesia. Tau ina ia taitasi i tatou ma filifili ia faia nisi mea se tele. ■

Mai se saunoaga i le konafesi aoao ia Aperila 2000.

NA FAAPEFEA ONA E FAAAOGAINA LENEI MEA?

Ou te matua faafetai sa ou ola ae i le Ekalesia. Ou te fiafia e faasoa atu le talalelei, ma ou te taumafai ia avea ma se faataitaiga lelei, aua ou te iloa o loo tilotilo mai a'u uo ma isi ia te a'u, aemaise lava lou Tama Faalelagi. E leai se mea e te faia e le o iloa, pe le o amanaiaina e lo tatou Tama oi le Lagi. E tatau ona e taumafai ia faia le mea sao ma faasoa atu le talalelei i Lana fanau, aua e le faatapulaaina le aofai o avanoa e faia ai lena mea; e na o lou tatalo lava ia maua ai ma faaaoga na avanoa.

Chari G., Arkansas, ISA

TUUSAO I LE MATAUPU

Aisea e avea ai ma
**agasala tele atu le
le loto faamagalo
nai lo le faia o se mea sese
i se isi tagata?**

Ua aoao mai le Alii, “E tatau ona outou faamagalo i le tasi; ona o ia o lē e le faamagalo atu i lona uso i ana agasala, e tu ta’usalaina o ia i luma o le Alii; aua e tumau ia te ia le agasala tele atu.

“O Au, o le Alii, Ou te faamagalo i le o le a Ou faamagaloina, ae o outou ua poloainia ia faamagalo atu i tagata uma” (MF&F 64:9–10).

A tatou le faamagalo atu, ua tatou tuuina la tatou faamasino faatapulaa i luga atu o le faamasino atoatoa a le Alii. Ua ia te Ia se vaaiga atoatoa o loto ma tulaga o tagata, ma ua na o Ia lava e mafai ona faamasino. O le a iu lava ina Ia tuuina atu le faamasinga tonu ma le alofa mutimutivale atoatoa i tagata uma—i latou uma o e na faia mea sese i isi ma i latou e leai se sala ae na tuaifuaina.


E le gata i lea, e ala i le manaomia ona tatou faamagalo atu, o loo fesoasoani mai le Alii ia i tatou ina ia filifili le fiafia i lo le faanoanoa, ia lafoai ni o tatou lagona ita ma le le fiafia ae ia maua le faamalologa e ala i Lona alofa tunoa. Ona tatou iloa lea, e pei o le faamanatu mai a Elder Kevin R. Duncan o le Fitugafulu ia i tatou, “O le Togiola a le Faaola e le mo na o i latou e tatau ona salamo; e mo i latou foi e tatau ona faamagalo atu.” (“O Le Uu Faamalolo o le Faamagalog,” *Liahona*, Me 2016, 35). ■

O le a le manatu a le Ekalesia i le faanoanoa, ma le auala e tatau ona ou taulimaina ai le faanoanoa?

Elagona e tagata uma le faanoanoa mai lea taimi i lea taimi, ma o le talalelei toefuataiga a Iesu Keriso ma le lagolago a aiga, taitai ma isi e mafai ona fesoasoani ia i tatou ia maua le toafimalie, olioli ma le filemu. Ae ua faailoa mai e taitai o le Ekalesia, o le faaletonu tuga o le faanoanoa, po o le mea ua taatele o le faaletonu o le faanoanoa (MDD), o se tulaga e sili atu ona matautia lea e mafai ona faalavelave i le gafatia a se tagata e galue atoatoa ai. Ua fautuaina mai e Elder Jeffrey R. Holland o le Korama a Apsetolo e Toasefululua ni nai mea e fai pe afai o loo e feagai ma faanoanoaga matautia:

- Aua nei aveesea le faatuatua i le Tama Faalelagi ma Iesu Keriso.
- Ia fai mea e aumai a le Agaga i lou olaga (tatalo, suesue tusitusiga paia, ma isi mea).
- Saili fautuaga mai matua ma taitai perisitua.
- Ia maua ni faamanuiaga faaleperisitua.
- Ia ai ma inu i le faamanatuga i vaiaso taitasi, ma uu mau i folafolaga o le Togiola a Iesu Keriso.
- Mataitu mo faailoga o le faanoanoa e pei o le atuutuvale, ona faia lea o ni suiga.
- Afai e tumau pea lou faafitauli, talanoa i matua poo taitai perisitua e uiga i le sailia o le fautuaga po o ni tagata tomai o i ai ni aoaoga faamaoniaina.

(Tagai “Peiseai o se Ipu ua Nutililii,” *Liahona*, Nov. 2013, 40-42.) ■



O Le TOEFUATAIGA

Una tatou aoaoina i lenei tausaga i le *Liahona*, e uiga i le talafaasolopito o le Ekalesia. Sue i le itulau e 68 mo le lisi o mau e mafai ona tou faitauina ma lou aiga i le faagasologa o le tausaga. A uma ona faitau, talanoa e uiga i mea sa tou aoaoina; ona valivali lea o avanoa o fuainumera tutusa. O ata taitasi iinei e suitalaga i se vaega o le Ekalesia moni a Iesu Keriso lea na toefuataiina.






LISI O MAU

O le tele lava o mau nei o ni faaaliga mai le Alii ia Iosefa Samita.

Valivali le ata o i itulau 66–67 ao e fai tauina!

| | |
|--|--|
| 1. Iosefa Samita—Talafaasolopito 1:10–13 | 27. Mataupu Faavae ma Feagaiga 59:9–10, 15–19 |
| 2. Iosefa Samita—Talafaasolopito 1:14–17 | 28. Mataupu Faavae ma Feagaiga 64:9–11 |
| 3. Iosefa Samita—Talafaasolopito 1:30, 33–34 | 29. Mataupu Faavae ma Feagaiga 64:33–34 |
| 4. Iosefa Samita—Talafaasolopito 1:51–53 | 30. Mataupu Faavae ma Feagaiga 76:19–24, 40–41 |
| 5. Iosefa Samita—Talafaasolopito 1:66–69 | 31. Mataupu Faavae ma Feagaiga 78:17–19 |
| 6. Mataupu Faavae ma Feagaiga 1:37–38 | 32. Mataupu Faavae ma Feagaiga 81:5–6 |
| 7. Mataupu Faavae ma Feagaiga 2:1–2 | 33. Mataupu Faavae ma Feagaiga 82:3, 10, 14 |
| 8. Mataupu Faavae ma Feagaiga 4:1–7 | 34. Mataupu Faavae ma Feagaiga 84:46–47, 62 |
| 9. Mataupu Faavae ma Feagaiga 6:34–37 | 35. Mataupu Faavae ma Feagaiga 88:78–80 |
| 10. Mataupu Faavae ma Feagaiga 8:2–3, 9–10 | 36. Mataupu Faavae ma Feagaiga 88:118–120 |
| 11. Mataupu Faavae ma Feagaiga 10:5, 69 | 37. Mataupu Faavae ma Feagaiga 88:123–126 |
| 12. Mataupu Faavae ma Feagaiga 11:6–7 | 38. Mataupu Faavae ma Feagaiga 89:1, 18–21 |
| 13. Mataupu Faavae ma Feagaiga 13:1 | 39. Mataupu Faavae ma Feagaiga 90:15, 24 |
| 14. Mataupu Faavae ma Feagaiga 18:10–13 | 40. Mataupu Faavae ma Feagaiga 97:15–16, 21 |
| 15. Mataupu Faavae ma Feagaiga 18:15–16 | 41. Mataupu Faavae ma Feagaiga 98:11–12 |
| 16. Mataupu Faavae ma Feagaiga 19:16–19, 23–24 | 42. Mataupu Faavae ma Feagaiga 100:5–8 |
| 17. Mataupu Faavae ma Feagaiga 20:75–79 | 43. Mataupu Faavae ma Feagaiga 101:16, 32, 36 |
| 18. Mataupu Faavae ma Feagaiga 25:10–13 | 44. Mataupu Faavae ma Feagaiga 105:39–41 |
| 19. Mataupu Faavae ma Feagaiga 27:15–18 | 45. Mataupu Faavae ma Feagaiga 107:6, 8, 13 |
| 20. Mataupu Faavae ma Feagaiga 39:20–23 | 46. Mataupu Faavae ma Feagaiga 110:1–10 |
| 21. Mataupu Faavae ma Feagaiga 46:10–12, 32–33 | 47. Mataupu Faavae ma Feagaiga 119:4, 6–7 |
| 22. Mataupu Faavae ma Feagaiga 49:25–28 | 48. Mataupu Faavae ma Feagaiga 121:7–9, 46 |
| 23. Mataupu Faavae ma Feagaiga 50:40–46 | 49. Mataupu Faavae ma Feagaiga 121:41–45 |
| 24. Mataupu Faavae ma Feagaiga 51:13, 19 | 50. Mataupu Faavae ma Feagaiga 122:7–9 |
| 25. Mataupu Faavae ma Feagaiga 58:26–28 | 51. Mataupu Faavae ma Feagaiga 130:20–23 |
| 26. Mataupu Faavae ma Feagaiga 58:42–43 | 52. Mataupu Faavae ma Feagaiga 131:1–4 |



Saunia e Elder
Dallin H. Oaks

O le Korama a Apose-
tolo e Toasefululua

Mata o le a tali mai i TAIMI UMA e le Tama Faalelagi au tatalo?

E silafia e le Alii mea
e sili atu nai lo i tatou,
ma e tali mai i a tatou
tatalo i le ala e sili
ona lelei.

Pe a tatou maua
le faatuatua i le Tama
Faalelagi ma lesu Keriso,
tatou te faalagolago
ia i Laua.



Faalagolago e
silafia oe e le Tama
Faalelagi ma alofa ia te oe.
Faalagolago e Na te
faafogofa i au tatalo ma
taliina i mea e sili ona lelei
mo oe. (Tagai i le
3 Nifae 18:20.)

Mai le "Faatuatua i le Alii o Iesu Keriso," Liahona, Me 1994, 128–132.

Januari 2017

69

O LA TATOU ITULAU




Saunia e Alexandra M., 10 tausaga,
Maryland, ISA



*Na faia e le Alii le Foafoaga mo fanau
a le Tama Faalelagi Ou te fiafia i manu
ma le natura.*

Samuelu M., 7 tausaga,
Madrid, Sepania




Saunia e Lissette N., 5 tausaga, Madrid, Sepania



*Na ou aoaoina i sauniga faamanatuga faapea ma a'u vasega
o le Aso Sa o nisi mea e le taua tele e pei o isi. O mea sili
ona taua o le talalelei a Iesu Keriso ma le usiusitai i lo tatou
Tama Faalelagi. Ou te fiafia e aoao.*

Ian A., 5 tausaga, Morelos, Mekisiko



*Pe a ou asiasi i le malumalu ma lo'u aiga, ou
te lagona le malosi o le Agaga aua ou te iloa
o loo faatasi le Alii ma i matou. Sa la fetalai
mai, "Ina tuu mai ia o tama iti e o mai ia te au"
(tagai Mataio 19:14).*

Heitor A., 10 tausaga, Paraná, Pasila



Saunia e
Elder Walter F.
González
O Le Fitugafulu

TAMAITI

O Le Tusi o loo i Luga o le Fatatusi

"Saili, suesue, ma tatalo tauanau"

(Tusipese a Tamaiti, 66).

E12 ou tausaga ae ou faalogo i Le Ekalesia a Iesu Keriso o le Au Paia o Aso e Gata Ai. Sa ou feiloai i ni faifeautalai AAG e toalua i luga o le pasi. Sa la fai mai pe mafai ona la o mai e aoao lo'u aiga.

Sa tuu e faifeautalai ia i matou se kopi o le Tusi a Mamona ma se tamaitusi o le molimau

a Iosefa Samita. O ou matua o ni tagata lelei tele. Ae sa lei auai i laua i le Ekalesia i lena taimi.


Sa i ai pea ia tusi e lua i luga o la matou fatatusi mo le tele o tausaga. Ona oo lea i se tasi aso ina ua 18 ou tausaga, sa ou sailili ai i la matou fatatusi mo se tusi lelei e faitau. Sa ou pikiiina i luga le Tusi a Mamona ma faitau le mataupu muamua. Sa oo mai se lagona faapitoa ia te au ao ou faitau.

Sa ia te au se aafiaga tulaga ese lea na ou iloa ai e moni le tusi. Sa i ai i le Tusi a Mamona se savali faapitoa e uiga i le Togiola a Iesu Keriso. Sa ou aoao atili e uiga i lou lava olaga ma e uiga i faamanuiaga a le Tama Faalelagi.

Mulimuli ane, na ou aoao ai e ui lava sa na o le 14 tausaga o Iosefa Samita, ae sa ia lototoa e faitau tusitusiga paia ma fesili atu i le Tama Faalelagi po o fea o ekalesia e moni.

Mai lena taimi, sa ou mulimuli pea i faataitaiga a Iosefa Samita. Ou te faitau i tusitusiga paia ma fesili atu i le Tama Faalelagi mo se fesoasoani ma le taitaiga. O le tatalo ma le Tusi a Mamona o ni vaega taua tele ia o lou olaga

A i ai ni ou faafitauali, faitau le Tusi a Mamona ma tatalo. O le a e aoao atili e uiga i le talalelei ma maua tali e te manaomia, e pei lava o au. Manatua ou lagona pe a e faia. ■



Ua Agavaa Min-Jun



Saunia e Kelly Hunsaker

E faavae i se tala moni

"Iesu o se uo lelei. . . .

atu ia te Ia" (Tusipese a Tamaiti, 37).

Sa sioa atu Min-Jun i fafo i le faamalama i ao.

"E foliga mai o le a timu taeao," na ia fai mai ai.

Sa tilotilo atu Tamamatua mai lana nusipepa ma luelue atu [lona ulu]. O le faaiuga lenei o le taumafanafana i Seoul, Korea i Saute ma faatoa amata le vaitau timuga.

Na tuu e Min-Jun se faamalu i talaane o ona ofu mo le Aso Sa. "Ou te manatu e tatou ona tatou vave o taeao."

Sa ataata tamamatua. "Manaia. E tatou ona tatou savavali i le ala umi, nei tei ua lolovaia le auala maualalo."

"E te manatu o le a lelei lava le fale Lotu?" O le fesili lea a Min-Jun.

Na lolovaia le fogafale a lalo i le tau-saga ua tea i le vaitaimi o le vaitau timuga.

"Ioe," o le tala lea a Tamamatua. "Ae e leai se mea e afaina ai le tatalo."

"O le a ou tatalo la mo le lotu nanei. Ma ina ia tatou taunuu atu iina ma le saogalemu. *Jal-ja-yo* (tofa)." Na ifo atu Min-Jun ma alu loa e moe.

I le taeao sa latou vave o ese mai le fale. Na tilotilo i luga Min-Jun i ao pogisa ia ua faatumulia ai le lagi.

"Ia faatuatua," o le tala lea a Tamamatua,

Na mulimuli atu Min-Jun ia Tamamatua i luga o le fasitepu vaapiapi i le mauga e lata ane i lo latou fale. Sa latou tutu i le pito i luga e to a latou manava. Ua amata ona susu o latou ofutino papae mai le vevela o le ea.

Sa tuu atu i fafo le lima o Tamamatua ina ia faalogoina ia uluai



TAUMAFAI PEA

"O le mea sili e uiga i le talalelei o le tauia o i tatou mo le *taumafai*, e tusa lava pe le manuia i tatou i taimi uma."

Elder Jeffrey R. Holland o le Korama a Apoestolo e Toasefululu, "O a Taeao e Faia ai e le Alii o Vavega i o Outou Luma," *Liahona*, Me 2016, 125–126.

mataua o le timu. "O e lagonaina le mea le la?" Ua amata ona timu."

Sa tatala a la faamalu. Na oo atu i le taimi la te tau-nuu ai i le isi fasitepu, ua vave ona oo mai le timu. Na taupulapula atu Min-Jun ia iloa sitepu taitasi i le timu.

"Awola!" sa ia ee mai ina ua see ma pau i lona tulivae.

"O e lavea?" Na fesili ai Tamamatua. Na ia punou atu i lalo e vaai i le pu i le ofu-vae o Min-Jun.

"Ua na o se maosi," na fai mai ai Min-Jun ma le tetete o lona leo.

"E mafai ona fai i le lotu," o le tala lea a Tamamatua.

Na savalia e Min-Jun ma Tamamatua le vaega o totoe o fasitepu ma pio agai i le auala maualuga.

"E malosi atu le matagi i luga iinei," o le tala lea a Tamamatua, ma uumau lana faamalu. Sa tau le mafai ona taofi e Min-Jun lana faamalu.

Na faafusei lava ona oo mai se matagi ma faamafitiina le faamalu ma masae ai. Na faatautau tauau o Min-Jun.

Sa faalala atu e Tamamatua lana faamalu. "Sau i lalo o la'u [faamalu]. Toeitiiti a a ta oo."

Na faasoa e Min-Jun ma Tamamatua le faamalu, ae na le mafai ona taofia ai le faaauau ai pea o le timu. Ao la latalata atu i le lotu, sa lagona e Min-Jun le tata mai o le musika.

"Ua leva ona amata!" Sa tamoe atu Min-Jun i faitotoa o i luma. Ona ia iloa atu lea o lona ataata i le tioata. O lona ulu e mesi ma susupala, o lona ofuvae ua masae, ma ua

palapala ona seevae. Sa ia mimigi ese mai le faitotoa ma toe foi i le fasitepu.

"E . . . e le mafai ona ou alu i totonu," o le taumememu atu lea a Min-Jun.

"O lena lava e lelei ou foliga," na fai atu ai Tamamatua.

"Ae ua ou palapala ma susu uma!"

Sa tilotilo atu Tamamatua ia Min-Jun, ona tilotilo atu lea i le fua timu o loo nonoa i le pa.

"E faigofie ia ona fua le timu, Min-Jun, ae faapefea ona tatou fuaina i tatou lava?"

Sa tau pulapula atu Min-Jun ia Tamamatua.

"Ua e vaai i seevae palapala, tulivae ua maosia, ma le ulu ua mesi uma, ma ua e manatu ai e te le o agavaa," o le tala lea a Tamamatua. "Ae ua ia Iesu Keriso se auala sili atu ona lelei mo le fuaina o le [agavaa]. O loo Ia silasila atu i lou loto ma silafia ai o loo e faia se mea sao. A e fuaina lou tagata i Lana ala, o le a vaai ai i le faatumulia o le fua."

Sa tilotilo atu Min-Jun i le fua timu. Sa faaaauau pea ona faateleina i mataua taitasi o le timu. Sa ia mafaufau i le faigata o le ala sa ia faia ina ia oo atu ai i le lotu ma le mafanafana ma le fiafia sa ia lagonaina ina ua ia i ai iina. Sa ia mafaufau i lona alofa tele i le Faaola ma le alofa tele o le Faaola ia te ia.

Sa opoina e Min-Jun Tamamatua, ma sa la savavali fatasi atu i totonu o le lotu. ■

E alala le tusitala i Colorado, ISA.



Aua Nei Galo ona Tatalo mo Erik



Saunia e Julie Cornelius-Huang

E faavae i se tala moni

"Ev'ry soul is free to choose his life and what he'll be"
(Hymns, no. 240).

Na tootutuli le aiga o Kari i talaane o le nofoa umi mo le tatalo faaleaiga. Na piilima ma le faaalaoalo tagata uma. Sa fai atu Papa i le uso laitiiti o Kari, o Livi, e fai le tatalo.

"Aua nei gallo le faafetai i le Tama Faalelagi mo le *tele* o a tatou faamanuiaga," o le toe faamanatu atu lea a Papa ia te ia.

"Ma aua nei gallo ona tatalo mo Erik," o le faaopoopo atu lea a Mama. E faamanatu atu pea e Mama ia i latou ina ia tatalo mo Erik.

O Erik o le tuagane matua a Kari. Ae lei aluese atu o ia mo le iunivesite, sa avea i laua ma Kari ma uo mamae.

Ua matua misia lava e ia mea malie uma sa masani ona la faia faatasi.

I ni nai masina ua tea, sa tau mai e Erik ia Mama ma Papa e le toe fia auai i le Ekalesia. Na tetei ma faanoanoa Kari ma lona aiga. Na amata ona latou tatalo mo Erik i po uma. O nisi taimi latou te tatalo ai ina ia ona lagona le Agaga Paia ma manao e toe foi mai i le lotu. E tatalo Papa ina ia manino le mafaufau o Erik e faia ai ni filifiliga lelei. E masani ona tatalo Mama ina ia i ai se tagata na te faatuatuaina e fesoasoani ia te ia e saili le ala sao. I le mavae ai o a latou tatalo uma, sa le mafai lea ona fesoasoani i le lagona ita o Kari. Aisea ua le toe aumai ai e le Tama Faalelagi Erik i le lotu?

Na iu lava, ao amata ona tatala le gutu o Livi e tatalo, sa le mafai ona toe taofiofi Kari. "Aisea ua le tali ai e le Tama Faalelagi a tatou tatalo?" sa

ia valaaau mai ai. Sa tilotilo tagata uma ia Kari ma le tetei, ae o lona ita tele na le popole ai. Sa leai se tasi na tautala mo se minute.

"Kari," o le tala lea a Papa, "ina ua e taunuu mai i le fale ananei, na e tuuina faalelei lau atofaafafa?"

"Ea?" O le fesili atu lea a Kari ma le le mautonu. O le a le faiā a lana atofaafafa i ai? Sa ia tilotilo atu i le faitotoa i luma ma iloa atu ai lana ato na togi agai i le puipui nai lo le tautau faalelei i autafa o le ato a Livi. "Leai . . . faamalie atu."

"E lei faamanatu atu e Mama ia te oe e tautau i luga?"

"Ioe," o le tali lea a Kari. Sa ia tilotilo i lalo i ona tulivae.

"E le faamanatu soo atu e Mama ia te oe e tautau i luga lau ato?"

"Ioe," o le memumemu lea a Kari. Na te lei iloa lava po o le a le faiā o lenei mea ma le talanoaga. Pe le o manatu mamafa ea Papa i lana fesili?

"Ou te iloa a tatou tatalo mo Erik, e tali mai *lava* le Tama Faalelagi ia tatou tatalo—i taimi uma. O le faafituali atonu e le o faalogo Erik i le taimi lenei. E filifili lava Erik pe faalogo i le Agaga Paia, e pei foi ona e filifili pe faalogo ia Mama e uiga i lau ato. Ae o le a la sou manatu o le a e le faalogo *lava* ia Mama pe a ia fai atu ia te oe e tautau i luga lau ato?"

"Leai, ou te matea e leai," na fai mai ai Kari.

"O le a ia faalogo i se aso!" O le tala lea a Mama ma faaivi mai lona mata ia Kari. Sa ataata Kari.

"Atonu foi o le a faalogo Erik i se aso," na fai mai ai Kari.

"E mautinoa lava," na fai atu ai Mama. "O le faalogo i le Agaga Paia o se tomai e tatau ona e atinaeina. Masalo e lei aoaoina lava e Erik lena tomai." Na amata ona maua e Kari se lagona lelei.

Na punonou uma o latou ulu ao faia e Livi le tatalo.

Sa ia tatalo ina ia aoao Erik e faalogo i le Agaga Paia.

Ao tatalo Livi, sa lagona e Kari le toofilemu ma le mafanafana. Ua ia iloa o loo faafogaina e le Tama

Faalelagi a latou tatalo. Ao tolaulau atu e Livi nisi o auala o loo faamanuiaina ai lo latou aiga, sa mafaufau Kari i se isi faamanuiaga e faaopoopo atu i le lisi—ua ia malamalamama atili e uiga i le tatalo i le taimi nei!

Ina ua uma le tatalo, na iloa e Kari e lei galo i le Tama Faalelagi ia Erik. Ua ia iloa foi Na te le faagaloina lava o ia [Kari]. ■

E alala le tusitala i Nevada, ISA.


O LE A LE FAITALIA?

O le faitalia o se meaalofa na tuuina mai e le Tama Faalelagi i tagata uma. O se meaalofa e filifili ai mea o le a tatou faia. E fesoasoani mai le Tama Faalelagi, ae Na te le faamalosia i tatou e faia ni mea. Nai lo lena, Na te tuu mai ia i tatou tatou te filifili mo i tatou lava.



E Alofa Iesu ia te A'u

Saunia e Kim Webb Reid




Ao lei faia le lalolagi, na tatou ola i le lagi ma o tatou matua faalelagi ma lo tatou Uso matua, o Iesu. Sa matou fafia, ma sa matua alofa le tasi i le isi.

I se tasi aso na tau mai e le Tama Faalelagi ia i tatou o le a ia faia se lalolagi mo i taotu e nonofo ai. Sa Ia silafia o le a tatou le tausia Ana poloaiga i nisi taimi ao tatou i ai i le lalolagi. O le a tatou manaomia se Faaola e fesoasoani ia i tatou ina ia toe foi atu ai ia te Ia. Na filifilia Iesu e le Tama Faalelagi e avea ma o tatou Faaola.



Ina ua afio mai Iesu i le lalolagi, na Ia faaali mai ia i tatou le ala sao e ola ai. Sa ia fesoasoani i tagata. Ma sa Ia aoao i latou ia alofa le tasi i le isi.



Sa puapuagatia Iesu i le faatoaga o Ketesemane ma luga o le satauro. Sa Ia faia lenei mea ina ia mafai ai ona tatou salamo ma ina ia mafai ai ona tatou toe feola pe a mavae ona tatou feoti.



Ina ua ou aoao e uiga ia Iesu, na ou lagona Lona alofa mo au. ■

O A'u o se Atalii o ni Matua Faalelagi





Saunia e Peresitene
Hugh B. Brown
(1883–1975)

Fesoasoani Muamua
i le Au Peresitene Sili

O LE MATAUPU MO SE PEROFETA SOIFUA

I le 1939, ao lei amatalia le Taua Lona Lua a le Lalolagi, sa valaaulia Uso Brown e se sui o le Maota mo Tagata Uma a Egelani e talanoa e uiga i se finauga faaletulafono mo le faamatalaga a Uso Brown e faapea o losefa Samita o se perofeta. I se lauga na tuuina atu i le lunivesite o Polika laga i le aso 4 o Oketopa, 1955, sa faaautuina "O Le Talaaga o se Perofeta," sa faamatalaina e Peresitene Brown le latou talanoaga (tagai speeches.byu.edu).

Sa ou amata . . . , "Ua e faapea mai o lou talitonuga sa fetalai le Atua i se tagata i lenei vaitaimi e manaia ma faavalevalea?"

"Ia te au, o lea lava."

"E te talitonu sa fetalai le Atua i se tasi?"

"O lea lava, i le Tusi Paia atoa o loo i ai faamaoniga o lena mea."

"Sa fetalai o Ia ia Atamu?"

"Ioe."

"Ia Enoka, Noa, Aperaamo, Mose, Iakopo, Iosefa, ma faaauau e ala atu i perofeta?"

"Ou te talitonu sa fetalai o Ia ia te i latou taitoatasi."

"E te talitonu o fesoootaiga i le va o le Atua ma tagata ua faagataina ina ua faaali mai Iesu i luga o le fogaelele?"

"Leai, o nei fesoootaiga sa taunu i lona atoatoaga, lona taunuuga i lena taimi."



"E te talitonu, lau susuga, ina ua maea le toetu o Iesu, na i ai se tasi loia—o ia foi o se tagata fai faleie e igoa ia Saulo o Tasesa—ao malaga atu i le ala agai i Tamaseko, na talanoa ma Iesu o Nasareta, o le sa faasatauroina, toetu, ma afio ae i le lagī?"

"O lea lava."

"O ai le leo na faalogo i ai Saulo?"

"O le leo o Iesu Keriso, aua sa Ia faailoa mai o Ia lava."

"O lea la, ua ou tuuina atu ia te oe i le faamaoni atoatoa o se tulaga aloaia i le taimi o le Tusi Paia, sa talanoa le Atua i tagata."

"Ou te manatu ou te talia lena tulaga, ae peitai sa faagataina i le taimi faatoa maea le seneturi muamua o le vaitaimi o le Faakerisiano."

"Aisea ua e manatu ai ua taofia?"

"Ou te le iloa."

"E te manatu e lei toe fetalai mai lava le Atua talu mai lena taimi?"

"Ou te mautinoa e lei toe fetalai mai lava."

"E tatau ona i ai se mafuaaga. E mafai ona e tuuina mai se mafuaaga?"

"Ou te le iloa."

"E mafai ona ou fautuaina atu nisi mafuaaga? Masalo ua le toe fetalai mai le Atua i tagata ona ua Ia le mafaia. Ua leiloa Lona mana."

Sa ia fai mai, "O lona uiga o lena mea o le taufaifai."

"Ia, o lona uiga la, afai e te le talia lena mea, masalo ua Ia le fetalai mai i tagata ona ua Ia le toe alofa ia i tatou. Ua ia le toe fiafia i tulaga e uiga i tagata."

"Leai," sa ia fai mai ai, "O le Atua e alofa i tagata uma, ma o Ia e le faailogia tagata."

"Ia, afai la o lena, a mafai ona Ia fetalai ma afai e alofa o Ia ia i tatou, o lona uiga la na o le pau le tali talafeagai, e pei ona ou iloa, tatou te le manaomia o Ia. Ua vave tele lo tatou tomai i mea tau saienisi, ua lava lo tatou aoaoina, ua tatou le toe manaomia ai le Atua."

Ona ia fai mai lea—ma o lona leo ua tete ao ia manatu i le taua o loo lupe—"Alii Brown, e lei i ai lava se taimi i le talaaga o le lalolagi sa manaomia ai le leo o le Atua e pei ona manaomia ai nei. Masalo e mafai ona e tauina mai ia te au pe aisea ua Ia le toe fetalai mai ai."

O lau tali sa faapea atu: "O loo fetalai mai o Ia, sa Ia fetalai mai; ae e manaomia e tagata le faatuatua e faalogo ai ia te Ia." ■



O LE MUAI FAAALIGA, SAUNIA
E JORGE COCCO SANTANGELO

"Ina ua oo mai le malamalama i o'u luga, sa ou vaia ni Tagata e toalua, o lo laua pupula ma le mamalu e le mafaamatatalaina, o tutu mai i o'u luga a'e i le ea. Sa fetalai mai le tasi o i laua ia te a'u, ma fofoga mai ia te a'u i lo'u igoa ma fetalai mai, a'o tusi ane i le tasi—O Lo'u Atalii Pele lenei, Faalogo ia te la!" (Iosefa Samita—Talafaasolopito 1:17).

EIAI Foi i le Lomiga Lenei

MO TALAVOU MATUTUA



i.44

MATAUPU FAAVAE FAAPEROFETA O LE **FAAMAONI**

O a ni faaiuga e tatau ona e faia i le taimi nei
ina ia e tumau ai i le faamaoni i le lumana'i?
Mafaufau i mataupu faavae nei e 10.

MO LE AUTALAVOU

AUTU O LE MUTUALE 2017

E te manao e latalata atili i le
Tama Faalelagi? Suesue le autu
o le Mutuale o lenei tausaga e
uiga i le tatalo.



i.50

MO TAMAITI

O Le Toefuataiga

Faataitai le gaoioiga lenei mo se
aula malie e fafia ai i le Mataupu
Faavae ma Feagaiga.

i.66

